

Jon

Ölöwak Buᅇa Jonöᅇ ohoyök.

Jim-asa-asari

Jonöᅇ nanᅇi qetᅇi Ölöwak Buᅇa kiaᅇgöreᅇ aukᅇe qahö ohoyökmö, nanᅇaᅇgöra kewö jiza, “Gwarek Jisösnöᅇ uruᅇan jöpaköm waᅇgiyök.” (19.26) Jonöᅇ urujöpak urukalemgö keuᅇi kapaᅇ köla jimakza. Jonöᅇ Ölöwak Buᅇa ki mi ambaziᅇnöᅇ keu kewö möt kutumegöra (20.31) ohoyök, “Jisös Kraist mi gölme aziyöhök qahö malökmö, öᅇᅇa Anutugö Nahönᅇi aka Amötqeeq Toᅇi akza. Inᅇi mönö i möt köhöiba mewö miaᅇön malmal köhöikᅇi miwikᅇaime.” Jisösnöᅇ mutuk Iwigöreᅇ mala keu jitᅇa malök. (1.1) Mewö mala gölme azia aka ösum-mumuᅇi aka mötmötᅇi mi aiwesök aᅇgöletot memba miaᅇön kondelök. Mi kondela bemtohoᅇgö könaᅇi jim asariᅇa tosatᅇan uruᅇini melaᅇgetka tosatᅇan töndup yaᅇgiseᅇ aket.

Jisösnöᅇ kewö akza, jiyök: Amötqeeq Toᅇi (4.26), malmalgö nene wötᅇi (6.35), miri gölme euyangö buᅇaya (8.23), bem koᅇkoᅇ (8.58), gölme pakpakö asakᅇi (9.5), naᅇgu (10.7), lama galöm öᅇpᅇi (10.11), Anutugö Nahönᅇi (10.36), Kembu aka Böhi (13.13), kömupnöhök wahötwahöt Toᅇi aka malmal kömbönaᅇi Toᅇi (11.25), köna, keu öᅇᅇi aka malmal köhöikᅇi (14.6), wain ip öᅇᅇi (15.1), kulem namᅇi mutukᅇi aka teteköᅇi A aka Z (Ind 1.8), Mutukᅇi aka Qöndökᅇi (Ind 1.17) aka mewö mewö.

Jisösnöᅇ gwarekurupᅇi öᅇᅇa jöpaköm eᅇgiba malöhi, goro keu qöndökᅇan (Boᅇ 13-17) mi törorök kondelᅇa. Keu mi nahömᅇambuk. Kömupnöhök wahötagun Pitö mem köhöimapköra kewö qesiyök: “Ni jöpaköm niᅇgizan me qahö? Mewö akzan ewö, mönö alaurupni köyan köᅇ eᅇgiman.”

Buk kiaᅇgö bahöᅇi bohönᅇi 6 mi kewö:

Keu mutukᅇi 1.1-18

Jon O-melun azi aka gwarekurup mutukᅇi 1.19-51

Jisösnöᅇ qenjarök nup meyök 2.1-12.50

Teteköᅇe Jerusalem kaba mala kömuyök 13.1-19.42

Guliba wahöta alaurupᅇi asuhum eᅇgiyök 20.1-31

Galili kaba gwarekurupᅇi asuhum eᅇgiyök 21.1-25

Anutugö numbu jitñi malmalñambuk.

1 ¹Könakönahiñe möpñangö möpñeyök keu jit malök. Yañön malmalgö könani nañgöba jiba kota malök. Keu jit yañön Anutugö qöhöröñe mala korök aka nanñak bem Anutuyöhök ahök. ²Keu jit yañön könakönahiñe Anutugö qöhöröñe malök. ³Yañgö qöhöröñe mala bauköm wañgiiga yuai pakpak ahuyök. Yuai kun qahö bauköm wañgibawak, mi mönö qahö ahubawak. ⁴Keu jit yañön malmal bömöññanök ahök. Yañgöreñ malmal köhöikñi miañön ambazip mem asarim eñgiiga eka mala kotket. ⁵Asakñan panaman uruñe asarimakzapmö, söñaupnönj malgeri, yeñön asakñangö könani mi qahö möt asariba mala kotket. Mewö.

⁶⁻⁷Anutunönj ambazip körek pakpak asakñi möt narimegöra möta kolek azi qetñi Jon melaiiga asuhuyök. Asuhuba kaba asakñangö könani indela nañgöba jiba malök. ⁸Jonönj nanñak asakñi mi qahö aka malökmö, yañön mönö asakñangö könani mi nañgöba jiba malök. ⁹Asak ölbölñi yañön ambazip gölme dop mem asarim nengimakzawi, yañön gölmenönj asuhumangö ahök.

¹⁰Yañön könakönahiñe gölmenji gölmenji miañgö öröyuaiñi pakpak mi nam köl eñgiiga ahuget. Ahugetka nanñak sutñine mala korökmö, gölme ambazipnönj töndup i qahö möt kutum wañgiba tönpin malget. ¹¹Mewö tönpin malgetka nanñi miri gölmenje kaiga könagesourupñan zikzik tököba nesampurek aka andö qem wañgiget. ¹²Mewö aketmö, denike yeñön köl öröm wañgiba qetbuñani möta möt narigeri, yañön mönö körek yeñgöra köna mesari kewö asuhuyök: Nanñak nam köla kukösum eñgiiga ahuañu dölökñi ahuña Anutugö nahönböraturupñi aket. ¹³Anutugö jitsihitñan mönö nam köl eñgiiga asuhuet. Gölme azinönj jit sihitñi wuatangöba anömñambuk keu jöhöiga gölöm ala morö meiga asuhuzawi, yeñön köna mewö miañön Anutugö nahönböraturupñi qahö aket. Mewö.

¹⁴Keu jit yañön azi silebuk aka sutnine anda kaba malök. Mewö maliga aködämunñi uba eka malin. Iwiñan Nahöññi mohok-kungöra aködämunñi pakpak ala aum köl wañgiiga gainñi kun maljawi, yañön mönö miañgö dop kalem möriamñan uruñi kokolak qeiga aködämunñambuk aka nalö dop keu öl töhöññi jiba malök.

¹⁵Jonönj azi miañgö könani nañgöba kewö qeta jiba malök, “Nöñön kungöra keu jiba malali, yañön mönö mia akza. Kewö jiba malal: Nöñgö andöne azi kun kamawi, nöñön qahö asuhubiga yañön mutuk malök. Miañgöra yañgö qetbuñañan mönö ni noñgita öñgöñgöñi akza.” Jon O-melun azinönj mewö jiba malök.

^a 1.6 Mat 3.1; Mak 1.4; Luk 3.1-2

¹⁶Kalem möriamñan azi miangö uruñi kokolak qeiga aködamunñambuk malöhi, yañön mönö miangö dop kötuetköm nenngiba malök. Kötumötuetñi mi nalöni nalöni mokoiga körek nenngö qaknine öngöi malin. ¹⁷Mosesnöñ Köna keunini nam köli asuhuyökmö, Jisös Kraistnöñ keu ölni indel teköba Anutugö kalem möriamñi nam köli aukñe asuhuyök. ¹⁸Gölme azi kunñan Anutu nalö kunöñ qahö ehök. Nahönñi mohok-kunñan Iwigö wösöñe mala kota malöhi, yañön mönö gölmenöñ eta könañi indel nenngii mörin. Mewö.

Jon O-melun azinöñ nanñi könañi jim asariyök.

Mat 3.1-12; Mak 1.1-8; Luk 3.1-18

¹⁹Juda jitñememe yeñön jike nup galöm aka jöwöwöl jikegö welenqece tosatñi Jerusalem sitinöhök melaim enñigetka Jongöreñ kaget. Kaba qesim wañgiba jiget, “Gi wani azia akzan? Könañamgi denöwö?” Mewö jigetka könañamñi indela jii mötket.

²⁰Könañamñi qahö qañ kölökmö, aukñe kewö jim miwikñaiyök, “Nöñön Amötqece Toñi Kraist qahö akzal.”

²¹^bMewö jiiga kapañ köla qesim wañgiget, “Gi mönö azi niñia akzan? Gi Elaija (Elia) akzan me qahö?” Qesim wañgigetka “Qahö!” jiyök. “Gi kezapqetok azi kun akzan me qahö?” Mewö qesigetka “Mewö qahö!” meleñnök.

²²Meleñniga qesiget, “Gi niñia akzan? Melaim nenngigetka kazini, yeñgöra mönö denöwö meleñda jiin mötme? Gi nangi könañi denöwö jim asariman?”

²³“Qesigetka kewö jii mötket,

“Kezapqetok azi Aisaianöñ keu kun kewö jii ahöza, ‘Ni garata aka gölme qararañkölkölñe mala kewö qerakzal: Kembunöñ kamawo!

Miangöra inñi mönö uruñini mindiñgöba könañi mesata möhamgöget.’ Ni miangö kolek garatañi akzal.”

²⁴Azi melaim enñigetka Jongöreñ kageri, mi Farisi (Köna keugö kapañkölköl) azia aket. ²⁵Yeñön kunbuk kewö jiba qesim wañgiget, “Gi Amötqece Toñi Kraist qahö akzan aka Elaija (Elia) me kezapqetok azi yeñgöreñök kun qahö akzani, miangöra mönö wuanöñgöra ambazip o melun mem enñimakzan?”

²⁶Qesim wañgigetka kewö meleñ enñiyök, “Nöñön o töhönöñ enñömirimakzalmö, azi kun inñi qahö möt kutuzei, yañön lök sutñine kinja. ²⁷Azi kun nöñgö andöne kamapköra jiba malali, yañön mönö mi. Yañön kaiga ketañamni aka malma. Miangöra nöñön yañgö kösutñe anda wayangösöñi teñgöba köna esuñangö kösöñi pösatmamgö qötötangömam.”

^b 1.21 Dut 18.15, 18; Mal 4.5 ^c 1.23 Ais 40.3

28 Jonöŋ Jordan o likepŋe miri qetŋi Betani miangöŋeŋ mala ambazip o melun mem eŋgiba malök. Yuai mi mönö miangöŋeŋ asuhuyök. Mewö.

Jonöŋ Jisösgöra “Anutugö lama moröŋi,” jiyök.

29 Mi asuhuiga miri gianjiiga Jonöŋ Jisös tikep kaiga eka jiyök, “Eket, azi mi Anutugöŋeŋ lama moröŋi. Yaŋön mönö gölmeŋi gölmeŋi neŋgö siŋgisöndoknini köl könjörari solanibin. 30 Nöŋön kungöra keu jiba malali, yaŋön mönö mia akza. Kewö jiba malal: Nöŋgö andöne azi kun kamawi, nöŋön qahö asuhubiga yaŋön lök mutuhök malök. Miangöra yaŋgö qetbuŋaŋan mönö ni noŋgita öŋgöŋgöŋi akza. 31 Nöŋön i mutuk qahö möt kutuyalmö, Anutunöŋ könaŋamŋi Israel ambazip neŋgöra indeli mötpingöra mötza. Mi möta ni melaim niŋgiiga kaba o melun mem eŋgimakzal.”

32 Jonöŋ mewö jiba dangunu ewö kinda naŋgöba kewö jiyök, “Uŋa Töröŋan mönö Suepnöhök eta kembö nei ewö yaŋgö nöŋöŋe eta köla tari ehal. 33 Nöŋön i mutuk qahö möt kutuba malalmö, kunöŋ ambazip o melun mem eŋgimangöra melaim niŋgiyöhi, yaŋön kewö jii möral, ‘Uŋa Töröŋan kungö nöŋöŋe eta köla tari ekŋani, yaŋön mönö Uŋa Töröŋi ambazip uruŋine ala melun mem eŋgima.’ 34 Nöŋön mi ehalangöra aka könaŋamŋi kewö naŋgöba jizal, ‘Yaŋön Anutugö Nahönŋi akza.’” Mewö.

Jisösnöŋ gwarekurupŋi mutukŋi eŋgoholök.

35 Mewö jiiga miri gianjiiga Jonöŋ kunbuk o jitŋe miangöŋeŋök aniga gwarekurupŋi yeŋgöŋeŋök yahötŋan yambuk mohotŋe kinget. 36 Kingetka Jisösnöŋ miangöŋeŋ eŋgöŋgita anöhi, i törörök uba ehiba jiyök, “Azi mi ehot. Yaŋön mönö Anutugöŋeŋ lama moröŋi ewö akza.”

37 Mewö jiiga gwarek yahöt yetkön keu mi möta Jisösgö andöŋe anohot. 38 Anohotka Jisösnöŋ lilingöba andöŋe kayohori, i etkeka kewö qesim etkiyök, “Iŋiri niŋja jaruba kazahot?” Mi möta jiyohot, “Ketaŋamniri! Gi miri denike ahöba maljan?” (Juda yeŋön ‘Ketaŋamnini’ keu mi böhiŋgöra jiget.)

39 Mewö jiyohotka meleŋnök, “Mönö kaba ehot!” Mewö meleŋniga wehön möŋaiiga 4 kilok miangö dop ahök. Wehön möŋaiiga miangöŋeŋ mohotŋe anda miri denike ahöba malöhi, mi eket. Mi eka miangöŋeŋ yambuk malohotka miri söŋauba suŋgem aiga mosöta kayohot.

40 Jonöŋ keu jiiga gwarek yahötŋan möta Jisösgö andöŋe anohori, yetköŋeŋök kungö qetŋi Andru, datŋi qetŋi Saimon Pitö. 41 Andru yaŋön mutuk datŋi Saimon miwikŋaiba kewö jii mörök, “Niri Amötqeŋe Toŋi mönö miwikŋaizit.” Amötqeŋe Toŋi mi Grik keunöŋ Kraist. 42 Mewö jiba datŋi waŋgita Jisösgöŋeŋ anohot. Anohotka Jisösnöŋ Saimon törörök uba ehiba jiyök, “Gi Saimon, Jongö nahönŋi akzanmö, nöŋön qetki Sifas qetpi ahöma.”^d Mewö.

^d 1.42 Sifas mi Grik keunöŋ Pitö, nanine keunöŋ köt jamönŋiŋ.

Jisösnöŋ Filip aka Natanael etkoholök.

⁴³Miri gianjiiga Jisösnöŋ Galili prowinsnöŋ anmamgö möta anda kōnanöŋ azi qetŋi Filip miwikŋaiba kewö jii mörök, “Gi mönö ni nuatanŋöba kaman!” ⁴⁴Filipnöŋ Andru aka Pitö yetpuk mirinŋini mohok. Taonŋini qetŋi Betsaida.

⁴⁵Filipnöŋ azi qetŋi Natanael miwikŋaiba kewö jii mörök, “Mosesnöŋ azi kungöra Kōna keunöŋ ohoba kezapqetok yeŋön toroqeba ohoget ahözawi, nini mönö azi mia miwikŋaizin. Azi mi qetŋi Jisös, iwiŋi qetŋi Josef, mirinŋi qetŋi Nazaret.”

⁴⁶Natanaelnöŋ mi möta welipköba jiyök, “O Nazaret! Mi miri qandakŋa. Yuai ölpöŋi kun mönö miangöreŋök asuhumawangö dop qahö.” Mewö jiiga Filipnöŋ jii mörök, “Mönö kaba nangak ek kutuman!”

⁴⁷Mewö jii möta Jisösgöreŋ kaba asuhuiga eka yangöra keu kewö jiyök, “Eket! Azi kianŋön mönö Israel azi ölni akza. Uruŋe muney geŋmoŋi kun qahö.”

⁴⁸Mewö jiiga Natanaelnöŋ qesim wangiba jiyök, “Gi mönö denöwö aka ni möt kutum ningizan?” Mewö jiiga Jisösnöŋ melenŋa jiyök, “Gi fig ip^e kōnaŋe tatnöŋga gek kutuyal. Mutuk gek kutubiga Filipnöŋ miangö bapŋe geka goholök.”

⁴⁹Mewö jiiga Natanaelnöŋ melenŋa jii mörök, “O Ketaŋamni, gi mönö ölna Anutugö Nahönŋi akzan. Gi Israel neŋgöreŋ azi Kembuya maljan!”

⁵⁰Mewö jiiga Jisösnöŋ melenŋa jiyök, “Ni mutuk kewö jizal, ‘Gi fig kōnaŋe tatnöŋga gek kutuyal.’ Mewö jim miwikŋaizalanŋöra ölpö möt narim ningizan. Anutugöreŋ kukösum ki eka mötzani, mi mönö yuai kötoŋdökŋi akza. Ölni ketaŋi mi mönö bian eka möta malman.”

⁵¹^fMewö jiba toroqeba jii mörök, “Nöŋön keu ölni töhönŋi kun kewö jibi mötnöŋ: Kōnaŋep nöŋgö gwarekurupni aketka kutum eŋguasöriŋa imut kewö ekŋe: Suep naŋgunöŋ taliga Anutugö garataurupŋan asuhuba Suep gölmegö Azi Ölni yambuk nariba yangöreŋ eta öŋgöba aketka eŋgekŋe.” Mewö.

Jisösnöŋ o mem letoriga wain ahök.

2 ¹Jisösnöŋ Filip aka Natanael etkoholiga silimŋi karöbut teköi malgetka kunöŋ ambi memegö maren lömbuaŋ ali tokoget. Mi Galili prowinsgö miri qetŋi Kana miangöreŋ alget. Jisösgö namŋan miangöreŋ mohotŋe ani malget. ²Jisös aka yangö gwarekurupŋi mi mewöyök öröm eŋgigetka lömbuaŋnöŋ mohotŋe malget. ³Miangöreŋ malgetka wain onöŋ qahöwahiga Jisös namŋan nahönŋaŋöra jiyök, “Yeŋgöreŋ wain o qahöwakza.”

^e 1.48 Fig mi sambu ewöya. Mi nupŋine kömötketka köŋi nahönŋambuk asuhuiga mi nalö gwötpuk nezema. ^f 1.51 Jen 28.12

⁴Mewö jiiga kewö jii mörök, “Namni, mi denöwö akñamgöra jizan? Jim kutum niñgizan me? Nöngö aŋgöletot meme nalönan mönö qahö kam kuŋguiga maljal.”

⁵Mewö jii möta welenqeqe yeŋgöra kewö jiyök, “Yañön yuai kungöra jim kutum eŋgimawi, mi iñini ölop akñe.”

⁶Juda yeñön amöt qem aŋgubingöra Kona keuñini wuatañgöba böröñini saŋgoñmaljema. Miangö dop miri miangöreñ köurañen ketanji 6 tarök. Köurañen mohot mohot mi o gina 8 me 12 mianñon geba kokolak qenahanğö dopñan tatket.

⁷Jisösnöñ mi eka kewö jii mötket, “Iñini mönö o uba kaba mokogetka köurañen ki kokolak qeget.” Mewö jii möta jiyöhanğö dop aket.

⁸Köurañen mi kokolak qegetka kewö jim kutum eŋgiyök, “Mönö o qakñi tosatñi uba anda lömbuañ galöm wañgime.” Jim kutum eŋgiiga memba anget.

⁹Uba angetmö, galömnöñ o letota wain ahöhi, mi nempa möta denikeyök memba kageri, mi qahö möt asariba auruyök. Auruyökmö, welenqeqenöñ o ugeri, yeñön mi möta jigetka galömnöñ maren toñi oholi kayök. ¹⁰Kaiga kewö jii mörök, “Maren nalöñe körek pakpak yeñön wain o ölopñi mi mutuk memba kaba eŋgimakze aka mi nempa eñololon aketkun wain o nahömñi qahö mi könangep eŋgimakze. Göñön wain o ölopñi mi mutuk aŋgön köla qahö eŋgiba dölki nalö oŋgita memba kazan. Mi silik murutñi kun akzan.”

¹¹Jisösnöñ aŋgöletot mutukñi ki mi Galili prowinsgö miri qetñi Kana miangöreñ meyök. Mi memba mewö mianñon kukösumñi indeliga asuhuyök. Mi asuhuiga gwarekurupñan möt narim wañgiget.

¹²^gKözölömbuaññöñ malget teköiga Jisös, yaŋgö nam-munñi aka gwarekurupñi yeñön miriñine Kaperneam anget. Miangöreñ anda sömañ tosatñi toroqeba malget. Mewö.

Jisösnöñ jöwöwöl jike jim kömbuhiyök.

Mat 21.12-13; Mak 11.15-17; Luk 19.45-46

¹³^hNalö miangöreñ Juda neŋgöreñ ak-kömükömu kendon nalöñan dopdowiyök. Anutunöñ mönöwök neŋgehoriba neŋgoŋgiröhi,ⁱ miangöra söñgaibingö aketka Jisösnöñ mewöyök miriñi mosöta Jerusalem sitinöñ öngöyök. ¹⁴Sitinöñ öngöba jöwöwöl jikegö tohoñ uruñe anda yuai kewö miwikñaiyök: Ambazip bulmakau aziñi, lama aka kembö nei mi bohonñi memegöra alget aka tosatñan moneñ utekutek albingöra tatkeri, mi eŋgehök.

^g 2.12 Mat 4.13 ^h 2.13 Eks 12.1-27 ⁱ 2.13 Anutunöñ Ijpt miangöreñ Israel ambazip neŋgehoriba neŋgoŋgirök, miangö sösongaiñi mi Nei keunöñ Pasowa. Eksodus, Mekömekö 12.15

¹⁵Mi engeka kösönöj tapep (munḡamunḡa) mönjönḡa mianön enḡohotiriba enḡuyök. Enḡuba ambazip mi körek közöl enḡiba lama bulmakaunḡambuk jöwöwöl jikenöhök enḡuatangöyök. Utekutek ambazip yengö souje kötḡini metaliga mokoba eriga tebolḡini metali anget. ¹⁶Kembö bohönḡini memegöra algeri, ambazip mi kewö jim enḡiyök, “Yuai mi mönö memba kesala yaigep anget. Inḡini nöḡgö Iwinangö jöwöwöl jikenḡi ki mönö wuanönḡöra utekögetka kölköl-örörö miri ewö akza?”

¹⁷Mewö jiiga Buḡa keu kun gwarek yengö mötmötḡine kanḡoriga mötmöriget. Keu mi kewö ohoget ahöza, “Nöḡgö urunan göhörej jike mi kömbukḡi ahömapköra kapaḡ kölbiga mianön urune newaḡ könöp ewö jeiga waimanjat mianön kawöl miwikḡaimakzal.”

¹⁸Mi közöl enḡiiga Juda jitḡememe yeḡön tembula wahöta Jisösgöreḡ kanḡota kewö qesim waḡiget, “Gi mönö wani angöletot kun aknöḡga kukösümgi ehinga dop köl nenḡiigun kimbi mewöḡi akanak?”

¹⁹^kMewö qesim waḡigetka kewö meleḡ enḡiyök, “Inḡini jöwöwöl jike ki köndenḡetka gölmenöḡ eriga nöḡön mi wehön karöbutkö uruḡe memba wahöta kuḡumam.”

²⁰Meleḡ enḡiiga kewö jiget, “Yambu (yara) 46:gö uruḡe jöwöwöl jike ki memba mala mem tekögetka asuḡuba kinḡa aiga göḡön mi wehön karöbutkö uruḡe mönö denöwö aka memba wahöta kuḡgubanak?”

²¹Mewö jigetmö, Jisösönḡ jikegö keu mi nanḡi sileḡangö söpsöpḡa ala jiyök. ²²Jisösönḡ könangep kömupnööhök wahöriga söpsöp keu jiyöhi, mi nalö miaḡgöreḡ gwarekurupḡi yengö mötmötḡine kanḡori ölop möt asariget. Mi mötmöriba Jisösönḡ keu jiyöhi, mi aka Buḡa keu ohogeri, mi pakpak möt nariget. Mewö.

Jisösönḡ ambazip könangamni möt teköza.

²³Jisösönḡ Jerusalem sitinöḡ ak-kömukömu kendongö nalöḡe mala angöletot kukösümḡambuk meyöhi, mi ambazip gwötḡukḡan eka qetḡi möt nariba yaḡgöreḡ lapingöget. ²⁴Lapingögetmö, Jisösönḡ ambazip pakpak yengö könangamḡini möt kutum teköyök. Mewögöra ambazip pakpak qahö möt narim teköm enḡiba keuḡinaḡgö bapḡe qahö anda malök. ²⁵Ambazip uruḡine keu yuai ahöyöhi, Jisösönḡ kuḡḡan ambazip uruḡinaḡgö könangḡi mi indela kondel waḡḡimawaḡgö dop qahö ahök. Mönö nanḡak mi ölop möt kutum teköyök. Mewö

Jisösönḡ Nikodemus urumeleḡgö könangḡi kusum waḡḡiyök.

3 ¹Juda könagesögö jike kaunsöl sutḡine jitḡememe azi kun qetḡi Nikodemus malök. Yaḡön Farisi (Köna keugö kapaḡkölköl)

^j 2.17 Sum 69.9 ^k 2.19 Mat 26.61; 27.40; Mak 14.58; 15.29

kambunöŋ kinök. ²Yaŋön suŋgem kunöŋ Jisösgöreŋ kaŋgota kewö jii mörök, “Ketaŋamni, gi aŋgöletot memakzani, mi azi kunŋan Anutu yambuk qahö kiniga nanŋök memamgö osimakza. Mianŋöra gi Anutunöŋ nam köl gihiiga böhi akzan, mewö mötzin.”

³Mewö jiiga kewö jiba meleş waŋgiyök, “Nöŋön keu öl töhöŋŋi kun kewö jibi mötnöŋ: Kunŋan Anutugöreŋök ahuahu dölökŋi qahö ahuma ewö, yaŋön mönö Anutugö bemtohoŋe aŋgota ekŋamgö osima.”

⁴Meleş waŋgiiga kewö jiyök, “Kunŋan lök ahuha ambazip namŋi aka malagun ahuahu dölökŋi mönö denöwö ahubawak? Yaŋön mönö nam körö uruŋe aŋgori kunbuk gölöm ala memamgö osima.”

⁵Mewö jiiga kewö meleŋnök, “Nöŋön keu öl töhöŋŋi kun kewö jibi mötnöŋ: Kunŋan o melun mem waŋgigetka Uŋa Töröŋan uruŋe geiga mewöŋi mianŋön ahuahu dölökŋe qahö ahuza ewö, mewöŋi mianŋön mönö Anutugö bemtohoŋ uruŋe aŋgotmamgö osima. ⁶Gölmegö iwinam eŋgöreŋök morö ahuzawi, mi gölme moröya. Uŋa Töröŋan inahöba nam köliga morö asuhumakzawi, mi mönö Suepkö moröya.

⁷“Mewögöra iŋini ahuahu dölökŋi Anutugöreŋök qahö ahume, mianŋön mönö qahö dop kölja. Keu mi jibiga mianŋöra mönö kude auruman. ⁸Luhutnöŋ nanŋi imbi-imbi laŋ giliga ötöŋi mörakzanmö, mi denikeyök kaba gilakza aka denike gila anakzawi, gi mianŋö könaŋi qahö möt asarizan. Uŋa Töröŋan ambazip nam köl eŋgiiga ahuahu dölökŋe ahugeri, körek yeŋgö könaŋinan mönö luhut mianŋö dop akza.”

⁹Mewö meleŋniga Nikodemusnöŋ köŋkuŋ aka kewö jiyök, “Mi ahakö dop qahö.”

¹⁰Mewö jiiga Jisösnöŋ jiyök, “Gi Israel könagesö kusum neŋgimakzan aka töndup keu mianŋö könaŋi qahö möt asarizan. Mi kude dop kölja.

¹¹Nöŋön keu öl töhöŋŋi kun kewö jibi mötnöŋ: Neŋön wania möt kutuzini, mi jiba indelakzin aka wania jeninan eka mötzini, mi nanŋöba jimakzin. Mewö ahakzinmö, eŋön töndup Buŋa keunini mi qahö möt aŋgön kölakze.

¹²“Gölmegö yuaiŋi jenöŋ ehekŋi mianŋö keuŋi jibiga möta qahö möt narim niŋgize ewö, nöŋön Suepkö yuaiŋi qahö ehekŋi mianŋö könaŋi jibiga mötmei, mi mönö denöwö möt naribeak? ¹³Gölmegö azi kunŋan Suepnöŋ qahö öŋgöyökmö, Suep gölmegö Azi ölnan Suep mire mala eta asuhuyöhi, yaŋön mönö liliŋöba Suepnöŋ öŋgöma.

¹⁴¹⁴“Anutunöŋ Moses gölme qararaŋkölkölŋe jim kutui kopö ainöŋ mokoleŋ imutŋi memba tohotnöŋ kösököi kinöhi, mianŋö dop Suep gölmegö Azi Ölni mi kösökögetka öŋgöba kinma. ¹⁵Ambazip i möt narim waŋgizei, yeŋön körek pakpak malmal köhöikŋi miwikŋaiba malmegöra aka eu öŋgöma.

¹ 3.14 Jan 21.9

¹⁶“Miangö könäji kewö: Ambazip i möt narim waŋgizei, yeŋgöreŋök kunŋan ayuhubapuköra Anutunöŋ gölme dop önöŋi qahö jöpaköm neŋgiyök. Neŋön körek letota malmal köhöikŋaŋgö buŋaya akingöra mönö Nahönŋi mohotsirik mi neŋgiyök. ¹⁷Ambazip gölme dop mal anjini, Anutunöŋ Nahönŋi neŋgö keunini jim tekömapköra aka qahöpmö, Nahönŋan amöt neŋguiga kantri dop letota oyaenŋkoyaen akingöra aka melaiiga gölmenöŋ erök.

¹⁸“Ambazip kunŋan Nahönŋi möt narizawi, Anutunöŋ yaŋgö keuŋi jim teköiga qahö ayuhumapmö, kunŋan Jisös qahö möt narim waŋgizawi, Anutunöŋ yaŋgö keuŋi lök jim teköiga malja. Anutugö Nahönŋi mohotsirikö qetŋi qahö möt narizawaŋgöra aka könöp siagö buŋaya akŋa. ¹⁹Anutunöŋ gölme ambazip keunini jim tekömakzawi, miangö könäji kewö: Asakŋan lök gölmenöŋ eta asuhuyökmö, ambazipnöŋ ahakmeme bölöŋi bölöŋi aka memba malget. Mewö mala Anutugö asakŋi tököba uruŋini söŋaupkö ahakmemenöŋ laŋ jöhöba mala kotket.

²⁰“Körek pakpak ahakmeme bölöŋi ahakzei, yeŋön Anutugö asakŋi tököba andö qemakze. Anutunöŋ ahakmemeŋini bölöŋi bölöŋi mi indela jim eŋgiiga gamuŋini mötpepuköra keŋgötŋini mörakze. Mi möta asakŋaŋgö uruŋe qahö aŋgorakze. ²¹Qahö aŋgorakzemö, kunŋan kun keu öŋi wuatangöba maljawi, yaŋön ölop asakŋaŋgö uruŋe kaŋgotma. Anutunöŋ sölölohöm waŋgiiga ahakmemeŋi aka memba malöhi, miangöra ahakmemeŋi miangön aukŋe asuhumapköra mötza.” Mewö.

Jon O-melun azinöŋ Jisösgö könäji jim miwikŋaiyök.

²²Jisösnöŋ mewö jim teköba kinda gwarekurupŋi eŋguangita Jerusalem siti mosöta Judia prowinsgö miri andöŋe anget. Miangöreŋ anda gwarekurupŋi yembuk sonda tosatŋi toroqeba yembuk mala ambazip o melun mem eŋgiba malök. ²³Jisösnöŋ mewö malökmö, Jonöŋ mewöyök miri qetŋi Salim miangö kösutŋe malök. Miri qetŋi Ainon miangöreŋ o jök ahöyök aka ambazipnöŋ Jongöreŋ kaŋgota o melun mem eŋgimapkö qesigetka amqeba mem eŋgiba malök. ²⁴^mNalö miangöreŋ Jon mi kösö mire qahö algetka tarök.

²⁵Juda yeŋön amöt qem aŋgubingöra böröŋini saŋoŋmaljema. Mewögöra Jongö gwarekurupŋi yeŋön Juda azi kunbuk keu miangö goranora aka könahiba jitnakölik jiget. ²⁶Mewö jigetka lömböriiga Jongöreŋ kaba kewö jiget mörök, “Ketaŋamnini mötnöŋ, azi Jordan o likepŋe göbuk maliga nangak könaŋamŋi naŋgöba jinöŋi, yaŋön ambazip o melun mem eŋgiiga jesöŋgöŋan mönö yaŋgöreŋ anakze.”

²⁷Jonöŋ mi möta kewö meleŋnök, “Anutunöŋ azi kungöra yuai kun Suepnöhök qahö al waŋgibawak ewö, yaŋön mönö mi buŋa qem

^m 3.24 Mat 14.3; Mak 6.17; Luk 3.19-20

anğumamgö osiza. ²⁸Yambuk mala kewö jial, ‘Ni Amötqeqe Tonji Kraist qahö akzalmö, Anutunöŋ melaim niŋgiiga mutuk kazala yaŋön andöne kama.’ Nöŋön keu mi jiali, injini mi ölop nanŋinak nanğöba jiba malbeaŋgö dop akze. ²⁹Miaŋgö keuŋi dop ala kewö jimam: Azi kunŋan ambi buŋaŋambuk aka ambi memamgöra sösöŋgai keu jim sehiba malja. Mewö maliga azi alaŋan kösutŋe kinda sösöŋgai keuŋaŋgö jölŋi möta yaŋgöra önöŋi qahö söŋgaimakza. Miaŋgö dop nöŋön Jisösögö alaŋi aka yaŋgöra söŋgaibiga sösöŋgai miaŋön dölkö uruni kokolak qeiga maljal. ³⁰Jisösögö qetbuŋaŋan qarim sehiiga nöŋgöreŋan mönö waziiga dop kölma.” Mewö.

Jisösnöŋ Suepnöhök eröhaŋgö könaŋi jiyök.

³¹“Daŋön euyaŋgöreŋök eröhi, yaŋön ambazip körek pakpak eŋgoŋgita öŋgöŋgöŋi akza. Kunŋan gölmenöŋ asuha gölmegö buŋaya akza aka gölmenöŋ malmalgö keuŋi jimakza. Suepnöhök eta kayöhaŋön mönö körek pakpak eŋgoŋgita öŋgöŋgöŋi akza. ³²Yaŋön yuai eka möt kutuba malöhi, miaŋgö könaŋi jiba nanğöba dangunu ewö kinja. Mewö kinjapmö, nanğönaŋgö keuŋi mi ambazip kunŋan kun qahö möt aŋgön kölja.

³³“Ambazip kunŋan nanğönaŋgö keuŋi möt aŋgön köljawi, yaŋön Anutu ölbölŋi akzawaŋgö keuŋi mem köhöiiga pöwöwömŋi akŋa. ³⁴Anutunöŋ kolek aziŋi melaiba Uŋaŋi Töröŋi musa qakŋe qahöpmö, keleŋmaleleŋ waŋgimakza. Miaŋgöra kolek aziŋan mönö Anutugö keu töhöŋŋi indela jimakza. ³⁵°Iwinöŋ Nahönŋi uruŋan jöpaköm waŋgimakzawaŋgöra aka yuai pakpak buŋa qem waŋgiba böröŋe ali ahöza.

³⁶“Ambazip kunŋan Nahönŋi möt nariba uruŋi melenjawi, yaŋön mönö kunbuk letota malmal köhöikŋaŋgö buŋaya akza. Kunŋan Nahönŋaŋgö keuŋi qahö tem kölakzawi, Anutugö irimsesewölŋan mönö yaŋgö qakŋe öŋgöba pöndaŋ kini malmal köhöikŋaŋgö könaŋi qahö ek kutuba önewat laŋ malja.” Mewö

Jisösnöŋ Samaria ambi kunbuk keu eraum mörohot.

4 ¹Jisösnöŋ mewö ambazip kusum eŋgiiga gwarekurupŋi aketka o melun mem eŋgiba mewö miaŋön Jon O-melun azi luhut ala malöhi, keu mi Farisi (Köna keugö kapaŋkölköl) yengö kezapŋine gei mötket. Yeŋön mi mötkeri, buzup mi jiget sehiba Kembugö kezapŋe gei mörök. ²Jisösnöŋ nanŋak ambazip qahö o melun eŋgiyökmö, yaŋön jiiga gwarekurupŋan mi aket. ³Mi möta Judia prowins mosöta lilingöba kunbuk Galili prowinsnöŋ göröken anget. ⁴Köna mewö anda Samaria prowins oŋgita anget.

ⁿ 3.28 Jon 1.20 ° 3.35 Mat 11.27; Luk 10.22

⁵POnḡita anda Samaria prowinsgö taonni kun qetnji Sikar miangörej anḡorök. Sikar taon mi Jeikobnön ḡölme bahöni kun nahönni Josef waḡiyöhi, miangö kösutnje ahöza. ⁶Jeikobkö o lömni diginḡambuk mi Sikar taonön ahöza. Jisösnön köna kayöhanḡöra aka silenji lömböriiga silim bibiḡe o lömni miangörej anḡota kösutnje eta tarök.

⁷O löm kösutnje tariga Samaria ambi kunön o umamḡö kayök. Kaiga Jisösnön eka kewö jii mörök, “Gi ölop o niḡinönḡa nembilenḡak.” ⁸Nalö miangörej gwarekurupḡan nene bohonni memingöra i mosöta taonön angetka nanḡirök kinohot.

⁹Juda ambazipnön Samaria prowins qepureim enḡiba yembuk köisirik qahö maljema aka pake mohot miangön o qahö uzema. Mewögöra nanḡirök kinohot miangörej ambinön kewö jii mörök, “Gi Juda azia aiga ni Samaria ambiapmö, denöwögöra ‘O niḡinönḡa nembilenḡak,’ jiba qesim niḡizan?”

¹⁰Jisösnön qeqesi mi möta kewö melej waḡiyök, “Gi Anutu kalemḡanḡö könaḡi möt kutunönḡa dop kölbawak. Daḡön ‘O niḡinönḡa nembilenḡak,’ jiba qesim gihizawi, waḡḡö könaḡi möt asaribanak ewö, i mönö qesinönḡa malmalgö onḡi gihibawak.”

¹¹Mewö jiiga kewö jii mörök, “O ketaḡamni, o umamḡö pakegi kun qahö ahöza aka o löm kiaḡön mönö diginḡambuk akza. Miangöra malmalgö ogöra jizani, mi mönö denikeyök miwikḡainönḡa ahubawak? ¹²Isik bömönini Jeikob waḡön o lömni ki neḡiyök. Waḡön mutuk nanḡak aka waḡḡö andöḡe nahönurupḡan ki kaba o uba nempa maljema aka bulmakau kambuḡi kambuḡi o enḡigetka nempa maljema. Gi Jeikob onḡita öḡḡöḡḡöni aka ambazip o mem sehim enḡimamḡö jizan me?”

¹³Mi möta Jisösnön kewö meleḡnök, “Ambazip körekḡan o ki nembagun mönö kunbuk ogö kömumba nemingö mörakḡe. ¹⁴Mewö malmemö, nöḡön kungöra o waḡimami, waḡön mi nembagun nalö kunön ogö kunbuk qahö kömuma. Mewö qahöpmö, o waḡimami, mi mönö waḡḡö uruḡe letota malmalgö o jeḡi jöpjöpköni qahö aiga malma. Mewö mali mönö uzumḡöba malmal köhöikḡi teteköni qahö waḡimakḡa.”

¹⁵Mewö meleḡniga ambinön jiyök, “O ketaḡamni, gi mönö o mia niḡinönḡa nemi. Mi nembagun nalöni nalöni kunbuk ogö qahö kömumbilenḡak aka o umamḡöra ki könasöksök qahö tibilenḡak.”

¹⁶Mi jiiga kewö jim kutum waḡiyök, “Gi mönö anda apki waḡgita ki kamahot.”

¹⁷Mewö jim kutum waḡgiiga “Ni apni qahö,” jiba meleḡnök. Meleḡniga kewö jii mörök, “Gi ‘Apni qahö,’ keu mi törörök jizan. ¹⁸Gi ölḡa azi 5 enḡömemba malnön aka merak kun memba maljani, waḡön mönö ḡöhö apki qahö akza. Keu jizani, mi öl töhöḡḡa.”

^p 4.5 Jen 33.19; Jos 24.32 ^q 4.9 Esra 4.1-5; Neh 4.1-2

¹⁹Ambinön mi möta kewö jii mörök, “Ketañamni, gi mönö kezapqetok azi qainji kun akzan. Nönjön tandöki mewö gek kutum gihizal. ²⁰Neñgö ambösakonurupninan kundunji kondela kianğoreñ öngöba sipköba köuluköba malgetmö, Juda enjön kewö jimakze, ‘Samaria enjön mönö Jerusalem sitinön öngöba jöwöwöl jikenön sipköba köulukögetka dop kölja.’ ”

²¹Mi möta Jisösnön kewö jim kutuyök, “O ambi, nalö kun kam kuñguma. Injini nalö miangöreñ Iwi waikñi memba möpöseibingöra kundunji kianğoreñ me Jerusalem miangöreñ qahö öngöba malme. Gi keu mi ölop möt narinönga dop kölma. ²²Samaria injini Anutugö könani törörök qahö möt kutuba töndup yanğö waikñi lañ memba möpöseimakze. Amötqeqegö könani mi Juda neñgö sutnine aukñe asuhuba ahöza. Miangöra Juda neñgö Anutuninañgö könani möt kutuba waikñi memba möpöseininga dop kölja.

²³“Töndup nalö kun kewö asuhuma: Nalö miangöreñ Uña Töröñan ambazip sölölohöba inahöm enğiiga keu ölnji wuatangöba Iwi waikñi memba ölnja möpöseiba malme. Iwininan ambazip mewöñi jarum enğiba asuhumegöra sihimñi möta malja. Nalö murutñi miangön mönö lök kam kuñguba dölkü ahöza. ²⁴Anutunön Uñaya akza. Miangöra Uña miangö waikñi memba möpöseimakzei, yeñön mönö Uña Töröñan sölölohöba inahöm enğiiga keu ölnji wuatangöba möpöseiba malme.”

²⁵Jisösnön mewö jim kutuiga ambinön jii mörök, “Amötqeqe Toñi qetñi Kraist qetzei, yanğön kamamgö akza, mi mötzal. Yanğön kamawi, nalö miangöreñ mönö keu pakpak indel neñğiiga mötpin.”

²⁶Jisösnön keu mi möta könani kewö indelök, “Göbuk ki kinda keu eraum mötziri, nönjön mönö mia akzal.” Mewö.

Gwarek yeñön kaba yetpuk toroqet.

²⁷Könañamñi indeliga gwarek yeñön miangöreñök lilingöba kaget. Kaba ambibuk eraum mörohot, mi eka welipkögetmö, kunön kewö qahö qesiyök, “Gi denöwögöra yambuk keukeu jizahot?” me “Wanigöra ak gihiza?” Mewö qesibingö mötketmö, körekñan ölöñ tatket.

²⁸Ölöñ tatketka ambinön o pakenji mosöta taonön anda ambazip yeñgöra kewö indela jii mötket, ²⁹“Mötket! Nönjön azi kun miwikñaibiga yuai pakpak aka malali, miangö könani indela jii mötzal. Miangöra yanğön mönö Amötqeqe Toñi Kraist akapuk. Mönö nanñinak kaba azi mi ekñe.” ³⁰Keu mi möta taon mosöta öröba Jisösgöreñ anget.

³¹Gwarek yeñön nalö sutñe miangöreñ Jisös qesim wañgiba kewö jiget, “Ketañamnini, ölop nene nenöñ.”

³²Mewö jigetmö, kewö jiyök, “Nönjön neneñamni qainji kun memba maljali, injini miangö könani qahö möt kutuze. Qahö!”

³³Mi möta nanñini qesim añguba kewö jiget, “Kunñan nene kun memba kaba wañgiza me denöwö?”

³⁴Mewö jigetka kewö jii mötket, “Melaim niŋgiiga kayali, nõjõn yaŋgö jiti tem kõla nupni mem sorokõmakzali, miajõn mõnõ nõjõgõ nenejamni akza. ³⁵Ijini keu kewö jibepuk, ‘Kõij 4 kunbuk ahõiga õlõm-izi-izi nalõjan tõrima.’ Mötket, nõjõn miangõra kewö jizala kezap alget: Nup boni ketani miejõgõ õljinan lõk õliiga meme nalõjanan kam kunguza. Ijini mõnõ jejini uget aniga mi urujine ek kutume. ³⁶Tosatjan mutuk keu kõtji qesijda gila malgetka õljan nalõ kewõje asuhuiga tosatjan mi lõk tokoba tõwanini megetka ambazipni ambazipni malmal kõhõikjajõgõ bujaya ahakze. Mewö asuhuiga õlji meme yejõn qesij gilgil ambazip yembuk mindiriba mohotje sõjgaiba simbawõj mõtze. ³⁷‘Kunõj kõtji qesij giliga kunõj õlji mezawi,’ keu mewö jimakzei, mi keu õlja. Mi Anutugõ nup memegõ kõnaji indelja. ³⁸Nõjõn ijini melaim engibiga nup qainji kunõj nanjinak yuai kõtji qahõ kõmõtteri, mõnõ nup miangõreŋ anda õlji meme. Tosatjan mutuk silenini qeba nup memba malgetka eŋõn yejõgõ kõnanine anda nup megerajõgõ õlji miwikjaiba memakje. Mewö melaim engizal.” Mewö

Samaria ambazip gwõtjukjan urujini melenjet.

³⁹Samaria ambinõj keu kewö naŋgõba jiyõk, “Nõjõn azi kun miwikjaibiga yuai pakpak aka malali, yaŋõn mõnõ miangõ kõnaji indela jii mõtzal.” Mewö jiyõhanjõra Samaria ambazip gwõtjukjan Sikar taon miangõreŋ urujini melenja Jisõs mõt narim waŋgiget. ⁴⁰Mõt narim waŋgiba yaŋgõreŋ kaba yembuk toroqeba malmapkõra kapaŋ kõla qesigetka silim yahõtkõ dop toroqeba miangõreŋ malõk.

⁴¹Mewö mala keu jiba malõhanjõra aka gwõtjukjan Jisõs mõt nariba toroqem waŋgigetka kambujini qariyõk. ⁴²Toroqem waŋgiba ambigõra kewö jiget, “Azi kianõn õlja gõlmeŋi gõlmeŋi neŋgõreŋ Amõtqeŋ Tonina akza. Nejõn mi gõhõ keugõrõk qahõ toroqeba mõt narizinmõ, mi naninak kezap ala mõta mõt kutuzin.” Mewö.

Jisõsnõj jembon azi kungõ nahõnji mem õlõwahõk.

⁴³Jisõsnõj Samaria maliga silim yahõt tekõiga engõmosõta Galili prowinsnõj anõk. ⁴⁴^rJisõsnõj nanjak nalõ kunõj keu kun kewö naŋgõba jiyõk, “Kezapqetok ambazip kunjan nanje miri gõlmeŋõj maliga yaŋgõra qahõ mõtket õjgõiga gõda qahõ qem waŋgimakze.”

⁴⁵^sMewö jiyõkmõ, tõndup nalõ miangõreŋ nanje Galili prowinsnõj kaŋgoriga miangõreŋ mewõyõk tosatjan jõlõni jiget. Yejõn ak-kõmukõmu kendõgõra Jerusalem sitinõj õjgõba Jisõsnõj kendõn nalõje aŋgõletot meyõhi, mi pakpak eka mõtket. Miangõra nalõ miangõreŋ õlõp kõl õrõm waŋgiget.

^r 4.44 Mat 13.57; Mak 6.4; Luk 4.24 ^s 4.45 Jon 2.23

46^t Galili prowins yejön köl öröm wanġigetka miri qetņi Kana mutuk o meiga letota wain ahöhi, miangörej kunbuk kayök. Taon qetņi Kaperneam miangörej kiņ kembugö jembonņi kun malök. Yanġö nahönņan kawöl yöhöiga ahöyök.

47 Ahöba kömumangö ahök. Miangöra Jisösnöņ Judia prowins mosöta Galili uruņe kayöhi, yanġön miangö buzupņi möta Jisösgöreņ anda kewö qesim wanġiyök, “Gi ölop kaba nahöni mem ölowak wanġiman.” 48 Qesim wanġiiga kewö jii mörök, “Inņi ni öne qahö möt narim niņgimeangö dop akzei, mi qahö dop kölja. Nöņön anġöletot aiwesök membi ekagun mönö amqeba ni möt narim niņgiba uruņini melenbeak.”

49 Mewö jii mörökmö, jembonöņ kewö jiyök, “Ketanamni, nahönan kömumbapuköra mönö ösumok kaman.”

50 Mewö jiiga melen wanġiyök, “Nahöngan mönö ölowaka malma. Miangöra mönö ölop lilingöba anman.” Mewö melen wanġiiga yanġön mi möt nariba lilingöba anök. 51 Anda könanöņ maliga welenqequeurupņan kaba miwikjaiba kewö jiget mörök, “Nahöngan lök ölowaka malja.”

52 Mi möta qesim enġiba jiyök, “Wani nalönöņ könahiba ölowahök?” Mewö jiiga jiget mörök, “Uran mare wan kilok miangörej sile könöpņi mosörök.” 53 Mi möta mötmötņi kewö ahuba asariyök: Aha! Jisösnöņ “Nahöngan mönö ölowaka malma,” jiyöhi, mönö aua miangörejök ölowahök. Keu mi möt asariba i aka saiwaurupņi pakpak yejön uruņini melenġa Jisös möt narim wanġiget.

54 Jisösnöņ Judia mosöta Galili prowins uruņe kaba anġöletot kun ki meiga yahöt ahök. Mewö.

Jisösnöņ Betesda o anġö jitņe azi kun mem ölowahök.

5 1 Könanġep nalö kunöņ Juda yeņġö kendon ketaņi kun töriiga Jisösnöņ Jerusalem sitinöņ öņġöyök. 2 Jerusalem sitigö selnöņ nanġu kun mi lama yeņġöra ahöyök. Miangö kösutņe o anġö kun qetņi Hibru keunöņ Betesda qetkeri, mi ahöyök. Miangö ġöraņe luhut miri köröpņi ketaņi 5 tatket. 3 Luhut miri 5 miangö uruņe kawöl ambazip kambu ketaņi ahözema. Tosatņan jeņini gömölii tatket. Tosatņan simalokon aka tatket. Tosatņan likeņņini kömukömuņa tatket. 4

4 Nalö tosatņe Kembugöreņ garata kunöņ eta o anġönöņ timjaliiga unduzapma. Onöņ unduiga nalö miangöreņök kunņan mutuk anġönöņ geiga kawölņi mi me mi mi anġön ölowahakzapma. Miangöra mamböta tatket. 5 Miangöreņ azi kun yambu (yara) 38 miangö dop kawöl yöhöiga ahömalök. 6 Miangöreņ ahöiga Jisösnöņ kanġota eka lök nalö köröp

^t 4.46 Jon 2.1-11 ^u 5.3 Mötmöt ambazip tosatņan kewö mötmörimakze: Könakönahije jabö 3:gö kitipņi teteköņi aka jabö 4 mi kewö ohoget ahöyök: Yejön o anġönöņ ġwözöņġa undumapkö mamböta tatzema.

tiŋtiŋi kawöl yöhöi ahöba malöhi, mi möta kewö qesim waŋgiyök, “Gi ölöwakŋangö ak gihiza me qahö?”

⁷Qesim waŋgiiga kewö meleş waŋgiyök, “O Kembu, onöŋ unduba ötöŋ qeiga alani daŋön noaŋgita o aŋgönöŋ anda al niŋgibawak? Alani mewöŋi kun qahö malja. Nanak anmamgö möta esapköba malali, nalö miaŋgöreŋök tosatŋi yeŋgöreŋök kunöŋ ni noŋgita anda gemalget.”

⁸Meleş waŋgiiga Jisösnöŋ jii mörök, “Gi mönö wahöta tumbulahöpki memba anöŋ.” ⁹Mewö jii möta miaŋgöreŋök ölöwaka tumbulahöpŋi memba anök. Anökmö, yuai mi Sabat kendonöŋ asuhuyök. ¹⁰“Miaŋgöra Juda yeŋön azi ölöwahöhi, yaŋgöra kewö jiget mörök, “Merak Sabat kendon akza. Miaŋgöra tumbulahöpki memba aŋgunöŋga qahö dop kölja.”

¹¹Mi möta kewö meleşni mötket, “Möhamgöm niŋgizawaŋön mönö kewö jim teköm niŋgiza, ‘Gi mönö tumbulahöpki memba anöŋ.’”

¹²Mi möta kewö qesim waŋgiget, “Azi daŋön göhöra ‘Tumbulahöpki memba anöŋ,’ jiza?”

¹³Qesim waŋgigetmö, Jisösnöŋ mem ölöwahiga ambazip kambu ketaŋan ölökögetka yeŋgö sutŋineyök sömuniba anök. Miaŋgöra daŋön mi ak waŋgiyöhi, mi qahö möta tönpin kinök.

¹⁴Miaŋgö andöŋe jöwöwöl jike tohoŋ uruŋe öŋgöiga Jisösnöŋ miaŋgöreŋ miwikŋaim waŋgiba qambaŋ keu kewö jii mörök, “Mötnöŋ, gi lök ölöwakzan. Miaŋgöra ayuayuhu törösait bölöŋi kötökŋi kun asuhum gihibapuköra mönö siŋgisöndok kunbuk kude aka malman.”

¹⁵Azi ölöwahöhi, yaŋön Jisös ek kutuba anda Juda jitŋememe yeŋgöra kewö jii mötket, “Azi mem ölöwak niŋgiyöhi, yaŋgö qetŋi Jisös.” ¹⁶Mi möta Jisösnöŋ Sabat kendonöŋ nup mewöŋi meyöhi, Juda jitŋememe yeŋön miaŋgöra aka sesewerowero ak waŋgiba malget. ¹⁷Mewö malgetmö, Jisösnöŋ kewö meleş eŋgiyök, “Nöŋgö Iwinan sundan dop nup memakza aiga nöŋön mewöŋanök mi memakzal.”

¹⁸Mewö meleş eŋgiba ambazip Sabat kendongö keu tosatŋi toroqeba algetka Jisösnöŋ mi ahakmemenŋan qeapköba yeŋgö jeŋine siŋgisöndok ahök. Siŋgisöndok mi toroqeba Anutugöra ‘Iwini’ jiba Anutu tandök ewö maljawangö dop aka nanŋi mem öŋgöyök. Juda ambazip yeŋön yuai yahöt miaŋgöra aka möt kömbuhiba kapaŋ köla Jisös qebingö jim köhöiget. Mewö.

Malmal gulimapkö kukösumŋi mi Jisösgöreŋ ahöza.

¹⁹Mewö aketmö, Jisösnöŋ keu kewö jii mötket, “Nöŋön keu ölä töhöŋŋi kun kewö jibi mötket: Nahönöŋ nanŋi uruŋangö yuai kun qahö memakzapmö, Iwinöŋ yuai memakzawi, Nahönŋan mönö mewöŋanök

^v 5.10 Neh 13.19; Jer 17.21

memakza. Mianğöra Iwinöŋ yuai meiga ehakzawi, yaŋön mönö miyök memakza. ²⁰Iwinöŋ Nahönŋi urunöŋ jöpaköm waŋgiba mala nanjak nup memakzawi, mi pakpak kondel waŋgimakza. Mianğöra aŋgöletot eka maljei, mi yuai eretŋi. Mianğö ölni mi könangep kondel eŋgiiga eka nemböŋini teköi welipköba malme.

²¹“Kun kewögöra welipköme: Iwinöŋ ambazip kömukömuŋi eŋgömindiga gulimakze. Nahönŋan mönö mianğö dop mewöŋanök ambazip köhömuŋi niŋia gulimegö mötzawi, mi eŋgömindiga gulimakze. ²²Mewöŋanök Iwinöŋ kungö keuŋi qahö jim tekömakzapmö, jimtekötekö nupkö kukösumŋi pakpak mi kewögöra Nahönŋangö böröŋe ali ahöza:

²³“Ambazip Iwi göda qem waŋgimakzei, mianğö dop körekŋan Nahönŋi göda qem waŋgimegöra mötza. Iwinöŋ Nahönŋi melaim waŋgiyök. Mianğöra kunŋan Nahön qahö göda qem waŋgizawi, yaŋön mönö Iwi mewöyök göda qahö qem waŋgiza.

²⁴“Mianğöra nöŋön keu ö! töhöŋŋi kun kewö jibi mötket: Kunŋan nöŋgöreŋ Buŋa keu möta mötmöriba ni melaim niŋgiyöhi, i möt narim waŋgiza ewö, yaŋön mönö malmal köhöikŋangö buŋaya akza. Nöŋön keuŋi jim teköbiga könöp siagö buŋaya qahö akŋa. Kömup köhöikŋangö likepŋi mosöta jabö kutuba malmal köhöikŋangö likepŋe aŋgota mal öŋgöma.

²⁵“Nöŋön keu ö! töhöŋŋi kun kewö jibi mötket: Nalö kun kama aka nöŋgöra aka lök kam kuŋguza. Nalö mianğöreŋ ŋiŋgisöndok aka uru köhömuŋi akzei, yeŋön Anutugö Nahönŋan keu qeri mötme. Mi möta tem kölmeanöŋ mönö guliba köhöiba malme. ²⁶Mi kewögöra: Iwinöŋ nanjak malmal köhöikŋi kondorakzawi, mianğö dop malmal gulim köhöimapkö kukösumŋi mi Nahönŋi waŋgii yaŋön mewöyök ambazip mem gulim eŋgimakza. ²⁷Yaŋön Suep gölmegö Azi Ölni maljawangöra aka Iwinöŋ ambazip keuŋini jim tekömapkö kukösumŋi mewöyök yaŋö böröŋe ali buŋaŋi ahök.

²⁸“Nöŋön keu kötŋi jizali, mianğöra mönö kude aurume. Nalö kun kam kuŋgumawi, mianğöreŋ körek pakpak qaksirinöŋ ahözei, yeŋön mewöyök qet qetmawi, mi mötme. ²⁹“Qetŋi mi möta wahöta aukŋe asuhugetka ahakmeme ölöŋŋi aka malgeraŋön malmal köhöikŋe öŋgömemö, ahakmeme bölöŋi aka malgeri, nöŋön yeŋö keuŋini jim teköbiga kömup köhöikŋangö buŋaya akŋe. ³⁰Nöŋön nani urunangö yuai kun nanak aka memamgö osizal. Ni Iwigö jitŋe mörakzali, mönö mianğö dop ambazip keuŋini jim teköm eŋgimakzal. Nani imbinangö dop laŋ qahö memakzalmö, melaim niŋgiyöhi, mönö yaŋö keuŋi wuatangömakzal. Mianğöra jimtekötekö keuni jimakzali, mi mönö dopŋeyök asuhumakza.” Mewö.

^w 5.29 Dan 12.2

Tosatjan Jisösgö könañamñi nañgöba jiget.

³¹“Nöñön nani könañamni nañgöba jibileñjak ewö, keuni miañön ölop qahö köhöibawak. ³²Alani kunöñ nöñgö könañamni nañgöba jimakza. Yañön nöñgöra keu jimakzawi, miañön mönö köhöiba öñambuk akza, mi mötzal. ³³“Inini jitñememe melaim engigetka Jongöreñ kagetka keu öññañgö dop nöñgö könañamni indela jiba nañgöyök.

³⁴“Jiba nañgöyökmö, nöñön gölme azigö nañgönañgö keunji mi möta qahö mötpi öñgöza. Qahö öñgözapmö, Jongö nañgönañgö keugöra jimakzali, mi mönö inini nalö kewöñje letotketka Anutunöñ bohonñini jöhömapköra aka jimakzal. ³⁵Jonöñ kiwa ketañji aka ölopñanök jeba asariyökmö, inini nalö köröñji qahöpmö, töröptökñanök yangö asakñje lañ söñgaibingö sihimñji mötket.

³⁶“Jonöñ könani töröptökñanök jiiga mötketmö, kunöñ mi nañgöba jimakzawi, yangö keuñan mönö Jongöreñ nañgönañgö keu oñgitza. Nani Iwinan nupñji al niñgii membiga öñji asuhumakza. Öñji miañön mönö könañamni kewö nañgöba indelakza: Iwinöñ mönö melaim niñgii jitñe memañji akzal. ³⁷Iwinöñ melaim niñgii erali, yañön könañamni nañgöba jiba malök. Inini nalö kunöñ yangö keu kourukñji qahö mötket aka kaisoñgolomñji qahö eket. ³⁸Yañön niñja melaiiga eröhi, inini i qahö möt narim wañgize. Miañgöra yangö keuñan mönö engö uruñine qahö kinja.

³⁹“Inini malmal köhöikñañgö könañji mi Buña Kimbinöñ ahöm engiza, mewö mötmörriba mi oyonña uru könömñine ala Suepkö buñaya akingö mötze. Mewö mötzemö, kimbiñji kimbiñji pakpak mienöñ mönö nöñgö könañamni nañgöba indelakze. Mi möt yaköze me qahö? ⁴⁰Nañgönañgö keu gwötpuk ahözapmö, inini malmal köhöikñji buña qem añgubingöra nöñgöreñ kabingö tökömakze.

⁴¹“Gölme ambazipnöñ qetbuña niñgigetka qarimapköra qahö mambötzal. Mi niñgigetka mötpi qahö öñgöi maljal. ⁴²Mewö maljalmö, engö könañamñini mi kewö ahöza, mi mötzal: Inini uruñini Anutugöreñ qahöpmahöp jöhöba urukalem qahö ak wañgiba malje. ⁴³Nöñön Iwinañgö qetñji qeta kabiga inini andö qem niñgimakzemö, kunöñ nanñji qetñji qeta kamawi, inini mönö i ölop möt añgön köla köl öröm wañgime.

⁴⁴“O inini nanñini möpöseim añguba qetbuñañini qarimapkö mötket öñgöza. Öñgözapmö, bem mohotñan Anutu öñji akzawi, yañön qetbuña engimapköra qahö kapañ kölje. Mewö aködamunñinambuk akñegöra qahö jaram tiba kinje. Miañgöra denöwö ni möt narim niñgibeak? Mi mönö osibeak.

⁴⁵“Nöñön inini ‘Iwigö jemesoholñje keu jakeñje al eñgimam,’ mewö mötmöribepuk. Inini Mosesgö keugö jörömqöröm al wañgiba Suep mire

× 5.33 Jon 1.19-27; 3.27-30 √ 5.37 Mat 3.17; Mak 1.11; Luk 3.22

öngöbingö mamböta maljemö, Anutugö jeje angotketka Mosesnön nanjak Anutugö keu jakeje ala jim aum engiiga gamunini mötme.

⁴⁶“Mi kewögöra: Mosesnön nöngö könajamni jim asariba Buja Kimbinön ohoi ahöza. Miaᅇgöra Moses möt narim waᅇgibeak ewö, mönö nia möt narim niᅇgibeak. ⁴⁷Mewömö, Mosesgöreᅇ kimbia qahö möt nariba tem köljeaᅇgöra mönö nöngö keuni mi denöwö möt naribeak? Mi kupuk-kapakᅇambuk akapuk.” Mewö.

Jisösnön azi 5000 nene gumohom engiyök.

Mat 14.13-21; Mak 6.30-44; Luk 9.10-17

6 ¹Miaᅇgö andöᅇe Jisösnön Galili o angö, qetᅇi kun Taiberias o angö qetkeri, mi kutuba likepᅇe aᅇgorök. ²Kawöl ambazip möhamgöm engii angöletot asuhui ekerangöra aka ambazip kambu jesöᅇgöᅇjan Jisösgö andöᅇe wuatangöba kaget. ³Jisösnön gwarekurupᅇi engömeiga kundᅇe öᅇgöba tatket.

⁴Nalö miaᅇgöreᅇ Juda neᅇgöreᅇ ak-kömukömu kendonöᅇ töriyök.^z

⁵Jisösnön je ui aniga ambazip kambu jesöᅇgöᅇjan yaᅇgöreᅇ kaᅇotkeri, i enᅇeka Filipköra jiyök, “Nini nene denikeyök bohonᅇi meinga kambu mewöᅇjan nem timbireᅇ aketka dop kölbowak?” ⁶Yuai akᅇamgö ahöhi, mi nanjak mörökmö, keu mi Filip esapköm waᅇgiba jiyök.

⁷Mewö jiiga kewö meleᅇnök, “Nene beret silim 200:kö töwaᅇi (Kina 1000,-) miaᅇön bohonᅇi memba mendeᅇninga körek yeᅇön kitipᅇjanöhök nembeak aka töndup qahö dop köl engibowak.”

⁸Mewö jiiga gwarekurupᅇi yeᅇgöreᅇök kun qetᅇi Andru, Saimon Pitögö munᅇan kewö jii mörök, ⁹“Azi moröᅇi kun kiaᅇgöreᅇ malja. Yaᅇgöreᅇ bali^a beret 5 aka söra yahöt ahözapmö, ambazip sehiseᅇiᅇi kewö kagetka yeᅇgöra mi qahö dop kölma.”

¹⁰Jisösnön jiyök, “Iᅇini mönö ambazip kambu ki jiba mendeᅇ engigetka nene nemingö eta tatme.” Gölme miaᅇgöreᅇ keᅇwaᅇ luplup gwötpuk ahöyök. Miaᅇgöra azi jaᅇgöᅇjini 5000:gö dop yeᅇön gölmenöᅇ eta tatket.

¹¹Eta tatketka Jisösnön beret mi memba saiwap jiba ambazip tatkeri, mendeᅇda engiyök aka söra mi mewöyök mendeᅇda sihimᅇinan jigerangö dop engiyök. ¹²Mendeᅇda engiiga memba nem timbireᅇ aketka Jisösnön gwarekurupᅇi kewö jii mötket, “Nene kitipᅇi ayuhubapuköra mi mönö qezaköᅇet.” ¹³Mewö jiiga möta bali beret 5 miaᅇgöreᅇök memba kitipᅇi kitipᅇi mosötket taröhi, mi qezaköᅇetka sakap 12 miaᅇgöreᅇ geba kokolak qeyök.

¹⁴Jisösnön angöletot mewö mei asuhuiga ambazipnön eka welipköba jiget, “Kezapqetok azi gölmenöᅇ asuhumapkö jigeri, yaᅇön mönö öᅇja

^z 6.4 Anutunöᅇ mönöwök neᅇgehoriba neᅇgöᅇgiröhi, Juda yeᅇön miaᅇgöra yambu (yara) dop nalö ala söᅇgaimakze. Nei keunöᅇ qetᅇi Pasowa jize. Eksodus 12.15 ^a 6.9 Bali mi padi, wit, out aka sehöᅇ miaᅇgö alanini kun.

mia akza.”¹⁵ Mewö jiba Jisösgöra köiran ala kiñ kembuñini akñapkö mötmöriget. Mötmöriba kaba liliköm wañgiba walimgöba kiñ kuñgum wañgibingö aket. Mewö möt kutuba engek tököba engömosöta kunbuk kunduje öngöba nanjök malök. Mewö.

Jisösnöñ o anğö qakñe tiba tiba anök.

Mat 14.22-33; Mak 6.45-52

¹⁶Neget teköiga mare aiga Jisösgö gwarekurupñi yeñön o anğögö jitñe geget. ¹⁷Geba wañgenöñ öngöba gölme mi mosöta o anğö kutuba likepñe Kaperneam mire göröken anget. Angetka miri söñaum teköiga Jisösnöñ töndup yeñgöreñ qahö asuhuyök. ¹⁸Angetka luhut köhöikñanök giliga o anğönöñ könöpuk kunduta öngöba erök.

¹⁹Öngöba eriga lökuatnöñ qeba nañgöba 5 me 6 kilomita miangö dop angetka Jisösnöñ o anğö qakñe tiba tiba wañge kösutñe kaiga eka auruba keñgötporiñ aket. ²⁰Mewö mötketka kewö jii mötket, “Nanak kazal. Keñgötñini kude mötme.” ²¹Mewö jii möta Jisösnöñ wañgenöñ öngömapkö jigetka öngöyök. Öngöiga wañgeñinan mianggöreñök ösumok enğuañgita gölme görane anbingö akeri, mianggöreñ anğotket. Mewö.

Ambazip yeñön Jisösgöra um jarum bibihiget.

²²Mianggöreñ anğotketka miri gianjiiga ambazip kambu ketañi yeñön o anğö likepñe toroqeba mala kewö mötmöriget, “Uran wañge mohotñan tari ehinga Jisösnöñ gwarekurupñi yembuk wañgenöñ qahö öngöba anök. Jisös umbula nanñinök anget. Wañge murutñi kun qahö ehin. Mianggöra Jisösnöñ kunbuk ki malja.”

²³Mewö mötmöriba tosatñan kewö jiget, “Wañge mohotnöñ angetmö, ölna, Taiberias taonök wañge tosatñi kaget. Wañge mi Kembunöñ beretköra saiwap jiiga nempa tarini, mönö gölme miangö kösutñe kagera Jisösnöñ wañge mienggöreñök kunöñ öngöba anök me denöwö?” ²⁴Ambazip kambu yeñön mewö jiba Jisös aka gwarekurupñi mianggöreñ qahö miwikñaim enğiget. Mewö eka möta mewöñanök wañgenöñ öngöba Kaperneam taonöñ anda Jisös jaruget. Mewö.

Jisösnöñ malmal köhöikñanğö neneñi akza.

²⁵Ambazipnöñ Jisös jaruba o anğö likepñe yuke göröken miwikñaiaba eka kewö jiget mörök, “O Ketanjamnini, gi mönö wani nalönöñ ki kazan?”

²⁶Mewö jigetka kewö meleñ enğiyök, “Nönjön keu öñ töhöññi kun kewö jibi mötket: Inini anğöletot membi ekerangöra aka ni qahö jarum niñgizemö, nene beret kötuetköbi nempa nem timbireñ akeri, mönö mianggöra ni nuatangöba ki kaze. ²⁷Nene ayapkömawi, mi miwikñaiabingöra urukönöp kude aka malmemö, urugö neneñan malmal köhöikñi enğimakzawi, mönö mia buña qem anğubingöra kapañ köla

malme. Iwi Anutunöŋ muŋgem silimbannŋi Suep gölmegö Azi Ölnŋi waŋgiiga kukösumŋan walöŋniga ölop urugö nene eŋgiiga oyaenŋkoyaen akŋe. Mewö aka mal köhöiba kömumba toroqeba teteköŋi qahö malme.”

²⁸Mewö meleş eŋgiiga kewö qesim waŋgiget, “Anutugö sihimŋangö dop ahakmeme tandökŋi mönö denöwö ahinga dop kölbawak?”

²⁹Qesim waŋgigetka kewö meleşnök, “Anutunöŋ azi melaim waŋgiyöhi, iŋini i möt narim waŋgiba malme. Ahakmeme miangön mönö Anutu sihimŋangö dop akza.”

³⁰Mewö meleşniga kewö qesim waŋgiget, “Mewö aiga gi kunbuk wani aŋgöletot kukŋambuk kun menöŋga eka möt narim gihibinak? Gi mönö wani yuai kun Mosesnöŋ ahök, miangö dop aka meman? ³¹^bBuŋa Kimbi kun kewö ohoget ahöza, ‘Yaŋön Suepnöhök nene beret eŋgiiga neget.’ Keu miangö dop nanine ambösakon yeŋön gölme qararaŋkölkölŋe anda mala nene qetŋi mana nempa malget aka gi mönö könaŋamgi Moses oŋgita denöwö kondelbanak?”^c

³²Qesim waŋgigetka Jisösnöŋ kewö jii mötket, “Iŋini miangö könaŋi ölop qahö möt kutuze. Nöŋön keu öl töhöŋŋi kun kewö jibi mötket: Mosesnöŋ aŋgöletot Toŋi qahö ahök. Yaŋön nene beret mi Suepnöhök qahö eŋgi negetmö, nani Iwinan mönö Suepnöhök beret ölbölnŋi eŋgimakza. ³³Anutugö nene beret mi mönö Suepnöhök eta asuhuba gölme dop ambazip malmal köhöikŋi eŋgimakza.”

³⁴Mewö jii möta kewö jiget mörök, “O Kambu, gi nalö dop nene beret mi neŋinöŋga nempa malbin.”

³⁵Jisösnöŋ mi möta jiyök, “Nöŋön malmal köhöikŋangö neneŋi akzal. Kunŋan nöŋgöreŋ kazawi, yaŋön nem timbireŋ aka wösöŋi nalö kunöŋ qahö alma. Kunŋan ni möt narim niŋgimakzawi, yaŋön ogöra qahö kömuma. ³⁶Mewö aigun iŋini ni nek teköba töndup qahö möt narim niŋgize. Mi mönö lök jibi mötze. ³⁷Aka töndup Iwinöŋ ambazip tosatŋi niŋgimakzawi, yeŋön mönö körek nöŋgöreŋ kame. Kunŋan nöŋgöreŋ kamawi, nöŋön mönö i qahö yakörimam.

³⁸“Nöŋön Suepnöhök eta nani imbinangö dop yuai laŋ aka memba malmamgöra qahö asuhuyal. Mewö qahö. Melaim niŋgiyöhi, mönö yaŋgö jitrök dop nup memba malmamgöra eral.

³⁹“Melaim niŋgiyöhi, yaŋgö jitsihitŋan kewö ahöza: Yaŋön ambazip nöŋgö böröne al eŋgiiga maljei, nöŋön mi pakpak köyan köl eŋgiba malbiga yeŋgöreŋök kunŋan kun qahö sohoba ayuhuma. Qahö ayuhugetka nöŋön i nalö ketaje eŋgömindiba mem gulim eŋgimam.

^b 6.31 Eks 16.4, 15; Sum 78.24 ^c 6.31 Gölme qararaŋkölkölŋe Anutunöŋ söŋan dop söŋangö yuai amötŋi, jöhanŋi tuatŋi aka awamŋi juzu paura ewö ali gölmenöŋ ahöi eka yaigep söbemmöŋ anda qezaköba koumŋine kaba beret lölöwöröŋi memba nezema. Eks 16.13-36

40 “Iwinangö jitsihitjan kewö ahöza: Tosatjan Nahönji eka möt narim wangizei, yejön körek nalö kewöje letota malmal köhöikni buja qem anguba malme. Mewö mal kömugetka nöjön i nalö ketanji miangörej engömindiba mem gulim engimam.”

41 Jisösnöj mewö jiiga keu kötji kun kewö ahök, “Nöjön malmalgö nene ölni aka Suepnöhök eta asuhuyal.” Mewö jiyöhangöra aka Juda jitjememe yejön möt böliba uruñinan ihururuk jiba jim wangiget. 42 Jim wangiba jiget, “Azi ki Jisös, Josefko nahönja. Yangö iwinamni mi ölop möt etkizinmö, mönö denöwögöra ‘Suepnöhök eta asuhuyal,’ jiza?”

43 Mewö jigetka möta kewö melejnök, “Uruñinan mönö kude ihururuk jiba jim niñgime. 44 Iwi ni melaim niñgiyöhi, yejön ambazip qahö öröm engiza ewö, engöreñök kunjan nöngöreñ kamamgö osima. Öroi kabawak ewö, nöjön i mönö nalö ketanje engömindiba mem gulim wangimam.

45^d “Kezapqetok yengöreñ kimbinöj keu kewö ohoget ahöza, ‘Anutunöj i körek pakpak kusum engii mötme.’ Iwinöj ambazip kusum engii keu möta urukönömñine ala maljei, yejön mönö körekjanök nöngöreñ kame. 46 Ambazip kunjan Iwi qahö eka malja. Iwigöreñök eröhi, yejön mohot kun mönö i eka malja. 47 Nöjön keu öl töhöñji kun kewö jibi mötket: Kunjan ni möt narim niñgizawi, yejön mönö malmal köhöikni buja qem anguba mal öngöma.

48 “Nöjön malmal köhöikjangö nene ölni akzal. 49 Mötket! Engö ambösakonuruñinan gölme qararankölkölñe anda mala nene qetji mana namba malgetmö, töndup kömumba gisahöget. 50 Yejön kömugetmö, nene beret nalö kewöje Suepnöhök eta maljawi, kunjan mi namba mala qahö kömum köhöima.

51 “Nene beret malmalñambuk Suepnöhök eröhi, mi nöjön akzal. Kunjan nene mi namba malmawi, yejön mönö teteköñi qahö köhöiba malma. Nene wangiba malmami, mi nöngö busuni. Gölmeñi gölmeñi yejön köhöiba malmegöra mi al engimam.”

52 Jisösnöj mewö melejniga Juda jitjememe yejön sutñine urukönöpñöj jim qesim anguba jiget, “Yei! Azi kianön mönö denöwö aka busunji nenggiiga nembinak?”

53 Mi möta jigetka kewö jii mötket, “Nöjön keu öl töhöñji kun kewö jibi mötket: Injini Suep gölmegö Azi ölnjangö sepñi aka busunji qahö neme ewö, malmal köhöikni miañön mönö engö uruñine qahö ahöma. 54-55 Nöngö sepnan o ölni akza aka nöngö busunan nene ölni akza. Miañgöra kunjan nöngö sep busuni nemakzawi, yejön mönö letota malmal köhöikjangö bujaya aka mal öngöma. Mewö mal kömuiga nöjön i nalö ketanje mindiba mem gulim wangimam.

56 “Kunjan nöngö sep busuni nemakzawi, yejön mönö nömbuk qekötahöba kinakza aka nöjön yambuk kinakzal. 57 Iwinöj Malmal

^d 6.45 Ais 54.13

Toŋi aka melaim niŋgiba wötŋi aka nam köl niŋgiiga köhöiba maljal. Mewöŋanök kunŋan ni nem niŋgimakzawi, nöŋön mönö mewöŋanök yaŋgö wötŋi aka nam köl waŋgibiga ölop köhöiba malma. ⁵⁸Nene ölni Suepnöhök eröhi, mi nöŋön akzal. Engö ambösakonurupŋinan Anutugö nene namba mala kömugetmö, nalö kewöŋe engöreŋök kunŋan beret ki namba malmawi, yaŋön mönö teteköŋi qahö köhöiba malma.”

⁵⁹Jisösnöŋ Kaperneam taongö köuluk miriŋe kinda keu mi jim kusum engiyök. Mewö.

Gwarek gwötpukŋan uruŋini böliiga Jisös mosötket.

⁶⁰Jisösgö gwarekurupŋi yeŋgöreŋök gwötpukŋan keu mi möta jiget, “Keu jit jizawi, miaŋön mönö keu köt ewö lömbötŋambuk akza. Mi möriŋga uruninan lömböriba bölim teköza. Miaŋgöra mi kunbuk mötŋingö ölan neŋgöhöiga i mönö mosötŋin.”

⁶¹Gwarek yeŋön Jisösgö keugöra möt böliba uruŋinan ihururuk jiba jim waŋgigetka Jisösnöŋ mi uruŋan enŋuaŋgita möta kewö jii mötket, “Keu jizali, mi möt böliŋe me qahö? ⁶²Keu miaŋgöra möt böliŋe ewö, könŋeŋep mönö denöwö asuhubawak? Suep gölmeŋe Azi ölnan mutuk miri mala koröhi, euyaŋgöreŋ kunbuk liliŋgöba öŋgöi ekŋe ewö, nalö miaŋgöreŋ mönö denöwö mötme?

⁶³“Uŋa Töröŋi yaŋön ambazip mem gulim enŋimakza. Iŋini gölme ambinöhök ahuba busuŋinambuk akzemö, ahuaŋu döläkŋe qahö ahuba nanŋini ösumŋinan öne letota Suepkö buŋa ahak mi qahöpmaŋöp. Uŋa Töröŋan malmal köhöikŋi enŋizawi, nöŋön keu kötŋi mi jim tuaribi möta malget. ⁶⁴Mewö möta malgetmö, enŋöreŋök tosatŋan töndup ni qahö möt narim niŋgiba malje.” Denike yeŋön qahö möt narim waŋgigeri aka daŋön könŋeŋep mamalolo mem waŋgimawi, Jisösnöŋ mi könakönahiŋeyök möta korök. Miaŋgöra mewö jiyök.

⁶⁵Mewö jiba toroqeba jiyök, “Miaŋgöra nöŋön kewö jibi mötme: Nöŋgö Iwinan ambazip kun qahö inahöm waŋgiza ewö, yaŋön mönö nöŋgöreŋ kamamgö osima.”

⁶⁶Keu miaŋgöra aka gwarek yeŋgöreŋök gwötpukŋan poraiba ziriŋziriŋ aka mosöta yambuk qahö toroqeba anda kaget. ⁶⁷Miaŋgöra Jisösnöŋ gwarek 12 miŋgöra kewö jiyök, “Iŋini mönö mewöŋanök nömosöta anbingö mötze me qahö?”

⁶⁸^eMewö jiiga Saimon Pitönöŋ meleŋnök, “O Kambu, nini mönö dagöreŋ anbinak? Malmal köhöikŋaŋgö Buŋa keuŋi mi mönö göhöreŋ ahöza. ⁶⁹Göŋön Anutugöreŋ azi sarakŋi akzani, nini mi möt nariba möt asariba maljin.”

⁷⁰Mewö meleŋniga Jisösnöŋ möta jiyök, “Nöŋön azi 12 iŋini möwölöhöm enŋial aka enŋgöreŋök kunöŋ mönö bölöŋaŋgö bohönŋi

^e 6.68-69 Mat 16.16; Mak 8.29; Luk 9.20

akza.”⁷¹ Judas Saimon Iskariotkö nahönni yañön gwarek 12 yeñgö sutñine mala könagep mamalolo mem wañgiyök. Jisösnöñ keu mi yañgöra möta jiyök. Mewö.

Jisösnöñ munurupñi yembuk keu eraum mötket.

7 ¹Juda jitñememe yeñön Jisös qebingö kapan kölgerañgöra Judia prowins uruñe anda kamamgö tököyök. Miangöra Judia mosöta Galili prowins uruñe anda liliköba maliga köiñ tosatñi teköyök. ²Mi teköiga Juda yeñgörej kendon kun qetñi koumkoum miangö nalöñan töriyök.⁸

³Miangöra Jisösgö munurupñan kewö jiget mörök, “Gi kiangörej mala añgöletot memakzani, mi gwarekurupkan mewöyök ek kutumegöra gi mönö gölme ki mosöta Judia anöñga dop kölma. ⁴Kunñan nanjak aukñe asuhumamgö mörakzawi, yañön yuai kun tölapñe qahö memakza. Añgöletot mewöñi memakzanangöra mönö ambazip kambuñi kambuñi yeñgö jeñine anda asuhuba könangamgi indelman.” ⁵Munurupñan qahö möt narim wañgiba tönpin malgerañgöra aka mewö lañ jiget.

⁶Mewö jigetka kewö jii mötket, “Urugö nup aukñe memamgö nalöñan qahö kam kuñguiga maljalmö, eñgö nalöñinan mönö sundan dop anmeañgö dop ahöza. ⁷Gölme ambazipnöñ kazik ak eñgibingö osimakzemö, nöñön yeñgö ahakmemeñini bölöñi indela nangöba jibi mötzeañgöra mönö ni kazik ak niñgimakze. ⁸Anmamamgö nalönan mönö qahö kam kuñguza. Miangöra nöñön sösonggai kendon kiangörej qahö öñgömam. Nöñön mire tatpiga iñini ölop endu anda öñgöba söngaim.” ⁹Keu mewö jii mötketka Galili prowins uruñe toroqeba malök. Mewö.

Jisösnöñ koumkoum sösongainöñ malök.

¹⁰Jisösgö munurupñan koumkoum kendongöra angetmö, nanjak mire tata könagep aukñe qahöpmö, tölapköba anda Jerusalem öñgöyök.

¹¹Juda yeñgö jitñememeurupñinan sösonggai nalöñe Jisösgö jeñi jaruba qesiqesi aka kewö jiget, “Azi mi denike?”

¹²Ambazip kambu yeñön sutñine Jisösgöra sañep keu gwötpuk jiget. Tosatñan “Azi mi ölop sorokñi,” jigetmö, tosatñan kewö jiget, “Qahö! Yañön mönö ambazip kambu eñololon ak eñgiiga kahapmahap ahakze.”

¹³Mewö mewö lañ jigetmö, Juda jitñememe yeñgöra keñgötñini möta malgerañgöra kunñan yañgö keuñi aukñe qahö jiyök. Mewö.

^f 7.2 Lew 23.34; Dut 16.13 ⁸ 7.2 Juda yeñgörej yambu jeñi qeçe sösonggai kendonñi mi yambu (yara) dop kewö alget: Wain nupñine anda ip sinji memba koumkoum qeba miangörej ahöba wehön 8 söngai kendon tata malget. Wehön kondikñe sösonggai öñgöñöñi alget. Mönöwök gölme qararankölkölñe yambu (yara) 40 miangö dop opo koumñine ahöba kaba malgeri, mi mötmöriba söngaiget. Lew 23.33-36,39-43; Dut 16.13-15

Jisösnöñ nanñi könañi ambazip kusum enñiyök.

¹⁴Kendon sösongai bibiñe malgetka Jisösnöñ jöwöwöl jike tohoñ uruñe öngöba könahiba ambazip kusum enñiyök. ¹⁵Kusum enñiiga Juda yeñön welipköba kewö jiget, “Azi ki mötmöt jake öngöngöñe qahö öngöba töndup Buña Kimbigö könañi denöwö möt soroköza?” Mewö jiba welipköget.

¹⁶Welipkögetka kewö jii mötket, “Mötmöt Buña jimakzali, nöñön miañgö Toñi qahö akzal. Nanak qahöpmö, melaim niñgiyöhi, nöñön mönö yañgö mötmötñi memba kaba jimakzal. ¹⁷Ambazip kunñan Anutugö jitsihitñangö dop aka memamgö mötzawi, yañön mötmöt jibiga miañgö Toñi dañön akza, mi möt kutuma. Anutunöñ Buñanji nöñgö urune ali asuhuza me nani imbinangö keu lañ jimakzal?

¹⁸“Kunñan nanñi imbiñe mötmöriba keu jimakzawi, yañön nanñak qetbuñañambuk akñamgö mötza. Mewö mötzapmö, melaimelai azi kun toñan qetbuñañambuk akñapköra kapañ köljawi, yañön mönö jitñememe ölbölni geñmoñi qahö akza. ¹⁹Mosesnöñ Köna keu al enñii mi ahöza me qahö? Mi ahözapmö, enñgöreñök kunñan mi qahö tem köla wuatangömakza. Inini mönö wuanöñgöra kapañ köla ni nuñgubingö mötmörize?”

²⁰Mewö jii möta ambazip kambu yeñön kewö melenget, “Ömewörömenöñ mönö uruge geba kinja. Dañön kapañ köla gi guhumamgö mötmöriza?”

²¹Mewö melengetka jii mötket, “Nöñön angöletot mohot membiga inini körek pakpak auruba köñkuñ akze. ²²^hMosesnöñ silenine Anutugö aiwesök yandibingöra jim kutum enñiyöhi, o Mosesnöñ mi mutuk qahö jim kutuyökmö, ambösakonurupninan mi könahiba memba malgetka silik mi neñgöreñ kaiga Sabat kendonöñ mewöyök azi silenine yandimakze.

²³ⁱ“Nini Mosesgö Köna keu walöñnin siñgisöndok ahubapüköra köhöikñi mötzin. Mi mötzinmö, keu mi qetala Sabat kendonöñ mewöyök azi silenine yandiba töndup nanñini qahö jim anguba silebile malje. Mewö maljemö, nöñön azi jömukñi Sabat kendonöñ mem ölöwak wañgiali, miañgöra mönö wuanöñgöra mi yom jim niñgize? ²⁴Inini ambazip silenine miyöhök eka mewö miañön bahösöhamök kewöta keu lañ jim tekömakzei, mi mönö mosötme. Mi mosöta uruñini törörök möt kewöta keu ölnanök jim teköme.” Mewö.

Jisösnöñ Amötqege Toñi akza me qahö?

²⁵Jerusalem toñi yeñgöreñök tosatñan kewö jiget, “Azi kapañ köla gebingö mötmörizei, yañön mönö mia me? ²⁶Eket, yañön ambazip jeñine

^h 7.22 Jen 17.10; Lew 12.3 ⁱ 7.23 Jon 5.9

aukŋe keu jiiga qahö jim waŋgize. Mewögöra azi kianjön Amötqeŋe Toŋi Kraist akzawi, keu mi ölŋa galömkölköl azi yeŋgö kezapŋine geiga mötze me qahö? ²⁷Amötqeŋe Toŋi Kraistnön kamapköra jiba kota malgeri, yaŋjön ‘Denikeyök asuhumawi, mi kunön kun qahö mötma,’ jizemö, azi kianjön denikeyök asuhuyöhi, mi mönö ölöp mötzin.”

²⁸Mewö eraum mötketka Jisösnön jöwöwöl jikegö tohoŋ uruŋe kinda imbiŋi memba wahöta kusum eŋgiba keu kewö jiyök, ‘Injini nöŋgöra kewö jize, ‘Azi mi möt waŋgiba miriŋi denikegö mi ölöp mötzin.’

Nani kukösum qakŋe qahö asuhuba kinjal. Melaim niŋgiyöhi, yaŋjön melaimelai Toŋi ölŋi aiga i qahö möt kutum waŋgiba malje. ²⁹Yaŋjön melaim niŋgiiga yaŋgöreŋök eralaŋgöra i ölöp möt waŋgizal.”

³⁰Mewö jiiga i memba jöhöbingö mötketmö, nalöŋan qahö kam kuŋguyöhaŋgöra aka kunŋan sileŋe qahö meyök. ³¹Mewö mötketmö, ambazip kambu yeŋgöreŋök gwötpukŋan möt narim waŋgiba kewö jiget, ‘Kraistnön kamawi, yaŋjön mönö azi ki oŋgita aŋgöletot memba malma me denöwö? Mewö tandök akza.” Mewö.

Jisös memba jöhömegöra naŋgu galöm melaim eŋgigetka kaget.

³²Ambazip kambu yeŋjön Jisösgöra mewö goranora jiba jitnakölik akeri, mi Farisi (Köna keugö kapaŋkölköl) yeŋjön mötket. Mi möta jike nup galöm yembuk kinda naŋgu galöm (sikiriti) tosatŋi melaim eŋgigetka memba jöhöbingö kaget. ³³Kagetka Jisösnön kewö jiyök, “Nöŋön embuk nalö töröptökŋi toroqeba malmam. Mi malagun eŋgömosöta melaim niŋgiiga erali, mönö yaŋgöreŋ liliŋgöba öŋgömam. ³⁴Öŋgöbiga göraim niŋgiba malmemö, ni qahö miwikŋaim niŋgime. Nöŋön miri malmami, injini miangöreŋ kabingö osime.”

³⁵Mewö jiiga Juda jitŋememe yeŋjön sutŋine kewö erauget, “ ‘Nini miwikŋaim waŋgibingö osibin,’ jiza. Miangöra mönö denikeangöreŋ öŋgömamgöra jiza? Juda ambazip tosatŋan deŋda kantri tosatŋe anda Grik yeŋgö sutŋine maljei, mönö yeŋgöreŋ anda Grik ambazip kusum eŋgimamgö möta jiza me? ³⁶Keu kewö jiza, ‘Göraim niŋgiba malmemö, ni qahö miwikŋaim niŋgime,’ aka keu kun kewö jiza, ‘Nöŋön miri malmami, injini miangöreŋ kabingö osime.’ Keu yahöt mietkö könaŋjiri denöwö?”

Malmal köhöikŋaŋgö oŋan mönö jeŋi tohoba kaŋgotma.

³⁷Mewö eraugetmö, kendon söŋgaigeri, miangö wehön qöndökŋi ketanŋi miangön kam kuŋguiga Jisösnön kinda köhöikŋanök qeta kewö jiyök, “Kunŋan ogöra kömuzawi, yaŋjön mönö nöŋgöreŋ kaba nema. ³⁸‘Buŋa Kimbigö keu kun kewö ohoget ahöza, ‘Kunŋan ni möt narim

^j 7.37 Lew 23.36 ^k 7.38 Eze 47.1; Zek 14.8

niŋgizawi, yaŋgö uruŋeyök malmal köhöikŋaŋgö oŋan mönö tohoba saksaköba kaŋgorakŋa.’”

³⁹Mewö jiyökmö, keu mi Uŋa Töröŋaŋgöra aka kewö jiyök, “Denike eŋön ni möt narim niŋgizei, iŋini mönö Uŋa Töröŋi buŋa qem aŋguba malme.” Anutunöŋ Jisös gölmenöŋ malöhaŋgö dop Suepkö asakmararaŋi qahö al waŋgiiga malök. Mianŋgöra Uŋa Töröŋi qahö melaiiga eta uruŋjine geiga öne malget. Mewö.

Ambazip sutŋine jujul ahu malget.

⁴⁰Jisösnöŋ mewö jiiga ambazip kambu yeŋgöreŋök tosatŋan keu mi möta kewö jiget, “Azi kiaŋön mönö ölna kezapqetok azi asuhumapkö jigeri, mönö mia akza.”

⁴¹Tosatŋan jiget, “Yaŋön Amötqeqe Toŋi Kraist akza.” Mewö jigetmö, tosatŋan qetala jiget, “Kraistnöŋ mönö denöwö Galili prowinsnöhök kabawak? Mi qahö dop kölja. ⁴²‘Buŋa Kimbinöŋ kewö jiza, ‘Kiŋ Deiwidnöŋ Judia prowinsgö taon moröŋi Betlehem mianŋgöreŋ malöhi, Kraistnöŋ mianŋgöreŋök asuhuba Deiwidkö gwölönarökurupŋi yeŋgöreŋök kunŋan akŋa.’”

⁴³Mewö mewö laŋ jigetka ambazip kambu yeŋön Jisösgöra aka jula deŋget. ⁴⁴Yeŋgöreŋök tosatŋan memba jöhöbingö mötketmö, kunŋan sileŋe qahö meyök. Mewö.

Juda galöm yeŋön Jisös qahö möt narim waŋgiget.

⁴⁵Jöwöwöl jikegö kiripo galöm (sikiriti) yeŋön lilingöba jike nup galöm aka Farisi (Köna keugö kapaŋkölköl) yeŋgöreŋ kagetka kewö jim eŋgiget, “Iŋini wuanöŋgöra i qahö memba kaze?”

⁴⁶Jim eŋgigetka kewö meleŋget, “Azi mianŋön keu jimakzawi, kunŋan nalö kunöŋ keu tandökŋi mewöŋi qahö jiyök.”

⁴⁷Mewö meleŋgetka Farisi (Köna keugö kapaŋkölköl) yeŋön qesiba jim eŋgiget, “Iŋini tok eŋololoŋ ak eŋgii malje me? ⁴⁸Galömkölköl azi neŋgöreŋök kunŋan mönö i qahö möt narim waŋgiyök. Aka Farisi (Köna keugö kapaŋkölköl) neŋgöreŋök kunöŋ kun uruŋi yaŋgöreŋ göröken meleŋnök me qahö? ⁴⁹Mewö qahöpmahöpmö, ambazip kambu Mosesgö Köna keu qahö möt kutuba Jisösgö keu möta kopa keu laŋ jimakzei, yeŋgöra muat! Anutunöŋ mönö i qesuahöm eŋgiiga ayuhume.”

⁵⁰^mMewö jim eŋgigetka azi qetŋi Nikodemus mutuk Jisösgöreŋ kaiga qambaŋ waŋgiyöhi, yaŋön mewöyök yeŋgöreŋök kun aka sutŋine tata kewö jii mötket, ⁵¹“Azi kunöŋ siŋgisöndok ahöhi, mi qahö qesiinga jiiga möta töndup kewöriŋa dop kölja me qahö? Qahö kewöta keuŋi öne jim teköbin ewö, mönö naninak Köna keunini qebin me? Mi qahö dop köлма.”

¹ 7.42 2 Sml 7.12; Mai 5.2 ^m 7.50 Jon 3.1-2

⁵²Mewö jii möta kewö melenj wanjiget, “Gi mewöyök Jisös ewö melenjda Galili qandak azia akzan me? Galili prowinsnöhök kezapqetok azi kun qahö asuhumawi, mi mötzin. Mewö mi nangak Buja Kimbi oyondä könäni jaruba möt kutuman.” ⁵³Mewö jtnakölik aka jula denjda miriñine anget. Mewö.

Ambi kunöñ serowilin aiga miwikñaiget.

8 ¹Miriñine angetmö, Jisösnöñ anda Oil ip kundunje öngöyök. ²Öngöba ahöba miri gianjiiga söñanök kunbuk lilingöba jöwöwöl jikenöñ öngöiga ambazip kambu pakpak kaba liliköm wanjigetka eta tata kusum engiyök.

³Kusum engiiga Köna keugö böhi aka Farisi (Köna keugö kapañkölköl) yeñön ambi kun wanjita yanğoreñ kaget. Ambi mianñön sero yonğorö ahiga mianğöra memba jöhögeri, mi wanjita kambu jeñine alget.

⁴Jeñine ala Jisösgöra jiget, “Böhi, ambi kianñön qesabulum ahiga mönö mianğoreñök miwikñaiba memba kazin. ⁵“Mosesnöñ Köna keu ala mianğoreñ ambi mewöñi mi kötnöñ gila qeinga kömumapköra jim kutum neñgiyöha ahöza. Mewö ahözapmö, göñön yanğöra denöwö jiman?”

⁶Mewö jiba mianğoreñ möndöba Jisös keugö bötaknöñ öröi qaköiga qebingö könäni ahui keu jakeñe albingöra jiget. Mewö jigetka sipköba eta böröñan kulem kun gölmenöñ ohoyök.

⁷Ohoyökmö, toroqeba kapañ köla qesim wanjigetka hök ala wahöta diñdiñi kindä kewö jii mötket, “Engöreñök kunñan siñgisöndok kun qahö aka maljawi, yanñön mönö ölop köt mutukñi memba gila qema.”

⁸Mewö jii mötketka kunbuk sipköba eta kulem kunbuk gölmenöñ ohoyök.

⁹Jisösnöñ keu jiyöhi, mianñön engömemba jöhöiga nanñini siñgisöndokñini gamuñambuk akeri, mi Anutunöñ kondeliga nanñini uruñinan nañgöba jiiga isikusukñini qahöwahök. Mianñön qahöwahiga keu göröñ kingetka bohonñinan mutuk engömosöta aniga yanğö nemböñan andöñe aniga tosatñi mohot mohot yeñön mömölaköba körek an teköget. Qöndökñan aniga Jisösnöñ zoñ kuñguba tari ambinöñ nanñök yambuk kinök. ¹⁰Jisösnöñ hök ala wahöta diñdiñi kindä ambi eka kewö jii mörök, “Ambi, keu jakeñe al gihibingö jizei, yeñön mönö denike gi sök ni sök anjeje? Yengöreñök kunöñ kindä gi kömumangö keuñi qahö jim teköza me?”

¹¹Jii möta melenñök, “O Kambu, kunöñ qahö jim teköm niñgiza!” Mewö melenñiga jii mörök, “Nöñön mewöyök gi qahö jim teköm gihizal. Gi mönö döлки könahiba siñgisöndok kunbuk kude aka malman.” Mewö.

^a 8.5 Lew 20.10; Dut 22.22-24

Gölme dop neŋgö asaknini mi Jisös.

¹²°Jisösnöŋ keu kunbuk suariba kewö jii mötket, “Nöŋön ambazip gölmeŋi gölmeŋi tat anjei, eŋgö asakŋini akzal. Kunŋan ni nuatanŋöba kamawi, yaŋön mönö söŋaupnöŋ jipjap qahö qeba malmapmö, malmal köhöikŋaŋgö asakŋi miaŋgö uruŋe malma.”

¹³°Mewö jiiga Farisi (Köna keugö kapaŋkölköl) yeŋön kewö jiget mörök, “Nanganök könaŋamgi naŋgöba jim asarimakzani, miaŋön mi qahö dop köl köhöiza. Qahö!”

¹⁴°Mewö jiget möta kewö jii mötket, “Nöŋön denikeyök eta kayali aka denike anda öŋgömami, mi möt teközal. Miaŋgöra nanak könaŋamni naŋgöba jim asarimakzali, keu mi mönö ölop dop köl köhöiza. Mi köhöizapmö, iŋini nöŋgö könani mi ölna qahö möt kutuze. ¹⁵°Eŋön ambazip sileŋini miyöhök eka mewö miaŋön bahösapsap kewöt eŋgiba keuŋini laŋ jim tekömakzemö, nöŋön ambazip kungö keuŋi qahö jim tekömakzal.

¹⁶°“Ni nanök qahö maljalmö, Iwi melaim niŋgiyöhi, yaŋön mönö nömbuk kini maljit. Miaŋgöra kungö keuŋi jim teköbilenak ewö, mi mönö diŋdiŋanök kewöta dopŋe jim teköbilenak. ¹⁷°Yahötŋan keu kun urumohot aka naŋgöba jiyohotka dop köl köhöimakza. Keu mi eŋgö Köna keuŋine mewöyök ohoget ahöza.

¹⁸°“Nöŋön nani könaŋamni naŋgöba jimakzal aka Iwi melaim niŋgiyöhi, yaŋön mewöyök nöŋgö könaŋamni naŋgöba jimakza. Miaŋgöra yahöt akziga miaŋön ölop dop köla köhöim teköza.”

¹⁹°Jisösnöŋ mewö jii möta kewö qesim waŋgiget, “Göhö Iwigi mi denike malja?” Qesim waŋgigetka meleŋnök, “Iŋini ni aka Iwini netkö könaŋamniri qahö möta malje. Iŋini nöŋgö könaŋamni möt kutubeak ewö, mönö nöŋgö Iwini mewöyök möt waŋgibeak.”

²⁰°Jisösnöŋ jöwöwöl jikegö naluk dum kösutŋe kinda ambazip kusum eŋgiba keu mi jiyök. Mi jiyökmö, nalöŋan qahö kam kuŋguyöhangöra aka kunŋan i qahö memba jöhöyök. Mewö.

“Denike öŋgömami, iŋini miaŋgöreŋ öŋgöbingö osime.”

²¹°Jisösnöŋ keu kun kewö toroqeba jii mötket, “Nöŋön eŋgömosöta anda malbiga iŋini ni göraim niŋgiba malme aka siŋgisöndok akeri, miaŋgöreŋ qekötahöba kinda kömum köhöime. Miaŋgöra denike öŋgömami, iŋini miaŋgöreŋ öŋgöbingö osime.”

²²°Juda jitŋememe yeŋön mi möta jiget, “Kewö jiza, ‘Denike öŋgömami, iŋini miaŋgöreŋ öŋgöbingö osime.’ Keu mi denöwö? Imbi aumamgöra jiza me?”

° 8.12 Mat 5.14; Jon 9.5 ° 8.13 Jon 5.31 ° 8.17 Dut 19.15

²³Mewö jigetka jii mötket, “Iṅini gölme kiangö tonji aka maljemö, nõñon miri gölme euyangö buṅaya akzal. Eṅon gölmenon ahuba gölme kiangö buṅaya aka maljemö, nõñon mutuhök gölme kiangörej qahö ahuyal. ²⁴Qahö ahuba malmalgö kõnañi nalö dop mala korali, nõñon mönö mia akzal. Nõngöra mewö qahö möt narize ewö, mönö siṅgisöndok akeri, mi qahö mosötpiga miangörej qekötahöba kinda kõmum kõhöime. Kõnañi miangöra aka kewö jibi mötze, ‘Iṅini siṅgisöndok akeri, mönö miangörej qekötahöba kinda kõmum kõhöime’. Keu mi ölna.”

²⁵Keu mi möta kewö qesim waṅgiget, “Gi mönö niñia akzan?” Qesim waṅgigetka meleṅnök, “Kõnañamni lök indelbiga mötzei, nõñon mönö mia akzal. ²⁶Nõñon eṅöra keu gwötpuk ölop toroqeba jibileṅak aka siṅgisöndok gwötpuk akeri, miangö keunji ölop jim teköbilenakmó, melaim niṅgiyöhi, yañon mönö nõngö melaimelai Toni ölni akza. Yañon keu jiiga yaṅgöreñök möta kota maljali, nõñon mönö keu mi aukṅe jibiga gölmeñi gölmeñi yeñon mörakṅe.”

²⁷Mewö meleṅnökmo, Iwigöra keu suariba jiyöhi, yeñon mi qahö möt asariget. ²⁸Jisösnon toroqeba kewö jii mötket, “Nõñon malmalgö kõnañi nalö dop mala korali, mönö mia akzal. Miangö kõnañi mi kõnaṅep ölop möt asarime. Nõñon yuai kun nani ösumnan me nani imbinangö dop qahö ahakzalmö, Iwinan keu kusum niṅgiba malöhi, mönö miangö dop keu jitni ki jimakzal. Keu kötji yahöt miangö kõnañi mi kõnaṅep möt asarime. Iṅini Sup gölmegö Azi Ölni kösökögetka eu öngöba kõmumawi, nalö miangörej mi ölop möt asarime.

²⁹Melaim niṅgiyöhi, yañon mönö nõmbuk kini maljit. Ahakmeme möri dop köl waṅgimakzawi, nõñon mönö sundan mia ahakzal. Miangöra yañon qahö nõmosöriga nanök qahö maljal.”

³⁰Keu mewö jiyöhaṅgöra aka ambazip gwötpukṅan uruñini meleṅda Jisös möt narim waṅgiget. Mewö.

Abrahamgö gwölönarökurup muneni aka Jisös.

³¹Jisösnon Juda ambazip tosatṅan möt narim waṅgigeri, yeṅöra keu kewö jii mötket, “Nõngö Buṅa keunan uruñine geiga miangörej qekötahöba kinje ewö, mönö ölna nõngö gwarekurupni akze. ³²Mewö mala keu ölnangö kõnañi möt kutugetka Buṅa keu ölnan iṅini bölöñangö kösönöhök pösat eṅgiiga solanñi (fri) aka malme.”

³³Mewö jii möta meleṅda kewö jiget, “Nini Abrahamgö gwölönarökurupñi mala kõnagesö walñi akzin. Mewögöra azi kunon kösö gwarö mem eṅgiiga maljinangö jizani, mi qahö. Nini mönö nalö kunon etqeṅeñi mewö qahö aka malin. Aiga gi denöwögöra aka kewö jizan, ‘Kösönöhök pösat eṅgiiga solanñi aka malme?’ Keu mi qahö dop kölja.”

^r 8.33 Mat 3.9; Luk 3.8

³⁴Mewö jigetka kewö melej enġiyök, “Nöñön keu öl töhönñi kun kewö jibi mötket: Siñgisöndok akzei, körek yeñön siñgisöndokö welenqeçe omanñi töwa qahö aketka miangö kösöñan köpeim enġimakza. ³⁵Köpeim enġimakzapmö, welenqeqenöñ toñangö miri uruñe nalö dop qahö mal öñgöma. Nanñi Nahönñan ölop miriñe nalö teteköñi qahö malma.

³⁶“Nahönñan bölöñangö kösönöhök pösat enġiiga solanime ewö, eñön mönö ölna kösö gwarö qahö solanñi (fri) aka malme. ³⁷Iñini Abrahamgö gwölönarökurupñi maljei, mötzalmö, bölöñan uruñini gwözönjawangöra nöñgö Buña keunan mösösönihim enġiba kondondongöba erakza. Könañi miangöra mönö kapan köla ni nuñgubingö mötze. ³⁸Nöñön Iwinangö qöhöröñe mala yuai eka mala korali, miangö keuña jimakzal. Eñön mewöyök iwiñinan keu jii mötkeri, miangö dop ahakze.”

³⁹Jisösnöñ mewö melej enġiiga kewö jiget mörök, “Abrahamnöñ mönö nanine iwiambönini akza.” Mewö jiget möta jiyök, “Iñini Abrahamgö gwölönarökurupñi akeak ewö, mönö yangö ahakmemenñi wuatangögetka dop kölbawak. ⁴⁰Miangö tandökñi kewö akza: Nöñön Anutugö jitneyök keu möta miangö dop keu ölbölñi mi jibi mörakze. Nalö kewöñe iñini kapan köla azi ni nuñgubingö mötzemö, Abrahamnöñ mewö qahö ahök. ⁴¹Nanñini iwiurupñinangö ahakmeme miyök wuatangöba malje.” Mewö jiiga jiget mörök, “Serowilinöñ qahö ahuba iwi qahö (bastet) mi qahö akzinmö, Iwininambuk maljin. Anutunöñ mohok-kun nanñak iwi ak neñgiza.” Mewö.

“Bölöñi Toñangö buñaya akze,” jiyök.

⁴²Jisösnöñ kewö jii mötket, “Anutunöñ nanñak iwi ak enġibawak ewö, nöñön yangöreñök eta asuhuyalangöra mönö ölop ni uru jöpaköm niñgibeak. Nani ösumnöñ nam köliga qahö asuhuyalmö, Anutunöñ melaim niñgiiga eta maljal. ⁴³Keu jimakzali, mi wuanöñgöra möt asaribingö lömbörimakze? Nöñgö keunan uruñini undenjawangöra mi möt kutubingö ölan qeba zikzik tökömakze. Mewögöra mi möt asaribingö osimakze?

⁴⁴“Mönö iwiñini Bölöñi Toñangö buñaya akze. Sihim kömbönañinan mönö iwiñinangö sihimñi bölöñi wuatangöbingöra ahöza. Yangön könakönahineyök ambazip enġuget kömukömu asia aka kota malja. Keu ölnan uruñe qahö kinjawangöra aka keu ölni onġita lolonqalolon kinja. Munenñ jiji asia aka munenñ jijigö iwiñi akzawangöra munenñ jimakzawi, mi mönö nanñi uruñangöra jimakza.

⁴⁵“Yangön munenñ jimakzapmö, nöñön keu ölni jimakzal aigun iñini ni qahö möt narim niñgimakze. ⁴⁶Iñini körekñan nöñgö könani kewö kondelbingö osize: Yangön siñgisöndok aka keuñambuk malja. Könañamni mewö jaruzemö, nöñön keu ölni jimakzali, mi mönö wuanöñgöra qahö möt narim niñgize?

47“Kunjan Anutugö buña akzawi, yañön mönö Anutugören keu kezap ala mörakza. Injini Anutugö buña qahö akzeañgöra aka keu mi qahö möta möt asarimakze.” Mewö.

Jisösnöñ nanñangöra denöwö jim miwikñaiyök?

48 Jisösnöñ Juda ambazip yeñgö könañini indeliga likepni melejda kewö jiget mörök, “Gi Samaria prowingsö lolonqalon azia aknöñga ömewörömenöñ uruge geiga maljan. Mewö jiba dopñe jizin me qahöwi, mi ölop nangak jinöñ mörin.”

49 Mewö möta kewö melejñök, “Ömenöñ urune qahö geiga maljal. Ni Iwinanök göda qem wañgiba maljal aigun töndup eñön gamu qem niñgimakze. 50 Mewö ahakzemö, nanak qetbuñanambuk akñamgö jaram qahö timakzal. Mohot kunjan mewö akñamgö bimñi qeba malja. Azi yañön mohot kewöt niñgiba ‘Dop köljan,’ jiba jim teköm niñgimakza. 51 Nöñön keu öl töhöññi kun kewö jibi mötket: Kunjan nöñgö Buña keuni tem köla wuatañgömakzawi, yañön mönö nalö kunöñ kömup köhöikñangö buñaya qahö akña.”

52 Mewö melejñiga Juda jitñememe yeñön Jisös kewö jiget mörök, “Abraham aka kezapqetok ambazip yeñön kömuget aigun göñön töndup kewö jinöñga siksauk akza, ‘Kunjan nöñgö Buña keuni tem köla wuatañgömakzawi, yañön nalö kunöñ kömup köhöikñangö buñaya qahö akña.’ Mewö jizañgöra gi öme kunöñ uruge geiga maljan. Mi döлки ölop möt asarizin. 53 Neñgö bömöñini Abraham kömuyöhi, göñön mönö i oñgita yañgö ketañamñi akzan me? Kezapqetok yeñön mewöyök kömuget. Gi nangahöra mötnöñ öñgöiga ‘Ketañi niñja akzal?’ jiba mötzan?”

54 Mewö jiget möta kewö melejñök, “Nañangöra mötpi öñgöiga Anutugö aködamunñi mi nana buña qem añgubileñak ewö, qetbuñani mi mönö nesak akawak. Iwinan nanñi aködamunñi niñgiyöhañgöra aka qetbuñanambuk aka maljal. Eñön yañgöra ‘Neñgö bem Anutunini akza,’ jize. 55 Eñön könañi mi ölop qahö möt kutumakzemö, nöñön i ölop möt wañgizal. ‘I qahö möt wañgizal,’ jibileñak ewö, mönö injini ewö tilipqilip azi akileñak. Ni azi mewöñi qahö akzalmö, i ölop möt wañgizal aka yañgö keunji tem kölakzal. 56 Eñgö bömöññini Abrahamnöñ ni gölmenöñ eta malmangöra mamböta nalö mi ekñamgöra uru sösonggai aka malök. Nalö kewöñe Suepnöñ mal köhöiiga nöñön asuhubiga nöñgö nalöni eka miangöra söñgaiyök.”

57 Mewö melejñiga Juda jitñememe yeñön kewö jiget mörök, “Yambugi (yara) 50 qahö oñgita miangö bapñe maljan aka ‘Abraham ehal,’ jinöñga qahö dop kölja.”

58 Mi möta jii mötket, “Nöñön keu öl töhöññi kun kewö jibi mötket: Abrahamnöñ qahö asuhuiga nöñön lök nalö miangören malal.”

⁵⁹Mewö jii möta kötnönj gila qebingöra köt umburaŋgöba megetmö, Jisösnönj tölapköba jöwöwöl jikegö tohoŋi mosöta ölonj köla anök. Mewö.

Jisösnönj jegömöl azi kun mem ölöwahök.

9 ¹Jisösnönj toroqeba köna anda azi kun nam körö uruŋeyök jegömöl asuhuyöhi, mi ehök. ²Mi ehiga gwarekurupŋan qesim waŋgiba jiget, “Ketaŋamnini, yaŋön mönö dagö siŋgisöndoköra aka jegömöl mewönji asuhuyök? Nanŋi siŋgisöndoköra me iwinamŋi yetkö siŋgisöndoköra?”

³Jigetka kewö melerŋök, “Nanŋak siŋgisöndok kun qahö ahök aiga iwinamŋan siŋgisöndok qahö ahotmö, Anutugö kukösumŋan yaŋgö malmalŋe aukŋe asuhumapköra mewö ahuyök. ⁴Wehönönj asariba ahözawaŋgöreŋ mönö melaim niŋgiyöhaŋgö nuwa töp memba malbin. Suŋgem akŋawi, miaŋgöreŋ körek nup membingö osibin. ⁵“Nönönj gölmenönj malmamaŋgö dop gölmeŋi gölmeŋi eŋgö asakŋini aka asariba malmam.”

⁶Mewö jiba gölmenönj söutköi geiga gwakötak melerŋda jegömöl azigö jeŋe timbiliyök. ⁷Timbiliba kewö jim kutuyök, “Gi mönö Siloam o aŋgönönj anda jegi saŋgoŋman.” (Siloam qet mi nanine keunönj Melaimelai azi.) Mewö jim kutuiga anda jeŋi saŋgoŋni tohoiga ui asariiga liliŋgöba miriŋe kayök.

⁸Mewö kaiga alaurupŋan kösutŋe malgeri aka tosatŋan mutuk nene yuaigöra ulet eŋgiba mali ekeri, yeŋön i eka jiget, “Jegömöl azi nenegö uleta tata malöhi, yaŋön azi mia me?”

⁹Tosatŋan jiget, “Yaŋön mönö mia.” Tosatŋan jiget, “Qahö, kaisoŋgolomŋi i ewö akzapmö, yaŋön qahö.” Mewö mewö jigetka nanŋak jiyök, “Nönönj mönö ia akzal.”

¹⁰Mewö jiiga kewö qesiget, “Jegi mönö denöwö aknönŋa tohoza?”

¹¹Qesigetka kewö melerŋ eŋgiyök, “Azi qetŋi Jisös qerakzei, yaŋön söutköi gwakötaknönj geiga melerŋda jene timbiliba jim kutuba kewö jiyök, ‘Gi mönö Siloam o aŋgönönj anda jegi saŋgoŋman.’ Mewö jiiga o miaŋgöreŋ anda jeni saŋgoŋbi tohoiga ubi asariyök.”

¹²Mewö melerŋ eŋgiiga kewö qesiget, “Azi mi denike malja?” Qesim waŋgigetka “Qahö mötzal,” jiyök. Mewö.

Farisi yeŋön jeŋi tohoyöhaŋgöra qeqesi alget.

¹³Azi jegömöl malöhi, yaŋön “Qahö mötzal,” jiiga ambazipnönj i waŋgita Farisi (Köna keugö kapaŋkölköl) yengöreŋ anget. ¹⁴Jisösnönj söutŋan gwakötakpuk melerŋda jeŋe timbiliba metohoyöhi, mi mönö Sabat kendon nalöŋe meyök. ¹⁵Miaŋgöra Farisi yeŋön mewöyök kewö qesim waŋgiget, “Jegi mönö denöwö aknönŋa tohoza?” Qesim waŋgigetka

° 9.5 Mat 5.14; Jon 8.12

kewö meleş engiyök, “Azi miañön mönö söutñan gwakötakpuk meleşda jene timbiliiga anda jemesoholni sañgonða jeni ubi asariza.”

¹⁶Mewö meleş engiiga Farisi yengöreñök tosatñan jiget, “Azi miañön Sabat kendon köteközawi, miañgöra mönö Anutugöreñ azia qahö akza.” Tosatñan jiget, “Mewö qahö! Azi goñgoñi kunñan mönö denöwö aka añgöletot mewöñi memamgö köhöibawak?” Mewö mewö jiba nanñini jula deñget.

¹⁷Mewö deñgetka jegömöl azi miañgöreñ kunbuk lilingöba jiget, “Jegi metohoyöhi, yañgöra mönö denöwö jiman?” Mewö jigetka “Kezapqetok azia akza,” jiyök.

¹⁸Mewö jiiga jeñi ölna gömöliyöha tohoiga uyöhi, Juda jitñememe yeñön mi qahö möt nariget. Qahö möt nariba uruyahöt kinda iwinamñi öröm etkigetka kayohot. ¹⁹Kayohotka kewö qesim etkiget, “Azi ki etkö nahönñira me qahö? ‘Jegömöl asuhuyök,’ jizahotmö, denöwö aka mönö dölki jeñi uba ekza?”

²⁰Qesim etkigetka kewö meleşnohot, “Azi ki netkö nahönira akza aka jegömöla asuhuyök, mi ölop mötzit. ²¹Mewö mötzitmö, denöwö aka dölki jeñi uba ekzawi, mi qahö mötzit. Dañön jeñi metohoi uzawi, niri mewöyök qahö mötzit. Gömokñi qahö, lök qariba töwatñi jörak alalña aka mötkutukutuñambuk akza. Miañgöra mönö nanñangö qesigetka könani ölop jima.”

²²Juda jitñememe yengöra keñgötñiri möta mewö jiyohot. Yeñön sutñine keu kewö jöhöba urumohot aka kinget, “Kunñan Jisös Amötqeqe Toñi Kraist akzawi, mewö jim miwikñaima ewö, i mönö köuluk miri kambunöhök közöl wañgibin.” ²³Keu miañgöra aka kewö jiyohot, “Gömokñi qahö, lök qariza. Miañgöra mönö nanñi qesim wañgime.”

²⁴Miañgöra azi jegömöl malöhi, mi kunbuk öröget kaiga kewö jiget mörök, “Azi mi siñgisöndok azia akza, mi mötzin. Miañgöra mönö Anutugö qetbuñani möpöseinönga aködamunñambuk ahi dop köлма.”

²⁵Mi möta kewö meleşnök, “Siñgisöndok azia akza me qahö, nöñön mi qahö mötzal. Mohot kewöyök mötzal: Nöñön jegömöl malalmö, dölkwöñe kunbuk ölop uba ekzal.”

²⁶Mewö meleşniga kewö qesim wañgiget, “Wani yuaia ak gihiza? Jegi mönö denöwö metohoza?”

²⁷Qesim wañgigetka kewö meleş engiyök, “Nöñön lök meleş engizalmö, eñön keu jizali, mi qahö mötze. Wuanöñgöra mi kosikñi kunbuk jibi mötpingö kapañ kölje? Eñön mönö mewöyök yañgö gwarekurupñi akingö mötze me?”

²⁸Mewö meleş engiiga mepaqepaik aka uruqeqe keu töhöreñ kewö jim wañgiget, “Gi mönö yañgö gwarekña akzanmö, neñön Mosesgö gwarekurupña maljin. ²⁹Anutunöñ Mosesya Buña keu wañgii mötzinmö, azi miañön mönö igen me waigenök asuhuyöhi, mi qahö mötzin.”

³⁰Mewö jigetka keu kewö jii mötket, “Yañön denikeyök asuhuyöhi, injini miangöra tok kök qeba tönpin akzeangöra mi welipközal. Ölja welipközalmö, töndup nöngö jeni metohoiga ölop uba ekzal. ³¹Ambazip goŋgoŋi yeñön Anutu köulukögetka qahö möt engimakza, mi mötzin. Mi mötzinmö, kunŋan Anutu göda qem waŋgiba diŋgiba keu jitŋi tem köla wuatangömakzawi, yaŋgö köulukŋi mönö kezap ala mörakza. ³²Kun jegömöl asuhuiga kunöŋ kaba jeŋi metohoyöhi, kösohot mewöŋi mi mutuhök qahö möta malin. Suep gölmenöŋ asuhuyohot, nalö miangöreŋök könahiba kota mala merak miangöreŋ kösohot mewöŋi kun qahö mörin. ³³Anutugöreŋök qahö kabawak ewö, yañön mönö yuai mewöŋi memangö osibawak.”

³⁴Mewö jii möta kewö jim waŋgiget, “Twinamgan siŋgisöndokpuk gölöm alohotka siŋgisöndok pakpak miambuk ahuba qarinoŋañön merak ninia kusum neŋgimangö mötzan. Mi qahö dop kölja.” Mewö jim waŋgiba közölgetka gumnöŋ erök. Mewö.

Urujenöŋ gömöliiga ilingösöŋ jipjap malmal.

³⁵Közölgetka gumnöŋ eröhi, keu mianöŋ Jisösgö kezapŋe gei möta azi mi miwikŋaiba kewö jii mörök, “Gi Anutugö Nahönŋi möt narim waŋgizan me qahö?”

³⁶Mi möta kewö qesiba meleŋnök, “O Ketaŋamni, azi mi dañön? Mi jinöŋ mötagun i ölop möt narim waŋgimam.”

³⁷Meleŋniga kewö jim kutum waŋgiyök, “Gi kewö uba neknöŋ. Göbuk keu jizali, azi mia mönö nöñön akzal.”

³⁸Mi möta jiyök, “O Kembu, ni möt narim gihizal.” Mewö jiba sipköba köuluköm waŋgiyök.

³⁹Jisösnöŋ jiyök, “Nöñön ambazip kewöta keuŋini jim tekömangöra aka eta gölmenöŋ asuhuyal. Nöngöra aka tosatŋan jegömöl akzei, yeŋgö jeŋini tohoiga ölop uba ek kutume. Tosatŋi jeŋini ölöŋŋi maljei, yeñön nöngöra aka bau jegömöl aka malme.”

⁴⁰Mewö jiiga Farisi tosatŋan kösutŋe miangöreŋ kinda keu mi möta kewö qesiget, “Wae! Nini tok jegömöl azia akzin me? Neŋgöra jizan me?”

⁴¹Mewö qesigetka kewö jii mötket, “Injini ‘Jegömöl akzin,’ jibeak ewö, mönö siŋgisöndok qahö ahöm eŋgibawakmö, nalö kewöŋe ‘Ölop ek kutuzin,’ mewö jimakzeangöra aka siŋgisöndokŋinan mönö ahöm köhöim eŋgima.” Mewö.

Lama aka galömŋini ölöŋŋi.

10 ¹Jisösnöŋ galöm meme keu kewö jiyök, “Nöñön keu ölä töhöŋŋi kun kewö jibi mötket: Tosatŋan lama tohoŋ uruŋe öŋgöbingöra naŋgunöhök qahöpmö, sel walöŋda gezei, yeñön mönö kegwek aka yoŋgorö meme ambazip akze. ²Kunŋan naŋgunöŋ gezawi, yañön lama

mienjö galömnjina akza. ³Yañön kaŋgoriga naŋgu galömŋan eka naŋgu öröm waŋgiiga eta qeriga lama yeŋön keu jölŋi ölop möt kutumakze. Galömŋinan nanŋi lamaaurupŋi engohola qetŋini qeta enġuaŋgiriga tohoŋini mosöta ölop yaigepŋe anakze.

⁴“Nanŋi lamaaurupŋi pakpak enġuaŋgiriga tohoŋini mosöta yaigepŋe angetka yaŋön jitŋememeŋini aka mutuk aniga keu jölŋi möt kutuzeaŋgöra andöŋe wuatanaŋgöba anakze. ⁵Nanŋini galömŋini ölop wuatanaŋgömakzemö, kian kunŋan kaiga i qahöpmahöp wuatanaŋgöme. Kian yeŋgö keu jölŋini qahö möt kutuzeaŋgöra mönö zirinŋirinŋ aka yaŋgöra kök ala deŋme.”

⁶Jisösnöŋ keu tölapŋi mi jii mötketmö, keuŋaŋgö könaŋi qahö möt asariba köŋkuŋ qeget. Mewö.

Jisösnöŋ lama galöm ölopŋi akza.

⁷Köŋkuŋ qegetka toroqeba enġöra kewö jiyök, “Nöŋön keu öl töhöŋŋi kun kewö jibi mötket: Nöŋön lama tohoŋgö naŋguŋi akzal. ⁸Nöŋgö andöne kambu galöm pakpak mutuk kageri, yeŋön kegwek aka yoŋgorö meme ambaziwa aket. Mewö akeranaŋgöra lama yeŋön i qahö möt kutum enġiba malget.

⁹“Nöŋön mohot lama tohoŋgö naŋguŋi akzal. Denike enġön Anutubuk köhöiba malbingö jiba nömbuk qekötahöba maljei, nöŋön mönö amöt qem enġibiga letotme. Mewö aka lama tohoŋ uruŋe öŋgöba eta yaigep anda nene gölmeŋi möriamŋambuk miwikŋaimakŋe. ¹⁰Yoŋgorö meme yeŋön wuanöŋgöra kamakze? Yeŋön yoŋgorö memba neŋguba ayuhum neŋgibingöra kamakze. Yuai murutŋi akingöra qahö. Nöŋön mewö qahö akzal. Nöŋön iŋini malmal köhöikŋi miwikŋaiba oyaenġkoyaenŋ aka malmegöra kaba maljal.

¹¹“Nöŋön lama galöm ölopŋi akzal. Lama galöm ölopŋan mönö lamaaurupŋi yeŋgöra aka malmalŋi köleŋda enġima. ¹²Kunŋan lama toŋi qahö aka bohon memegörök kaba laŋ galöm köl enġimakzawi, mi kewö: Kiam kalŋan kaiga eka lamaaurup enġömosöta unjurata aniga kiam kalŋan lama enġöhöba kiom enġuba mendeŋ enġima. ¹³Yañön yaigewök kaba bohon memegörök ‘Lama galöm köl enġimam,’ mi jitnöŋ jiba lama enġöra waimanŋat qahö möta nesampurek qakŋe mala laŋ unjurata anma.

¹⁴⁻¹⁵“Nöŋön lama galöm ölopŋi akzal. Iwinaŋ ni möt niŋgiiga nöŋön Iwini möt waŋgiba maljal. Miaŋgö dop nöŋön nani lamaaurupni möt enġibiga yeŋön ni möt niŋgimakze. Nöŋön malmalni lamaaurupni enġöra aka köleŋda mosötmam. ¹⁶Nöŋgöreŋ lama kambu tosatŋi mi mewöyök ahuba malme. Yeŋön lama tohoŋ kiaŋgö toŋi qahö maljemö, töndup nöŋgö keu jölŋi mörakŋe. Nöŋön i mewöyök enġuaŋgitpiga miaŋgö dop

¹ 10.15 Mat 11.27; Luk 10.22

anda kamakŋe. Könŋep kambuŋi kambuŋi mienjōn mindiriba kambu mohot aketka galōm mohotŋan galōm kōl enŋiiga malme.

¹⁷“Iwinōŋ kewōgōra aka ni urunōŋ jōpakōm niŋgimakza: Nōŋjōn malmalni mosōta kunbuk guliba mal ōŋgōmam. Mi Iwigō jeŋe dop kōlja. ¹⁸Malmalni kunŋan qahō noaŋgitmapmō, mi nanak kōleŋda mosōtmam. Iwinan jim kutum niŋgiiga nanak malmalni kōleŋda mosōtmam aka miaŋgō andōŋe kunbuk guliba mal ōŋgōmam. Kukōsum mewōŋi mi nōŋgōreŋ ahōza.”

¹⁹Jisōsnōŋ keu mi jiyōhaŋgōra aka Juda jitŋememe yeŋgō sutŋine goranora kunbuk asuhuyōk. ²⁰Yeŋgōreŋōk gwōtpukŋan kewō jiget, “Ōmewōrōmenōŋ uruŋe geyōhawa mala kahapmahap akza. Mōnō wuanōŋgōra keuŋi mōtpinak? Muat mosōtpin.”

²¹Tosatŋan jiget, “Keu mewōŋi mi kōlkōljiŋjiŋ azigō keu ewō qahō. Ōmewōrōmenōŋ mōnō jegōmōl ambazip yeŋgō jeŋini denōwō metohobawak?” Mewō erauget.

Juda jitŋememe yeŋjōn Jisōs andō qeget.

²²Mōnōwōk jōwōwōl jike kōl kōnjōrata naŋguŋi ōrōget. Mi yambu (yara) dop mōtmōriba kendongō sōŋgaibingōra^a Jerusalem tokoget. Nalō miaŋjōn kam kuŋguiga kōmunjaŋ kie uru nalō amōtŋi ahōk.

²³Jisōsnōŋ jōwōwōl jikegō tohoŋ uruŋe kiŋ Solomongō sombem sōraŋambuk qetkeri, miaŋgōreŋ anda lilikōyōk. ²⁴Anda lilikōiga Juda jitŋememe yeŋjōn kaba lilikōm waŋgiba kewō qesim waŋgiget, “Kōnaŋamgi kōyatinōŋga mōnō nalō dawik toroqeba mambōtpingō mōtzan? Gi Amōtqeŋe Toŋi akzan me qahō, mi mōnō aukŋe jinōŋga mōtpin.”

²⁵Mewō jim qesim waŋgigetka kewō meleŋ enŋiyōk, “Nōŋjōn lōk jibiga mōtketmō, iŋini nōŋgō keuni mi qahō mōt narize. Nōŋjōn Iwināŋgō qetŋe aŋgōletot ahakzali, miaŋjōn mōnō kōnaŋamni indela naŋgōba kondelakze. ²⁶Mi naŋgōba kondelakzemō, iŋini nōŋgō lama kambu uruŋe qahō maljeaŋgōra aka keuni qahō mōt narimakze.

²⁷“Nōŋjōn mōnō lamaurupni mōt enŋigibiga yeŋjōn mewōyōk nōŋgō keu jōlni mōta ni nuataŋgōmakze. ²⁸Nōŋjōn malmal kōhōikŋi enŋigibiga letota nalō kunōŋ qahō kōtōkŋi ayuhume. Kunŋan kun i nōŋgō bōrōneyōk qahō ōrōba kōndeŋ enŋima. ²⁹Nōŋgō Iwinan i nōŋgō bōrōne al enŋiyōhi, yaŋjōn kōrek enŋoŋgita ōŋgōŋgōŋi ketaŋi akza. Miaŋgōra kōrekŋan i nōŋgō Iwināŋgō bōrōneyōk ōrōba kōndeŋ enŋibingō osime. ³⁰Ni aka Iwi netkōn mōnō mohot aka maljit.”

³¹Jisōsnōŋ mewō jiiga Juda jitŋememe yeŋjōn kunbuk gōlmenōhōk kōt umburaŋgōba memba miaŋjōn gila qebingō aket. ³²Mewō aketmō, kewō

^a 10.22 Kendon qetŋi Hanuka mi Disemba 25 kōnahiba wehōn 8 miaŋgō dop tata sōŋgaiget. Miri pakpak kiwa ohotiriget asariiga ip sinŋi tokoba liŋet kōla sōsōŋgai aket.

jim enjgiyök, “Iwinön nam köl niñgiiga anğöletot ketanji gwötpuk aka membiga ekeri, miengöreñök mönö wania kun mötmöriba ni kötnön gila nunğubingö mötze?”

³³ Jim enjiiga Juda yejön melenja jiget, “Nejön anğöletot ketanji aknönanğöra aka qahö kötnön gila guhubingö akzinmö, Anutu mepaqepaik ak wañgizanañgö likepñi ak gihibin. Gi gölme azia aigun silegi öne mem öngöba Anutu tandök akñamgö jizan.”

³⁴ “Mewö jigetka Jisösnön melenj enjgiyök, “Buña Kimbinön Köna keu kun kewö ohoget ahöza, ‘Anutu nöjön jial: Inini mönö nöjgö bemurupni akze.’ ³⁵ Buña Kimbigö keu mi mönö pömsöm qahö qemapmö, pöwöwöm ahöma. Mianğöra Anutunön keunji ali kaba ambazip buñañina ahöhi, Anutunön yejgö qetñini ‘bemurup’ mewö qet enjgiyök. ³⁶ Ambazip omanji mewö qet enjgiyökmö, Iwinön azi mem sarahiba melaiiga gölmenön eröhi, ejön mönö denöwö aka yañğöra kewö jize, ‘Gi Anutu mepaqepaik ak wañgiba maljan.’ Nöjön ‘Anutugö nahönñi akzal,’ keu mewö jibiga ejön mönö wuanönğöra mi mötket qahö dop kölja? Inini Anutugören Buña keu mi qeze me?”

³⁷ “Nup memakzali, mi eketka Iwinanğö ahakmemegö dop qahö ahakza ewö, mönö kude möt narim niñgime. ³⁸ Iwinanğö ahakmemegö dop aka memba maljal ewö, könanjamni mewö eka mönö möt narim niñgime. Mi keunanğöra aka qahö möt naribeak ewö, mönö anğöletotnangöra aka töndup möt narim niñgime. Iwinön nömbuk qekötahöba kinja aka nöjön Iwibuk qekötahöba kinjali, inini mianğö könanji möt sölöngöba asarimegöra jizal.”

³⁹ Jisösnön mewö jiiga kunbuk memba jöhöbingö mötketmö, börö bapñineyök unjurata eta anök.

⁴⁰ “Enğömosöta Jordan o töwatñi kutuba kunbuk likepñe anda Jonön mutuk o melun mem enjgiba malöhi, mianğören anğota nalö tosatñi toroqeba mianğören malök. ⁴¹ Mianğören maliga ambazip gwötpukñan yañğören kañgota eka kewö jiget, “Jonön anğöletot mohot kun qahö meyökmö, keu pakpak azi kianğöra jiyöhi, mi mönö keu ölña jiba malök.” ⁴² Kañgotkeri, yeñğörenjök gwötpukñan uruñini melenja möt narim wañgiget. Mewö.

Jisösgö alañi Lazarusnön kömuyök.

11 ¹ Betani taongö azi kun qetñi Lazarus mianjön kawöl yöhöi ahöyök. Maria aka Marta darumun yetkön Betani taon mianğörenjök malohot. ² Maria mianjön Kembu o köhöwakñambuknön miriba nörop jupñan könanji kereñ meyök. Lazarus kawöl yöhöi ahöyöhi,

† 10.33 Lew 24.16 † 10.34 Sum 82.6 † 10.40 Jon 1.28 † 11.1 Luk 10.38-39

‡ 11.2 Jon 12.3

mi yangö nenna. ³Lazarusnön kawöl yöhöi ahöiga nenyahötjan buzup keu kewö alohotka Jisösgöreñ anök, “Kembu mötnön, alagi yangö ak gihimakzawi, yangön mönön kawöl yöhöi ahöza.”

⁴Buzup mi anökmö, Jisösnön mi möta kewö jiyök, “Kawöl mianjön azi alani kömumapköra aka qahö asuhum wangii ahöza. Mianjöra qahöpmö, Anutugö Nahönjan i mem ölöwaka mianjöra Suepkö aködamanjambuk aiga ambazipnön könañi mi ek kutuba Anutu möpöseigetka qetbuñjan asarim sehima. Kawöl mi mianjöra aka asuhum wangiyök.”

⁵Jisösnön Marta, yangö munji aka nenñiri Lazarus yengöra ak wangiiiga malök. ⁶Mewö malökmö, töndup kawölhangö buzupñi möta miri malöhi, mianjögöreñök sömañ yahöt toroqeba malök. ⁷Mi mali nalö mi teköiga gwarekurupñi yengöra kewö jii mötket, “Nini mönön Judia prowinsnön lilingöba anbin!”

⁸Mewö jiiga meñget, “Ketanamnini, Juda yeñön uruwale kapañ köla kötnön gila guhubingö mötket. Mianjöra kunbuk Judia lilingöba anmamgö jizani, mi qahö dop kölja.”

⁹Mewö meñgetka Jisösnön keu kewö jiyök, “Wehöngö auañi 12 ahözei, kunjan mianjögö asakñe köna anmawi, yangön mönön yuai kunjan qem mizit qahö ak wangima. Gölmegö asakñan asarim wangiiiga ölop eka anma. ¹⁰Ölop anmappmö, kunjan kiwañi qahö ahöm wangiiiga sungem jipjap anmawi, yangön mönön qem mizit miwikñaima.” ¹¹Keu mi jibagun kewö jii mötket, “Alanini Lazarusnön gaunwat ahözapmö, nöñön anda gaunöhök möndöbi wahötma.”

¹²Keu mi möta kewö jiget mörök, “Kembu, ölna gaun ahöza ewö, mönön ölop ahöba ölöwakña.”

¹³Jisösnön Lazarus kömuyöhangö keu saiñi jiyökmö, gwarek yeñön ‘Gauna ahöza,’ jiyöhi, mianjögö möt bibihiba keu könañi qahö möt kutuget. ¹⁴Qahö möt kutugerangöra Jisösnön aukñeyök jim miwikñaiiba jiyök, “Lazarusnön kömuyöha ahöza. ¹⁵Nöñön yambuk qahö malbiga kömuyöhangöra nöñön anda mem gulibiga wahöri eketka mötnaripñinan asuhum köhöima. Mewö aiga engöra söngaiiba ‘Simbawoñ akñe!’ jizal. Mönön wahötketka yangögöreñ anin.”

¹⁶Mewö jim miwikñaiiga Tomas qetñi kun Siwisiwi qetkeri, yangön gwarek alaurupñi yengöra kewö jii mötket, “Nini ölop mohotñe mianjögöreñ anin. Andagun yambuk kömuin.” Mewö.

Malmal Toñan nenyahötñi uruñiri qesawöliiyök.

¹⁷Lazarusnön kömumba wehön 4 lök qaksirinön ahöi teköiga Jisösnön kanjoriga buzupñi mewö jiget mörök. ¹⁸Betani taon mi Jerusalem siti mosöta 3 kilomita anangö dop dowe ahöyök. ¹⁹Mianjöra Juda ambazip gwötpukñan Marta Maria nenñiri kömuyöhangöra ‘Songon etkekin,’ jiba kaba tatket.

²⁰Tatketka Martanöŋ “Jisös kaza,” jiget möta miri mosöta könanöŋ anda miwikŋaiyökmö, Marianöŋ mire tarök. ²¹Könanöŋ miwikŋaiba kewö jii mörök, “Kembu, gi kiangörej malbanak ewö, nenan mönö qahö kömumbawak. ²²Qahö kömumbawakmö, göŋön nalö kewöŋe mewöŋanök Anutugö yuai kungöra köuluköman ewö, mi pakpak ölop miwikŋaim gihiiga asuhuma, mewö mötzal.”

²³Keu mi möta Jisösnöŋ jii mörök, “Göhö nengan mönö guliba wahötma.”

²⁴Mi möta Martanöŋ jiyök, “Gölmegö nalö teteköŋe kömukömuŋi yeŋön wahötmei, yaŋön mönö nalö ketaŋi miangörej guliba wahötmawi, mi möt yaközal.”

²⁵Mewö jiiga Jisösnöŋ jii mörök, “Kömupnöhök wahötwahötkö Toŋi mi nöŋön akzal. Nanak Malmal köhöikŋangö Toŋi akzal. Miangöra kunŋan ni möt narim ningizawi, yaŋön kömumapmö, töndup toroqeba mal köhöiba malma. ²⁶Kunŋan kun gölmenöŋ mala möt narim niŋgiza ewö, yaŋön mönö nalö kunöŋ qahö kömum köhöima. Qahö! Keu mi möt narizan me qahö?”

²⁷Martanöŋ keu mi möta jiyök, “O Kembu, mi möt narizal. Göŋön Anutugö Nahönŋi akzan. Amötqeŋe Toŋi Kraist gölmenöŋ asuhumapkö jigeri, göŋön mönö mia akzan. Mewö möt narizal.” Mewö.

Jisösnöŋ sahöri imbilŋan erök.

²⁸Martanöŋ keu mewö jiba miriŋe lilingöba anda munŋi Mariagöra keu ölöŋ jiiga göraŋe kaiga jiyök, “Böhinöŋ kaba könanöŋ kinda göhöra endu anda ekŋangöra jiza.”

²⁹Mewö jiiga Marianöŋ keu mi möta miangörejök i mosöta Jisösgöreŋ anök. ³⁰Anökmö, Jisösnöŋ miri sombemnöŋ qahö kaŋgoriga endu Martanöŋ köna namŋe miwikŋaiba ehöhi, miangörejök kinök. ³¹Juda ambazip yeŋön Mariabuk miri uruŋe uru qesawölökö tatketka Marianöŋ zilaŋ wahöta gumnöŋ eta aniga eka kewö mötmöriba jiget, “Yaŋön mönö qaksirinöŋ anda sahötma.” Mewö jiba yaŋgö andöŋe wuatangöba anget.

³²Marianöŋ anda Jisös kinöhangörej aŋgota eka könaŋe sipköba eta kewö jii mörök, “O Kembu, göŋön ki malbanak ewö, nenan mönö qahö kömumbawak.”

³³Mewö jiba silata qeta sahöriŋa Juda ambazip yambuk kaba naŋgöba mohotŋe sahötkeri, Jisösnöŋ mi eka wösöŋi pölpölgöiga jeŋi asölliŋa köna böroŋi jönömŋambuk unduyök. ³⁴Jönömŋambuk undui qesim eŋgiyök, “I denike alget ahöza?” Qesim eŋgiiga jiget mörök, “Kembu, kewö kaba eknöŋ!”

³⁵Mewö jigetka Jisösnöŋ sahörök. ³⁶Sahöriŋa Juda ambazip yeŋön eka jiget, “Ye! Mönö alaŋangöra önöŋi qahö ak waŋgii malök.”

³⁷Mewö jigetmö, tosatŋan keu mi qeba kewö jiget, “Jegömöl ambazip jeŋini metohoba malök ewö, mönö ölop Lazarus jiiga qahö kömumbawak me?” Mewö.

Jisösnöŋ Lazarus mem guliiga kömupnöhök wahörök.

³⁸Mewö laŋ jigetka Jisösgö wösöŋi kunbuk põlpölgöiga jeŋi asöliiga qaksirinöŋ anök. Qaksirinöŋ anda yuai kewö ehök: Köt köteŋ urorohoba qamötŋi miaŋgö uruŋe ala naŋguŋi köt ketaŋan köl közipkögetka tarök. ³⁹Mi eka kewö jiyök, “Mönö köt qililingögetka anök.” Mewö jiiga azi kömuyohaŋgö nenŋi Marta yaŋön kewö jii mörök, “O Kembuni, sömaŋ 4 ahözawaŋgöra lök wörönŋambuk akza.”

⁴⁰Jisösnöŋ mi möta Martagöra kewö jiyök, “Gi möt narim niŋgibanak ewö, Anutugö kukösümŋan aködamunŋambuk asuhuiga ekanak. Mutuk keu mewö jibiga mötnöŋ me qahö?”

⁴¹Mewö jiiga köt qililingöget aniga Jisösnöŋ eu ui öngöiga kewö jiyök, “Iwi, gi köulukni mötzaŋgöra aka ‘Pipsaiwap!’ jim gihizal. ⁴²Gi nalö dop köulukni mörakzani, mötzalmö, göŋön melaim niŋginöŋga gölmenöŋ erali, ambazip kambu liliköm niŋgiba ki kinjei, yeŋön mi möta möt narimegöra aka keu ki jizal.”

⁴³Mewö jiba imbiŋi memba wahöta ketaŋanök qeta kewö jiyök, “Lazarus, gi mönö wahöta kaŋgotnöŋ!” ⁴⁴Mewö qeriga azi kömukömuŋi yaŋön guliba wahöta kayök. Köna böröŋi opo kawukŋambuknöŋ esuhuba jemesoholŋi opo jöhanŋan köpeiba jöhöget ahöi dundunŋambuk kayök. Mewö kaiga Jisösnöŋ jiyök, “Mönö dundunŋi pösatketka ölop anma.” Mewö.

Juda galöm yeŋön Jisös kömumapkö aŋgönaŋ geget.

Mat 26.1-5; Mak 14.1-2; Luk 22.1-2

⁴⁵Juda ambazip Mariagöreŋ kaŋgota Jisösnöŋ yuai aiga asuhuiga ekeri, yeŋgöreŋök gwötŋukŋan uruŋini meleŋda Jisös möt narim waŋgiget.

⁴⁶Möt narim waŋgigetmö, tosaŋŋan Farisi (Köna keugö kapaŋkölköl) yeŋgöreŋ anda Jisösnöŋ yuai ahöhi, miaŋgö kösohotŋi jiget mötket.

⁴⁷Mi jiget mötketka jike nup galöm aka Farisi yeŋön jike kaunsöl jitŋememe öröm eŋgiget tokogetka kewö jiget, “Azi miaŋön aŋgöletot kukösümŋambuk sehisehiŋi memakzawaŋgöra i mönö denöwö ak waŋgiinga dop kölbawak? ⁴⁸Wakosoraŋ aka yuai kun qahö ak waŋgiinga toroqeba mewö aka malma ewö, mönö ambazip körek pakpak i möt narim waŋgibeak. Mewö aketka Rom gawman yeŋgö irimŋini seholiiga kaba nanini jöwöwöl jikenini aka ambazip kambu ki nenguaŋgitketka öne töhön malbinbuk.”

⁴⁹Mewö jiget tatketka yeŋgöreŋök kun qeŋŋi Kaiafas yaŋön yambu (yara) miaŋgöreŋ jike nup galöm bohonŋi aka nup mia memba malök. Yaŋön wahöta goro keu kewö jii mötket, “Iŋini uru mötmötŋinaŋgö kinimŋi tok qahö tohoza. ⁵⁰Iŋini keu ki ölop qahö kewötze: Nini ambazip kambu körekŋanök ayuhuinga lömböt keta bölöŋŋi akapuk. Miaŋgöra azi

mohotjan Juda kambu neŋgö aip selnini ala sohopnini memba kömuiga dop kölma.”

⁵¹Yaŋön keu mi nanŋi imbiŋe qahö ahuiga jiyökmö, yambu (yara) miangöreŋ jike nup galöm bohonŋi malöhaŋgöra aka nanŋak keuŋaŋgö könani qahö möta kezapqetok keu jiyök, “Jisösnöŋ ambazip kambu neŋgöra aka kömui dop kölma.” Keu mi ölna jiyök. ⁵²Juda ambazip kambu neŋgөрöhök qahö kömuyökmö, Anutugöreŋ urumelenŋ könagesö gölme dop deŋqeqda mal anjini, nini mewöyök mindirim neŋgiiga urumelenŋ kambu mohok aka malbingöra kömuyök. Kömumapkö keuŋi mi qeljibe jiyök.

⁵³Wehön miangöreŋök könahiba jitŋememe yeŋön tokoba mewö eraum möta Jisös kömumapkö keuŋi jim köhöiba areŋi alget. ⁵⁴Miangöra Jisösnöŋ toroqeba Juda yeŋgö sutŋine aukŋe qahö anda kaba malök. Mewö qahöpmö, eŋgömosöta gölme qararaŋkölkölnaŋgö gөraŋe anök. Miangöreŋ anda taon qetŋi Efraim miangöreŋ aŋgota gwarekurupŋi yembuk nanŋinök malget.

⁵⁵Juda neŋgöreŋ ak-kömukömu kendonöŋ töriyök.^a Miangöra Juda ambazip gwötpukŋan miri dop miriŋini mosöta köl könjörat ak aŋgubingöra möta Jerusalem sitinöŋ öŋgöget. ⁵⁶Jisös jaruba mala jöwöwöl jikegö tohoŋ uruŋe kinda eraum möta kewö qesim aŋguget, “Jisösnöŋ sösöŋgai kendongöra ki kama me qahöpto? Denöwö mötze?”

⁵⁷Mewö qesim aŋgugetmö, jike nup galöm aka Farisi yeŋön jimkutukutu keu kewö algetka sehiyök, “Kunŋan Jisösgö ahöm tatatŋi eka mötmawi, yaŋön mönö neŋgöreŋ kaba buzupŋi jii möta anda memba jöhöbin.” Mewö.

Marianöŋ Jisös o köhöwakŋambuknöŋ miriyök.

Mat 26.6-13; Mak 14.3-9

12 ¹Anutunöŋ mönöwök neŋgehoriba neŋgongiröhi, miangö ak-kömukömu kendonŋan^b töriba sömaŋi 6 teköiga miangöreŋ kam kuŋgumamgö ahök. Jisösnöŋ nalö miangöreŋ miri qetŋi Betani miangöreŋ anök. Mutuk azi qetŋi Lazarus mem gulli kömupnöhök wahöta malöhi, mönö yaŋgö mire aŋgorök. ²Miangöreŋ aŋgoriga Jisös göda qem waŋgibingöra miri kunöŋ nene ohoba mözözömgöget. Martanöŋ ohom töndeŋ köl eŋgiyökmö, azi Jisösbuk mohotŋe tata nene negeri, Lazarusnöŋ yeŋgö sutŋine tarök.

³“Mewö tatketka Marianöŋ kelök kirin kun lömbötŋi 500 gram mi memba Jisösgöreŋ kayök. Kirin mi o umköhöwakŋambuk ölni qetŋi nad

^a 11.55 Kendon qetŋi Nei keunöŋ Pasowa jize. Anutunöŋ mönöwök Israel ambazip neŋgehoriba neŋgongiröhi, miangöra yambu dop nalö ala söŋgaimakzema. Eksodus 12.15

^b 12.1 Eksodus 12.15 ^c 12.3 Luk 7.37-38

bohonji öngöngöni ketani miañon kokolak qequea. Yañon mi memba kaba simin köla Jisös könaje mimbiliba miriba nörop jupñan keren meyök. Mewö aiga miri uruje tatkeri, mi ogö wöronñan pukpuköba dop köla ahöiga mötket.

⁴Mewö asuhuiga Jisösgö gwarek yeñgöreñök kun qetji Judas Iskariot, könagep Jisös mamalolo meyöhi, azi miañon qetala kewö jiyök, ⁵“O köhöwakñambuk mi mönö wuanöngöra bohonji memegöra qahö alök? Iwinañgö jitji! Mi albawak ewö, mönö silim 300:kö töwanji (Kina 1500,-) miañgö dop yöhötibawak. Mia ambazip wanapñi enjiinga dop kölbawak.” ⁶Mewö jiyökmö, keu mi ambazip wanapñi yeñgöra waimanjat möröhañgöra aka qahö jiyök. Yeñgöra aka qahöpmö, yongorö meme azia mala moneñ gösö kutukutulañini galöm köli moneñ alget geiga miañgöreñök kitipñi nanñangöra memba malök. Mönö miañgöra aka mi jiyök.

⁷Mewö jiiga Jisösnöñ jiyök, “Injini ambi ki mönö kude jim wañgime. Nöñon kömumbiga löm köl niñgimeañgö nalöni törizawañgöra ölop sileni o umköhöwakñambuknöñ nömiriza. ⁸^dAmbazip wanapñi mi mönö nalö dop sutñine malakzemö, nöñon embuk nalöñi nalöñi qahö malmam.” Mewö.

Lazarus qebingö keu jöhöba añañon alget.

⁹Jisösnöñ Betani mire malöhi, mi Juda ambazip kambu gwötpukñan möta miañgöreñ kaget. Jisösgöröhök qahö kagetmö, Lazarus kömupnöhök mem guli wahöröhi, i mohot ekingö likepliket öröba kañgotket. ¹⁰Mewö kañgotketmö, jike nup galöm yeñon Lazarus mewöyök qein kömumapkö keu jöhöget. ¹¹Juda ambazip gwötpukñan Lazarusgöra aka Betani anda urujini meñda Jisös möt nariget. Miañgöra keu mewö jöhöget. Mewö.

Jisös köirañ kölgetka Jerusalem öngöyök.

Mat 21.1-11; Mak 11.1-11; Luk 19.28-40

¹²Mewö aketka ahöba wahöta miañgöreñ ambazip kambulembenöñ ak-kömukömu kendongöra Jerusalem sitinöñ kañgota malgeri, yeñon buzup keu kewö mötket, “Jisösnöñ Jerusalem kamamgö könanöñ kaza.” ¹³“Keu mewö möta umji böröñi memba könanöñ miwikñaibingö anda kewö jiba qetket,

“Hosana, owe owe! Anutu möpöseizin. Kembugö qetñe kamawi, Anutunöñ mönö kötuetköma! Israel neñgö Kiñ Kembunini owe owe!”

¹⁴Jisösnöñ doñki moröñi kun miwikñaiba miañgö qakñe öngöba tarök. Mi kezapqetok keu kun kewö ohoget ahözawañgö dop asuhuyök,

^d 12.8 Dut 15.11 ^e 12.13 Sum 118.25, 26

15 ^f“O Jerusalem ambazip Zaion kundunji liliköba maljei, injini mötket, enḡö Kiḡ Kembuninan mönö kama. Doḡki moröḡañḡö qakḡe tata kama. Mianḡöra keḡḡötḡjini mönö kude mötme.”

16 Jisösgö gwarekurupḡan yuai asuhuyöhi, mianḡö könaḡi mutuk qahö möt kutugetmö, könaḡep ölop möt asariget. Jisösnöḡ Suepnöḡ öḡḡöba asakmararaḡambuk malöhi, keu mi nalö mianḡöreḡ mötmöröiba kewö jiget, “Aha! Keu mi mönö Jisösgöra ohoget ahöza aka ambazipnöḡ keu mianḡö dop ak waḡigetka ölnambuk ahök.”

17 Ambazip Jisösbuk Betani malgeri, yeḡön dangunu ewö kinda buzupḡi jim sehiget. Jisösnöḡ Lazarus qeriga kömupnöḡök guliba wahöta qaksirigö köt köteḡ mosöta kaḡoriga ambazip kambunöḡ ekeri, yeḡön Jisösgö könaḡi naḡöba jiba jim asariget. 18 Jisösnöḡ aḡḡöletot mi meyöhi, keu mi mötkeraḡöra aka ambazip kambunöḡ luluḡda köl öröm waḡigibingö anget.

19 Mewö angetka Farisi (Köna keugö kapaḡkölköl) yeḡön nanḡinök eraum möta kewö jiget, “Mötket. Gölmeḡi gölmeḡi ambazip yeḡön mönö luluḡda öböba yaḡö andöḡe anakze aka nini keu nup miyök mem bibihiinga ölni kun qahö asuḡa.” Mewö.

Grik ambazip tosatḡan Jisös jaruget.

20 Juda ambazip ak-kömukömu kendongöra Jerusalem sitinöḡ öḡḡöba Anutu waikḡi memba möpöseigeri, yeḡö sutḡine Grik ambazip tosatḡi mohotḡe malget. 21 Yeḡön gwarek qetḡi Filip yaḡöreḡ kaget. Filipnöḡ Galili prowinsgö taon qetḡi Betsaida mianḡö azia malök. Grik yeḡön yaḡöreḡ kaba qesiba kewö jiget mörök, “Ketaḡamnini, nini sihimninan Jisös ekingö mötzin.”

22 Mewö jiget möta Andrugöreḡ anda keu mi jii mörök. Jii möta mohotḡe anda Jisös jiyohot mörök. 23 Keu mi möta meleḡda kewö jiyök, “Suepkö asakmararaḡan Suep gölmegö Azi Ölni yaḡöreḡ kunbuk asuḡum kutuiga asarimawi, mianḡö nalöḡan mönö töriza. 24 Nöḡön kömupnaḡö söpsöp keu öl töhöḡni kun kewö jibi mötket: Sehoḡ köḡḡi gölmeḡöḡ qahö geba julma ewö, mönö öne miyök ahöma. Mewö öne ahömapmö, geba julma ewö, korapḡan mönö jula öndölböndöl wahöri ölni gwötpuk söhöma.

25 ^g“Mianḡö dop denike yeḡön malmalḡini nanḡinaḡöra aḡḡön köla nanḡini imbi-imbi siyoḡsayoḡi qahö malbingö ak enḡimakzawi, yeḡö malmalḡinan mönö sohoma. Mewö sohomapmö, kunḡan kun nanḡi malmalḡi göragöra ala nia jegep al niḡimawi, yaḡön mönö malmal ölni öndölböndölnambuk miwikḡaiba köhöiba teteköḡi qahö mal öḡḡöma.

^f 12.15 Zek 9.9 ^g 12.25 Mat 10.39; 16.25; Mak 8.35; Luk 9.24; 17.33

26 Kunjan ni welen qem niŋgimamgö jizawi, yaŋön mönö ni nuatangöba mali dop kölma. Weleni qemakzawi, mönö ni anda kaba malmamangören mewöyök nömbuk malma. Kunjan nömbuk mala weleni qem niŋgimakzawi, Iwinöŋ mönö i göda qem waŋgii malma.” Mewö.

Jisösnöŋ kömumba gulimawaŋgö keu saiŋi jiyök.

27 Jisösnöŋ jiyök, “Wösöni dölki kot gwözöŋniga amqam aka maljal. Denöwö jibileŋak? Keu jaruzal. O Iwi, gi ölop aua nalö kewöŋaŋgö köŋjiliŋnöhök meköm niŋgiman. Töndup kewögöra mewö qahö köulukömam: Aua kiangö sihimbölöŋi mi mökösoŋda bisimamgöra aka nangak qakne aljan. 28 O Iwi, gi mönö nangi aködamungi al niŋgiba qetbuŋagi mem qariman.” Mewö köuluköiga Suepnöhök keu kewö asuhiba erök, “Nöŋön aködamuni lök al gihiba mewö qetbuŋani mem qarial aka toroqeba mem qaribiga sehiba anma.”

29 Keu mi asuhuiga ambazip kambu kinget yeŋön mi möta jiget, “Wöl pöndaŋ qetza.” Tosatŋan jiget, “Suep garata kunjan yaŋgöra keu jiiga kourukŋi mötzin.”

30 Mewö mewö jigetka kewö jii mötket, “Kouruk mi nöŋgöra aka qahö asuhuzapmö, mi eŋgöra aka asuhuza. 31 Nalö kewöŋe gölmeŋi gölmeŋi ambazip ahakmeme bölöŋi wuatangömakzei, yeŋgö kewötkewöt nalöŋinan mönö mesohol köl eŋgiza. Anutunöŋ yeŋgö keuŋini jim teköba likepŋi meleŋ eŋgiiga qakŋine öŋgömapkö akza. Nalö kewöŋe Anutunöŋ Bölöŋaŋgö Kembuŋi gölme dop galöm köl eŋgimakzawi, mönö i közöliga yaigep etmapkö akza. 32 Yaŋön etmapmö, nöŋgöra kewö asuhuma: Ambazipnöŋ gölmenöhök nömemba könakemba kösököm niŋgigetka öŋgöba kinbiga köna ahuiga ambazip gölme dop öröm eŋgibiga luluŋda nöŋgöreŋ kaba kambu köla kinme.” 33 Mi kömup denöwöŋi kömumawi, miaŋgö keu saiŋa mewö jii mötket.

34^h Ambazip kambu yeŋön mi möta kewö jiget mörök, “Nini Köna keu oyoŋda kewö mötzin, ‘Kraistnöŋ qahö kömumba teteköŋi qahö mal öŋgöba malma.’ Göŋön wuanöŋgöra kewö jizan, ‘Suep gölmeŋö Azi Ölöŋi gölmenöhök memba kösökögetka könakemba öŋgöba kinma.’ Suep gölmeŋö Azi Ölöŋi mi daŋön?”

35 Mi möta meleŋ eŋgiyök, “Asakŋan nalö töröptökŋi kunbuk sutŋine asariba malma. Söŋaupnöŋ qakŋine öŋgöba turum eŋgii miaŋgö buŋaŋi akepuköra mönö asakŋe anda kaba malme. Asakŋan ahöm eŋgimawaŋgö dop mönö asakŋe malme. Daŋön panamanöŋ jipjap anda kamakzawi, mönö denike aŋgotmawi, mi qahö mötza. 36 Miaŋgöra asakŋan nalö dawik embuk malmawi, nalö miaŋgöreŋ mi mönö urunöŋ möt aŋgön köla malme. Asakŋaŋgö könagesö aka malmegöra mönö asakŋi mi möt

^h 12.34 Sum 110.4; Ais 9.7; Eze 37.25; Dan 7.14

nariba malme.” Jisösnöŋ keu mewö jiba eŋgömosöta tölapköba anök. Mewö.

Juda ketanŋi yeŋgö uruköhöikŋinan qahö löwöriyök.

³⁷Jisösnöŋ aŋgöletot gwötpuk memba maliga Juda yeŋön mi jeŋinan eketmö, töndup i qahö möt narim waŋgiba silebile malget. ³⁸ⁱMewö malgetka kezapqetok azi Aisaiagöreŋ keu kun mi ölnambuk asuhuyök. Yaŋön keu mi kewö ohoyöha ahöza,

“O Kembu, neŋön Buŋa keu jim asariba uruŋini kuŋgum eŋgimazimö, daŋön mi möt naribawak?

Kembunöŋ kukösumŋi mi mönö dagöra indeli möt asarima?”

³⁹Amötqeqe Toŋi möt narim waŋgibingö lömböriba osigeri, Aisaiänöŋ miaŋgö könaŋi möta keu kun qeljiŋe kewö jiba ohoyöha ahöza,

⁴⁰ ^j“Nanŋini jeŋinan yuai eka könaŋi ek kutubepuk me uruŋinan keu könaŋi möt asaribepuk. Mi möt asariba uruŋini melenŋepuk. Uruŋini melenŋetka mem ölöwak eŋgibileŋbuk. Yaŋön mewö asuhubapuköra ambazip jeŋini mem gömöliba uruŋini gwözöŋniga malje.”

⁴¹Jisösnöŋ Suepkö asakmararaŋnöŋ asariba mali Aisaiänöŋ mewö eka könaŋi jim asariba keu mi jiyök.

⁴²Jitŋememe aka galömkölköl azi yeŋgöreŋök gwötpukŋan mewöyök Jisös möt narigetmö, Farisi (Köna keugö kapaŋkölköl) yeŋön köuluk miri kambunöhök közöl eŋgibepuköra mi aukŋe qahö jim miwikŋaiget.

⁴³Ambazipnöŋ möpöseim eŋgimegöra kapaŋ kölgetmö, Anutunöŋ möpöseim eŋgimapköra mi qemasolokep aket. Mewö.

Jisösgö keuŋan ambazip kewöta keunini jim teköma.

⁴⁴Tosatŋan mewö aketmö, Jisösnöŋ keu qeta kewö jiyök, “Kunŋan möt narim niŋgizawi, yaŋön niyök qahö möt narim niŋgizapmö, kunöŋ melaim niŋgiyöhi, i mewöyök möt narim waŋgiza. ⁴⁵Kunŋan ni neka mönö melaim niŋgiyöhi, i mewöyök ehakza. ⁴⁶Ambazip kun ni möt narim niŋgizawaŋön mönö söŋaupnöŋ qekötahöba malbapuk. Miaŋgöra nöŋön eta asuhuba gölmeŋi gölmeŋi eŋgö asakŋina aka maljal.

⁴⁷“Nöŋön eta asuhuba gölmeŋi gölmeŋi eŋgö keuŋini jim tekömamgöra aka qahö kayalmö, ambazip gölme dop amöt qem eŋgibiga nalö kewöŋe letota Suepkö buŋaya akŋegöra aka kayala maljal. Miaŋgöra ambazip nöŋgö Buŋa keuni möta qahö tem köla wuatangömakzei ewö, nöŋön yeŋgö keuŋini qahö jim tekömam. ⁴⁸Denike yeŋön jijiwilit ak niŋgiba Buŋa keuni qahö möt aŋgön köljei, yeŋgö jim teteköŋinan mönö kewö asuhuma: Nöŋön Buŋa keu jibi mötkeri, keu miaŋön mönö nalö ketanŋe keuŋini jim teköiga sihimbölöŋini miaŋgö dop mötme.

ⁱ 12.38 Ais 53.1 ^j 12.40 Ais 6.10

49“Könaŋi kewögöra mewö asuhuma: Nöŋön Buŋa keu jiba malali, mi keu omaŋi qahö. Mi nani imbineyök qahö asuhuiga jiba kota malal. Mewö qahöpmö, Iwi melaim niŋgiyöhaŋön nanŋak keu jit denöwö jimami, miaŋgö jim kutum niŋgiiga jiba kota maljal. 50Iwigörej jimkutukutu miaŋön mönö iŋini malmal köhöikŋe al eŋgimakza, mi mötzal. Miaŋgöra Iwinan mi jimamgö jim kutum niŋgiyöhi, mönö miaŋgö dop Buŋa keu jimakzal.” Mewö.

Jisösnöŋ gwarek yeŋgö könaŋini saŋgoŋnök.

13 1Ak-kömukömu kendonöŋ^k töriiga Jisösnöŋ könaŋi kewö möt yaköyök, ‘Gölme mosöta Iwinaŋgörej öŋgömamaŋgö nalöŋan mönö töriza.’ Mewö möt yaköba nanŋi alaurupŋi gölmenöŋ malgeri, mi uruŋan jöpaköm eŋgiba mala teteköŋe miaŋgörej mewöyök uru jöjöpaŋi mi kondel eŋgiyök.

2Kömumawaŋgö nalöŋan kam kuŋgumamgö aiga nalö kunöŋ suŋgemgö nene nemingö tokoba mohotŋe tatketka yuai kewö asuhuyök: Saimon Iskariotkö nahöŋŋi qetŋi Judas i Satanöŋ lök sölölohöyök. Jisös mamalolo ak waŋgimapkö keuŋi mi saŋep ali uruŋe geiga möta tarök.

3Jisösnöŋ nanŋi könaŋi mi kewö möt kutuyök, ‘Iwinöŋ yuai pakpakö kukösumŋi mi nöŋgö böröne aliga Anutugörejök eta mala kunbuk yaŋgörej öŋgömamgö akzal.’

4Könaŋi mewö möt kutuba nene nempa tatkeranŋörejök wahöta malukuŋi köteköba nupkö opo jöhanŋi kun memba kempaŋe köpeiba jöhöyök. 5Mi jöhöba o joutnöŋ mokoi geiga könahiba gwarekurupŋi yeŋgö könaŋini saŋgoŋnök. Saŋgoŋ teköba opo jöhanŋi (tauöl) kempaŋe köpeiba jöhöyöhi, miaŋön könaŋini kutuyök. 6Saŋgoŋda anda Saimon Pitögö könaŋe kaŋgoriga kewö jii mörök, “O Kembu gi welenqeŋe etqeŋeŋi qahö. Göŋön nöŋgö könani saŋgoŋnöŋga qahö dop kölma.”

7Mewö jii möta kewö meleŋnök, “Yuai döлки akzali, göŋön miaŋgö könaŋi nalö kewöŋe qahö möt kutuzanmö, könaŋeŋepnöŋ mi ölöp möt asariba malman.”

8Meleŋniga kewö kapaŋ köla jiyök, “Gi mönö nöŋgö könani nalö kunöŋ qahöpmahöp saŋgoŋman.” Mewö jiiga kewö jiyök, “Nöŋön gi qahö saŋgoŋ gihimam ewö, gi mönö nöŋgö gwarekni toroqeba malmamgö osiman.”

9Mewö jiiga Saimon Pitönöŋ pörösöl ala auruba meleŋnök, “Kembu, mewögöra gi könananök qahöpmö, böröni aka nöropni mi mohotŋe saŋgoŋman.”

10Mewö meleŋniga kewö jii mörök, “Kunŋan o ariba kaiga könaŋi tok saŋgoŋninga töwötŋi qahö sarakŋi ak teköma. Iŋini körek lök sarakŋi

^k 13.1 Anutunöŋ mönöwök Israel ambazip neŋgehoriba neŋgoŋgiröhi, kendon miaŋgö qetŋi Nei keunöŋ Pasowa jize. Eksodus 12.15

ak teközemö, mohotnöhök sarakñi qahö akza.”¹¹ Dañön mamalolo ak wañgimamgö ahöhi, Jisösnöñ mi möta miañgöra kewö jiyök, “Iñini körek sarakñi qahö akze.”

¹² ^lKönañini sañgoñ teköba malukuñi kunbuk löngöta eta tari negetka kewö qesim engiba jiyök, “Nöñön yuai ak engizali, iñini miañgö könañi möt asarize me qahö? ¹³ Iñini nöñgöra ‘Böhi!’ aka ‘Kembu!’ mewö noholakze aka nöñön mi ölna akzal. Miañgöra mi dopñe jimakze. ¹⁴ Nöñön engö Kembu Böhiñini aka welenqeqe eretñangö silik memba könañini sañgoñjal ewö, iñini mönö mewöñanök memba et al añguba weleqeqe aka könañini sañgoñ añguba malgetka dop köлма. Mi mönö nupñina.

¹⁵ “Nöñön aka kondel engizali, iñini mönö miañgö dop nañgöba welen qem añguba malme. Mewö malmegöra miañgö silikñi nöñön merak kondel engibiga ekze. Mi mötmöriba miañgö tandökñi wuatangögetka dop köлма. ¹⁶ ^mNöñön keu öł töhöññi kun kewö jibi mötket: Welenqeqenöñ eretñi aiga toñan öngöñgöñi akza. Gwareknöñ böhiñi oñgita öngöñgöñi akñamgö osima. Mewöyök azi kembu kunöñ garatañi melaiiga kolek anda nup memakzawi, yañön mönö kembuñangö bapñe malakza. ¹⁷ Iñini keu kötni mi merak möt kutuze. Mewögöra silememe mosöta alaurupñini nembö bapñine anda malme ewö, nöñön mönö engöra ‘I-ia simbawoñ!’ jimam.” Mewö.

Kunöñ mamalolo ak wañgimapkö qeljiñe jiyök.

Mat 26.20-25; Mak 14.17-21; Luk 22.21-23

¹⁸ ⁿ“Keu jizali, mi mönö iñini lökñanök qahö engömeza. Nöñön niñia möwölöhöba engömeali, engö könañamñini mönö ölop möt kutuzal. Mewö maljalmö, Buña Kimbi kun miañön ölnambuk aiga dop köлма. Keu mi kewö, ‘Kunöñ nöñgöreñ nene mohotñe neziri, yañön mönö kelewele aka gwakötñan tötal niñgiba nuñgumamgö jöjöröza.’^o

¹⁹ “Ni ölni könañgep asuhumawañgö keuña mutuk jizal. Miañgöra ölni asuhumawi, iñini nalö miañgöreñ nöñgö könani möt asariba kewö jime, ‘Aha! Malmalgö könañi nalö dop mala kota malöhi, yañön mönö mia akza.’ Mewö jiba möt narim niñgimegöra nöñön keu mi qeljiñe aukñe jibiga mötze.

²⁰ ^p“Nöñön keu öł töhöññi kun kewö jibi mötket: Nöñön ambazip kun melaibi nup memamgöra kaiga kunñan i köł örözawi, yañön mönö ni tok köł öröm niñgima. Mewöñanök ni köł öröm niñgizawañön mönö melaim niñgiyöhi, mönö i mewöyök köł öröm wañgima.”

^l 13.12-15 Luk 22.27 ^m 13.16 Mat 10.24; Luk 6.40; Jon 15.20 ⁿ 13.18 Sum 41.9

^o 13.18 Gwakötñan tötal niñgiba nuñgumamgö jöjöröza, keu mi Israel yeggöreñ dopkeu kun. Könañi kewö: Yañön uruñan qetala utaköm niñgiza. ^p 13.20 Mat 10.40; Mak 9.37; Luk 9.48; 10.16

²¹ Jisösnöŋ keu mewö jiba wösöŋi kot gwözöŋda jul takömamgö ahiga keu indela kewö jiyök, “Nöŋön keu öl töhöŋŋi kun kewö jibi mötket: Engöreŋök kunŋan ni mamalolo mem niŋgima.”

²² Mewö jiiga gwarekurupŋan nanŋini kuŋkaliliŋ uba aŋgehiba nanŋök nanŋök kewö mötmöriget, ‘Mönö dagöra jizapto?’ Mewö mötmöriba urayahöt tönpin tatket. ²³ Tönpin tata nene negetka Jisösgö wölböt gwarekŋan yaŋgö qöhöröŋeyök tarök. ²⁴ Yaŋön tariga Saimon Pitönöŋ nööröŋŋan gwarek mi söpsöp ak waŋgiba kewö jii mörök, “Keu mi dagöra jizawi, mi qesiba jinöŋ mötŋi.”

²⁵ Mewö jii möta lapingöba Jisösgö töptöpŋe nanŋöba kewö qesiyök, “Kembu, azi mi daŋön?”

²⁶ Mewö qesiiga meleŋ waŋgiyök, “Beret kitipŋi kuluŋnöŋ kundumgöba kun waŋgimami, yaŋön mönö mi.” Meleŋ waŋgiba beret kitipŋi memba kuluŋnöŋ kundumgöba Judas waŋgiyök. Judasgö iwiŋi qetŋi Saimon Iskariot. ²⁷ Beret kitipŋi mi waŋgiiga Satanöŋ miangöreŋök Judasgö uruŋe geyök. Miangöra Jisösnöŋ i jim kutum waŋgiba kewö jiyök, “Yuai akŋani, mi mönö zilaŋ akŋan.” ²⁸ Keu mewö jiyökmö, mi wuanöŋgöra jii möröhi, mi gwarek tosatŋan mohokŋe tata nene negeri, yeŋgöreŋök kunŋan kun qahö möt asariyök. ²⁹ Gwarek tosatŋan miangöra kewö mötmöriget, “Judasnöŋ moneŋ gösögö galömŋa malöhi, miangöra kendon nalöŋe yuai osibini, mi bohonŋi memapköra melaiza me ambazip wanapŋi moneŋ yuai kun memba engimapköra jiza.”

³⁰ Judasnöŋ keu mi ölop möt asariba beret kitipŋi mi memba miangöreŋök mosöta yaigep aniga suŋgem ahök. Mewö.

Jisösnöŋ jöjöpäŋ keu dölökŋi jim kutuyök.

³¹ Judasnöŋ mosöta yaigep aniga Jisösnöŋ kewö jiyök, “Dölki Anutunöŋ aködämunŋi Suep gölmegö Azi Ölŋi al teköm waŋgiiga yaŋön Anutugö qetbuŋaŋi mem qarii asuhuza. ³² Yaŋön Anutugö qetbuŋaŋi mem qariba Anutubuk qekötahözawangöra Anutunöŋ mönö mewöŋanök yaŋgö qetbuŋaŋi mem qarima. Mi nalö qahö körii mem qariiga asakmararaŋan asuhum tiŋgiri mal öŋgöma.

³³ ^a“O gömokurupni, nöŋön nalö töröptökŋi kunbuk embuk malmam. Mi mala engömosötpiga könangep jarum niŋgiba malme. Juda yeŋgöra kewö jibi mötket, ‘Ni miri anmami, iŋini miangöreŋ kabingö osime.’ Keu miyöhök dölki engöra mewöyök jizal.

³⁴ ^r“Nöŋön jöjöpäŋ keu dölökŋi jim kutum engizal: Iŋini mönö uruŋinan jöpaköm aŋguba malme. Nöŋön urukalem ak engiba malali, iŋini mönö miangö dop jöpaköba urukalem ak aŋguba malme. ³⁵ Sutŋine uruŋinan jöpaköm aŋguba malme ewö, ambazip körek yeŋön engeka

^a 13.33 Jon 7.34 ^r 13.34 Jon 15.12, 17; 1 Jon 3.23; 2 Jon 5

kōnanjani mōt kutuba kewō jiba malme, ‘Aha! Mōnō Jisōsgō gwarekurupni akze.’ Mewō.

Pitōnōj Jisōs qaŋ kōlmapkō keu qeljiŋe jiyōk.

Mat 26.31-35; Mak 14.27-31; Luk 22.31-34

³⁶Saimon Pitōnōj Jisōs kewō qesim waŋgiyōk, “Kembu, gi denike anman?” Qesim waŋgiiga meleŋnōk, “Ni denike anmami, gi miangōreŋ nuataŋgōba kamamgō osiman. Nalō kewōŋe osimanmō, kōnanjep mia ölöp nuataŋgōba kaman.”

³⁷Meleŋniga kewō qesiyōk, “Kembu, ni mōnō wuanōŋgōra nalō kewōŋe gi guataŋgōba kamamgō osimam? Nōŋōn mōnō malmalni gōhōra aka kōleŋda mosōtmam.”

³⁸Qesiiga kewō meleŋnōk, “Gi ölŋa malmalgi nōŋgōra aka kōleŋda mosōtmamgō jizan me? Keu mi jitkanōk jizan. Nōŋōn keu öl tōhōnŋi kun kewō jibi mōtnōŋ: Merak kuruknōŋ qetmamgō dopdowiiga gōŋōn nalō miangōreŋ qaŋ kōl niŋŋinōŋga indimŋi karōbut akja.” Mewō.

Jisōsnōj gwarekurupni urukōlalep mem eŋgiyōk.

14 ¹“Uruŋinan mōnō waimanjat kude mōta wōsōbirik kude aka malme! Mōnō Anutu mōt narime aka ni mohok mōt narim niŋgiba malme! ²Nōŋgō Iwinangō miri bohōŋe miri uruŋi sehisehiŋi ahōze. Mi qahō ahōbeak ewō, mōnō eŋgōra keu kewō jibileŋak: Nōŋōn mōnō miangōreŋ ōŋgōba eŋgō dum miri mem mōhamgōmam.

³“Nōŋōn mutuk anda ōŋgōba eŋgō dum miriŋini mem mōhamgōmam-mō, nōŋōn miri malmami, iŋini mewōyōk nōmbuk miangōreŋ mohotŋe malbingō sihimŋi mōtzal. Miangōra nōŋōn mōnō kunbuk liliŋgōba kaba eŋguangitpiga euyangōreŋ ōŋgōme. ⁴Nōŋōn miri denike anmami, iŋini miangō kōnanŋi lōk mōt kutuze.” Mewō.

Iwigōreŋ anangō kōna mi Jisōs.

⁵Jisōsnōj mewō jiiga gwarek qetŋi Tomas yaŋōn kewō jiyōk, “O Kembu, gi miri denike anmani, nini mi qahō mōtzin. Miangōra miangō kōnanŋi mi mōnō denōwō mōt kutubinak?”

⁶Mi mōta kewō jii mōrōk, “Nōŋōn Kōna akzal. Nōŋōn Keu ölŋi aka Malmal kōhōikŋi akzal. Kunŋan Iwigōreŋ aŋgotmamgō mōta nōŋgōreŋ kama ewō, yaŋōn mōnō kōna miwikŋaima. Kōna murutŋi kun qahō ahōza. ⁷Iŋini ni ölŋa mōt kutum niŋgibeak ewō, mōnō nani Iwini mewōŋanōk mōt kutum waŋgibeak. Iŋini nalō kiangōreŋōk kōnahiba nōŋgō Iwini lōk eka mōt waŋgize.”

⁸Mewō jiiga Filipnōj kewō jii mōrōk, “O Kembu, gi Iwi kondel neŋŋinōŋga neŋōn i uba ehinga dop kōl neŋgima.”

⁹Mi mōta Jisōsnōj jii mōrōk, “O Filip, ni nalō kōrōp tiŋtiŋi embuk pōndaŋ malbigun neka tōndup kōnani qahō mōt kutuzan me? Kunŋan ni

nek kutuyöhi, yañon mönö Iwini mewöyök eka malja. Miangöra gi mönö denöwögöra Iwi kondel neñginönga ekingöra jizan?

¹⁰“Nöñon Iwibuk qekötahöba kinbiga Iwinöñ nömbuk qekötahöba kinjawi, mi möt narizan me qahö? Keu Buña jibiga mörakzei, nöñon keu mi nani uruneyök qahö memba jimakzal. Qahö! Nup memakzali, mi mewöyök Iwi nömbuk qekötahöba kinjawañon nam köl ningii ölni ahumakza. Miangöra nup memakzali, mi mönö yañgö nuwa memakzal.

¹¹“Nöñon Iwibuk qekötahöba kinbiga Iwinöñ nömbuk qekötahöba kinja. Injini mönö mewö möt narim niñgiget. Keu mi jitnöñ jibi möta qahö möt narim niñgibeak ewö, mi mönö aņgöletotni ekzeañgöra aka möt narim niñgime. ¹²Nöñon keu öl töhöñni kun kewö jibi mötket: Denike yeñon ni möt narim niñgize, yeñon mewöyök ni aņgöletot memba malali, miyöhök memakñe. Miyöhök memakñe aka nalö tosatñe nöñon meali, miangö dopni oñgita mi memakñe. Nöñon Iwigöreñ öñgöba malmamañgöra aka aņgöletot öñgöñgöñi ketañi megetka asuhume.

¹³“Iwinan nöñgöra aka qetbuñañambuk akñapkö mötzal. Miangöra aka Injini nöñgö qetne wani yuaigöra köulukömei, nöñon mönö mi akñam. Mewö akigun mianñon Iwinañgö qetbuñañi jigetka qarimakña. ¹⁴Injini yuai kungöra nöñgö qetne köuluköba qesim niñgime ewö, nöñon mönö mi akñam. ¹⁵Injini uruñinan jöpaköm niñgimakze ewö, mönö nöñgö jöjöpañ keuni tem köla wuatañgöba malme.” Mewö.

Jisösnöñ Uña Töröñi melaimamgö jim jöhöyök.

¹⁶“Nöñon Iwi köuluköm wañgibiga yañon nam köiput Toñi kun eñgiiga eta nöñgö salupni aka teteköñi qahö embuk mal öñgöma. ¹⁷Nam köiput Toñi mi Uña Töröñi. Yañon keu ölnañgö Toñi akza. Uruñini qahö melenget yeñon i qahö ek kutuba qahö möt wañgize. Miangöra yeñon i köl öröba möt aņgön kölbingö osimakzemö, Uña yañon lök embuk malja aka könañgep uruñine geba embuk kinma. Miangöra i kiana qahöpmö, i ölop möt kutum wañgize.

¹⁸“Nöñon eñgömosötpiga gwani morö ewö qahö aka malme. Ni mönö eñgöreñ lilingöba kamam. ¹⁹Nalö töröptökñi teköigun gölme ambazip omañi yeñon ni kunbuk qahö neka malme. Yeñon qahöpmö, uruñini melengeri, eñon ni ölop nehakñe. Nöñon köhöiba maljalangöra injini mewöñanök guliba köhöiba malme. ²⁰Iwi, nani aka injini, nini mohok aka maljin. Nöñon Iwinambuk qekötahöba kinbiga injini nömbuk qekötahöba kingetka nöñon embuk qekötahöba kinjal. Miangö könañi mi Uña Töröñan uruñine gemawañgö nalöñe ölop möt asarime.

²¹“Kunñan nani jöjöpañ keuni pakpak möt aņgön köla tem kölakzawi, yañon mönö uruñan ni jöpaköm niñgimakza. Kunñan ni jöpaköm niñgiiga nöñgö Iwinan mönö i jöpaköm wañgimakza aka nöñon i jöpaköm wañgimakzal. Nöñon i jöpaköba könañamni indel wañgibiga möt kutuma.”

²² Jisösönj mewö jiiga Judas Iskariotkö wakanj Judas yañon kewö jiyök, “Kembu, gi denöwögöra kōnanjamgi neñgōreñjök indelman aka ambazip uruñini qahō melenjeri, yeñgōra mi köyatim eñgimamgō jizan?”

²³ Mewö jiiga kewö melej wañgiyök, “Kunñan uruñan jōpakōm niñgimakza ewö, yañon mönō nōñgō Buña keuni tem köla wuatangōba malma. Mewö maliga Iwinan i jōpakōm wañgiiga Iwi netkōn mönō yañgō uruñe geba pōndanj yambuk mohotje malbin. ²⁴ Kunñan ni uruñan qahō jōpakōm niñgimakza ewö, i mönō nōñgō Buña keuni qahō tem köla wuatangōba malma. Keu jibi mōrakzei, mi nani Buñaya qahōpmō, Iwi melaim niñgiyōhi, yañon mi niñgiiga jimakzal.

²⁵ “Nōñon keu pakpak mi embuk pōndanj malali, nalō miangōreñ kusum eñgiba malal. ²⁶ Mewö malalmō, Iwinōñ Uña Tōrōñi nōñgō qetne melaiiga eta nam köiput (aka tinjonjon) Toñini akña. Yañon keu pakpak kusum eñgiba nōñon qambañ keu pakpak eñgiali, mi ölum eñgubapukōra köl gulim eñgimakña.

²⁷ “Nōñon luai eñgizal. Nane luai sorokni qainñi kun mi albi uruñine ahōma. Gölmenōñ ambazip yeñon luai qem añgumakzei, nōñon miangō tandök ewö kude qem eñgimakzalmō, mi oñgita luai qainñi kun eñgimakñam. Miangōra uruñinan mönō wōsōbirik kude aka keñgōtñini kude möta malme.

²⁸ “Nōñon keu kewö jibiga mötket, ‘Nōñon eñgōmosōta öñgōba mala kunbuk eñgōreñ lilinğōmam.’ Iñini uruñinan ni ölna jōpakōm niñgibeak ewö, keu jizali, miangōra ölop sōñgaibeak. Iwinōñ nōñgō ketañamni akza. Miangōra ni ‘Iwinangōreñ öñgōmam,’ jizali, iñini mi möta ölop urusōsōñgai miwikñaigetka dop kölbawak. ²⁹ Keu dölki jibi mötzei, miangō ölni bian asuhuma. Ölni asuhumawi, iñini nalō miangōreñ mi ölop mötmōriba möt narime. Miangōra mi nalō kiangōreñ qeljiñe jibi mötze.

³⁰ “Nalōni tōrizawangōra embuk keu gwōtpuk kunbuk jimamgō dop qahō mötzal. Bōlōñangō Kembuñan gölme dop galōm köl eñgimakzawi, yañon mönō kamamgō jōjörōza. Yañgō ösumñan mönō luhut qahō al niñgiba kondondongōma. Nōñgōreñ kōna mi yañon jim kutumawangō dop qahō ahōza. ³¹ Qahō ahōzapmō, nōñon Iwi jōpakōm wañgimakzalanğōra yuai pakpak keu jim kutum niñgimakzawangō dop ahakzal. Gölme ambazipnōñ nōñgō kōnanjamni mewö jim kusum eñgigetka möt asarimegōra mötzal. Miangōra mönō mosōta wahōta kagetka anbin.” Mewö.

Jisösönj wain ip bōmōññi, neñon bōrōñi akzin.

15 ¹ Jisösönj gwarek yeñgōra kewö jiyök, “Nōñon wain ip öl sorokñi akiga nōñgō Iwinan wain nupkö toñi akza. ² Nōñon ip ewö qak bōrōnambuk akzal. Ip bōrōni pakpak ölniñi qahō miwikñaiaba gilipitñi

akzei, Iwinan mi kutum gil engima. Ip böröni pakpak nöngörej tatketka ölnjini ahum sirizei, Iwinan mi mönö köl könjorat engima. Ahakmemegö ölnji qarim kuwulem sehisehiji miwikñajimegöra mönö mem solanim engima.

³“Injini Buña keu jibi mötketka miañön lök mem solaniba köl könjorat engii sarakñji aka malje. ⁴Miañgöra eñön mönö nömbuk qekötahöba kinme. Mewö kingetka nöñön embuk kinmam. Wain böröñji kunñan ip kemañe qahö tata tala etza ewö, mi mönö nanñi nam köl añguba ölnji ahum wañgimapkö osima. Miañgö dop injini mewöñanök nömbuk qahö qekötahöba kinje ewö, mönö nanñinök ahakmemegö ölnji öne ahum wañgibingö osime.

⁵“Ni waingö ipñi akiga eñön miañgö böröñji akze. Injini nömosöta nanñinök kinda yuai kun akingö osime. Miañgöra kunñan nömbuk qekötahöba kiniga nöñön yambuk qekötahöba kinbiga yañön mönö ahakmemegö ölnji önöñji qahö miwikñaiiba siriba malma. ⁶Denike yeñön nömbuk qahö qekötahöba kinje ewö, wain ip toñan mönö i ip böröñji ewö kutum engiba gili yaigep anme. Anda soholigetka memba tokoba könöpnöñ gili geba jeme.

⁷“Yeñön jememö, likepñi injini mönö nömbuk qekötahöba kinme. Mewö kingetka nöñgö Buña keunan engö uruñine qekötahöba kinja ewö, injini i me wai buña qem añgubingö mötzei, mi mönö Iwi köuluköm wañgigetka engima. ⁸Injini nöñgö gwarekurupni aka kingetka ahakmemenjanangö ölnji önöñji qahö ahuba eta tatketka malme. Mewö memba malgerañgöra Iwinangö qetñan mönö aködammunñambuk aka ahöma. ⁹Iwinan ni jöpaköm niñgiba malöhi, nöñön mönö miañgö dop mohot jöpaköm engiba malal. Injini mönö nöñgö urukalem uruñe kinme. ¹⁰Nöñön Iwinangörej jöjöpañ keu tem köla mala kota yangö urukalem uruñe kinjal. Miañgö dop eñön nöñgö jöjöpañ keuni memba tem köla malme ewö, mönö ölop nöñgö urukalem uruñe kingetka jöpaköm engiba malmam.

¹¹“Nöñön uru sösongai al engibi engörej kutuiga uruñini kokolak qei ahöiga önöñji qahö söngaim sehiba malmegöra keu mi jibi mötze. ¹²³Nöñgörej Köna keu mi kewö: Nöñön uru jöpaköm engiba malali, injini mönö miañgö dop nanñini jöpaköm añguba malme. ¹³Kunñan alaurupñi yengöra aka nanñi malmalñi tököba mosötmawi, miañön mönö urukalem öngöngöñji ketañi akza. Kunñan mi oñgita jöpaköm engimamgö osima. Urukalem tosatñi mi miañgö eretñi.

¹⁴“Nöñön yuai akñegöra jim kutum engimakzali, injini miañgö dop ahakze ewö, mönö nöñgö alaurupni akze. ¹⁵Welenqeqegö könañi kewö: Galömñan nupñi denöwö aka memakzawi, mi welenqeqeñan qahö mörakza. Miañgöra engö qetñini ‘Welenqeqeurupni,’ mewö qahö

* 15.12 Jon 13.34; 15.17; 1 Jon 3.23; 2 Jon 5

toroqeba engoholmam-mö, Iwinangöreñök Buña keu mörali, mi pakpak mönö engöra indelbiga mötze. Mewögöra qetjini ‘Alaurupni,’ mewö engoholbiga dop kölja.

¹⁶“O alaurupni, ejön ni qahö möwölöhöm niñgigetmö, nöñön injini möwölöhöba kuñgum engibiga kinje. Miañgöra ejön liliköba anda ölni kewö miwikñaiba pöndañ sirigetka ahöahöñi ahi dop kölma: Nöñgö qetni qeta yuai mi me mi miañgöra Iwi köulukömei, mi mönö engii buñañini akña. ¹⁷Injini mönö sutjine jöpaköm anguba malme. Nöñön jöjöpäñ keuni mewö jim kutum engizal.” Mewö.

Urumeleñgö kopañi yeñön injini kazik ak engime.

¹⁸“Gölmenöñ uruñini qahö melenget yeñön kazik ak engime ewö, mönö keu kewö mi möt kutume: Yeñön mutuk ni mewöñanök kazik ak niñgiba malget. ¹⁹Injini urumeleñgö kopa kambunöñ malbeak ewö, kambu-urup mienöñ mönö nanñini alaurupñini urukalem ak engibeak. Mi ak engibeakmö, nöñön injini möwölöhöba yeñgö areñnöhök engömembiga murutñi aka malje. Yeñgöreñ ahakmeme bölöñi mi andö qeba maljeañgöra aka kazik ak engimakze.

²⁰“Nöñön keu kun kewö jibi mötkeri, mi mönö urukönömñine ala mötmörime, ‘Welenqeqenöñ eretñi aiga toñan ketanamñi akza. Gwareknöñ böhiñi oñgita öñgöñgöñi akñamgö osima.’ Miañgö dop tosatñan ni sesewerowero ak niñgiba mala kotket ewö, tosatñi yeñön mönö nöñgö undumurupni injini mewöñanök sesewerowero ak engiba malme. Yeñön nöñgöreñ Buña keu möt añgön köla malget ewö, injini nöñgö keuni jim sehiba malgetka mönö mewöñanök ölop möt añgön köla malme. ²¹Mewö malmemö, ni melaim niñgiyöhi, yeñön i qahö möt wañgize. Miañgöra silebile qakñe yuai könañi könañi lañ ak engime, mi mönö nöñgö qetbuñanangöra aka asuhum engima.

²²“Nöñön yeñgöreñ qahö eta Buña keu jibi mötpeak ewö, yeñön mönö köpösihitñinañgö gamuñi qahö möta malbeak. Mewö öne malbeakmö, nalö kewöñe siñgisöndokñini möt teköba köl turubingö osize. Möndömöndö keuñini mönö denöwö miwikñaibeak? ²³Kunñan ni kazik ak niñgizawi, yañön mönö Iwini mewöñanök kazik ak wañgiza. ²⁴Añgöletot öñgöñgöñi ketanñi meali, mi kunñan kun eñgö sutjine qahö memba malök. Nöñön mi qahö membilenak ewö, yeñön mönö köpösihitñinañgö gamuñi mi qahö möta malbeak. Tönpin malbeakmö, nalö kewöñe nöñön mi membiga ek teköbagun töndup ni aka Iwini mewöñanök öne töhön kazik ak netkiba malje.

²⁵“Mewö ak netkiba malgetka Buña keu kun ölnambuk ahök. Mosesnöñ köna keu engiyöhi, miañgöreñ keu mi kewö ohoget ahöza,

¹ 15.20 Mat 10.24; Luk 6.40; Jon 13.16 ^u 15.25 Sum 35.19; 69.4

‘Yeñön öne töhön lañ kazik ak niñgiba malget.’ Keu mianjön lök ölnambuk ahök.

²⁶Nöñön Iwigöreñ öngöba köiput Toñi melai biga engöreñ kaba uruñine geba nanjöm engima. Uña Töröñi yañön keu ölnangö Toñi akza. Yañön Iwigöreñök eta nöngö könajamni nanjöba jim asarim engiba malma. ²⁷Yañön mewö malma aka eñön mewöñanök nöngö könajamni nanjöba jim asariba malme. Nöñön könahiba urugö qenjarök nup memba malali, eñön mönö könakönahineyök nömbuk mala kotket. Mianjöra injini mönö mi ölop jim asariba malme. Mewö.

Jisösgö gwarekurupñi bim engöhöi utal engime.

16 ¹Jisösnöñ toroqeba kewö jiyök, “Injini tala eta engui janjun akepuköra nöñön keu mi qeljine jibi mötze. ²Uruñini qahö meñget yeñön mönö köuluk miri kambuñineyök utal engigetka yaigep eta malme. Könajep nalö kun kam kuñgumawi, mianjöreñ injini nöngöra aka engugetka kömume. Mewö enguba kewö jime, ‘Mewö mianjön Anutugö welenni qeinga Anutugö uruñan ölöwakza.’ Körekan mewö möt sohoba jime. ³Yeñön Iwi aka ni netkö könajamniri qahö möt asarimakzeangöra aka mewö ak engiba malme.

⁴“Mewö tönpin malmemö, nöñön keu mi qeljine engöra jibi mötze. Mianjöra nalö mi kam kuñguiga keu mianjögö ölni asuhumawi, injini nalö mianjöreñ ölop kewö jime, ‘Kraistnöñ kiangö buzup keuñi lök qeljine jii mörin.’ Nanak embuk malalangöra aka keu mi nalö köröpñi ahöiga mutuk qahö jibi möta kotket.” Mewö.

Uña Töröñan nupñi kewö memakza:

⁵“Nöñön nalö kiangöreñ melaim niñgii erali, mönö yangöreñ öngömangö akzal aigun engöreñök kunñan kun kewö qahö qesim niñgiza, ‘Gi denike anman?’ ⁶Keu mewö jizali, eñön mi möta mianjöra wösöbiriknöñ uruñini kokolak qei malje.

⁷“Mewö maljemö, töndup nöñön mianjögö likepñi keu ölni kun kewö jibi mötket: Nöñön engömosöta lilingöba öngömami, mianjögö ölnan asuhuiga mönö kewö mem ölöwak engima: Nöñön öngöba köiput Toñi melai biga engöreñ eta uruñine gema. Nöñön qahö engömosöta öngöbilenjak ewö, Toñi yañön mönö engöreñ etmamgö osima.

⁸“Köiput Toñi yañön eta malmalgö könajni kewö kondel engiba malma: Gölme dop siñgisöndokñini indela kondeli Anutunöñ keuñini jim teköiga solanime me uruñini qahö meñgetka keuñini jim teköba likepñi meñget engima. Ambazipnöñ könajamñini mewö eka möt kutume. ⁹Ni qahö möt narim niñgizeangöra siñgisöndökö könajni indel engiiga möt kutume.

¹⁰“Anutugö köna solanñi möt sohoba nöngöra keu lañ jimakze. Mianjöra yañön nöngö könajamni indela kondel engiiga kewö möt

kutum niŋgime: Nönjön solanji mala Iwinanğoreŋ lilingöba öngöbiga ni kunbuk qahö neka malme. ¹¹Bölönanğö Kambuŋi gölme dop galöm köl eŋgimakzapmö, Anutunöŋ yanğö keuŋi lök jim teköyöha könöp siagö Toŋi akŋa. Mianğö dop körek neŋğö keunini mewöyök jim teköma.

¹²“Nönjön ölop keu gwötpuk toroqeba jibileŋakmö, mi nalö kewöŋe jibiga usuŋumburaŋ aka köl gulibingö osibepuk. ¹³Mi osibepukmö, keu ölnanğö Toŋi, Uŋa Törönji yanğön eta uruŋine geba keu saŋep qei mötme. Mi nanŋi imbiŋanğö dop laŋ qahö jiba malmapmö, Anutugöreŋ keu kezap ala mötzawi, yanğön mönö miyök jimakŋa aka könanğep yuai asuhumawi, mi qeljiŋe indela jima. Mianğöra yanğön eŋğömemba keu ölni pakpak mianğö o anğöŋe al eŋgiiga keu ölnanğö köna tiba anme.

¹⁴“Yanğön mönö nane köwenöhök keu memba jim asariba uru kuŋgum eŋgiba malma. Mianğöra mönö nönğö könani indeliga nönjön qetbuŋanambuk ahakŋam. ¹⁵Iwinanğoreŋ yuai pakpak ahözawi, mi mönö nönğö böröne ali ahöza. Mianğöra jizal, ‘Yanğön mönö nane köwenöhök keu memba jim asariba uru kuŋgum ak eŋgiba malma.’ Keu mi mewö.”

Wösöbirik malgetka meleŋniga urusösöŋgai mötme.

¹⁶“Nalö töröpŋi kun teköiga iŋini ni kunbuk qahö nekŋe. Mianğö andöŋe nalö töröpŋi kun teköigun mönö asuhum eŋgibi ölop kunbuk nekŋe.”

¹⁷Mewö jiiga gwarekurupŋi yeŋğoreŋök tosatŋan nanŋinök kewö eraum mötket, “Keu kewö jiza, ‘Nalö töröpŋi kun teköiga iŋini ni qahö nekŋe. Mianğö andöŋe nalö töröpŋi kun teköigun mönö asuhum eŋgibi ölop kunbuk nekŋe,’ aka keu kun kewö jiza, ‘Ni Iwinanğoreŋ öngömam.’ Mewö jiiga mötzini, keu yahöt mianğö könaŋi mi denöwö?” ¹⁸Mewö eraum möta uzohola jiget, “Yanğön ‘Nalö töröpŋi teköigun,’ jizapmö, keu mianğö könaŋi denöwö? Mi wuanönğöra jizawi, nini mi qahö möt asarizin.”

¹⁹Mewö jiba qesim waŋgibingö mötketka Jisösnöŋ eŋgek kutuba kewö jii mötket, “Keu kewö jizal, ‘Nalö töröpŋi kun teköiga iŋini ni qahö nekŋe. Mianğö andöŋe nalö töröpŋi kun teköigun mönö asuhum eŋgibi ölop kunbuk nekŋe,’ Iŋini mönö keu mianğö könaŋi jaruba eraum mötze me?”

²⁰“Nönjön keu öl töhöŋŋi kun kewö jibi mötket: Nönjön anbiga iŋini jinğen köla sahötmemö, uruŋini qahö meleŋget yeŋön laŋ börum memba sösöŋgai aka malme. Iŋini wösöbirik aka malmemö, wösöbirikŋini mianğön mönö nönğöra aka meleŋda sösöŋgai aka malme. ²¹Ambinöŋ morö memamğö nalöŋi kam kuŋguiga masö qeiga qemjeŋ qakŋe morö mezapmö, morö dölökŋi memba kindi i eka sösöŋgaiyanğöra mönö sihimbölöŋi mi ölum qemakza. ²²Mianğö dop iŋini mewöyök nalö kewöŋe wösöbirikpuk maljemö,

nöjön könangep kunbuk asuhuba engekiga injini ölop urusösöngai buk malme. Urusösöngainjini mi kunjan kun qahö enjua ngaitma.

²³“Nalö mia ngörej yuai kungöra ni qahö qesim ningimemö, köuluknjini Iwigörej algetka di ndi ndanök ani ampei malme. Nöjön keu öl töhö nji kun kewö jibi mötket: Injini nöngö qetnön yuai kungöra Iwi köuluköm wangime ewö, yanön mi mönö tököm engima. ²⁴Nömbuk mala kageri, injini nalö mia ngörej yuai kungöra nöngö qetne qahö köuluköba malget. Mönö Iwi köuluköba malme. Köulukögetka ölop melenj engima. Mi enjiiga sö söngainjan asuhum sehiba urujini kokolak qem teköi malme.” Mewö.

Jisösnöj gölme gō ahakmeme bölöni mi luhut alakza.

²⁵“Keu jibi möta kamakzei, mi keu saingambuk jibi möta malget. Könangep nalö kun kam kungumawi, mia ngörej keu saiji mi kunbuk qahö qeba jibi mötme. Qahöpmö, Iwinangö könanji mi aukne jim asariba malmam. ²⁶Nalö mia ngörej injini nöngö qetni qeta Iwi köuluköba malme. Mia ngö könanji kewö: Injini köuluknjini Iwigörej albingöra nöngörej kunbuk qahö kamaknemö, nanjinak Iwigörej di ndi ndi köuluköba malme. Nöjön engö jit memba Iwigö qahö köulukömam.

²⁷“Iwinöj nanjak urujan jöpaköm engiba köuluknjini kewögöra möta malma: Nöjön Anutugörejök erali, injini nöngö könanji mewö möt nariba pönda j urujinan jöpaköm ni ngiba mala kotketka köna mewö ahuiga köuluknjini möta malma. ²⁸Nöjön Iwi mosöta gölmenöj eta mala gölme mosöta kunbuk lilingöba Iwinangörej öngömam.”

²⁹Mewö jiiga gwarekurupnan jiget, “Mötnöj, keu döлки jizani, mi saiji qahö qeba jizan. Mi mönö aukneyök jinönga ölop möt asarizin. ³⁰Nini merak könanjamgi kewö möt yaközin: Göjön mönö nanganök yuai pakpak möt tekönönga kunjan kun qesiba kusum gihimapköra qahö osizan. Mia ngöra gi Anutugörejök etnöji, nini mi ölop möt narizin.”

³¹Mewö jigetka Jisösnöj melenja jiyök, “Merak ölop möt narim ni ngizemö, ³²mötket, nalö tandökni kun kama aka mia njön lök mesohol köla nangunöj kinja. Nalö mia njön kam kunguiga enjön ken götjini möta nömosöta denjenda simbisembel aketka nanök malmam. Töndup nanöhök töhö n qahö malmam-mö, Iwinan nömbuk malma. Iwinöj nömbuk malmawangöra aka nanöhök töhö n qahö malmam. ³³Enjön toroqeba gölmenöj mala kahasilij qakne möta malmemö, nömbuk qekötahöba luainöj malmegöra möta keu qöndökni ki jibi mötze. Keuyök qahö jizalmö, nöjön gölme gō ahakmeme bölöni mi lök luhut ala wahijambanji kusum teköbiga erök. Mia ngöra mönö ewebibinjambuk köhöiba saitingit malme.” Mewö.

Jisösnöj nanjangöra Iwi köuluköyök.

17 ¹⁻²Jisösnöj keu mewö jim teköba Suepnöj göröken ui öngöiga kewö köuluköyök, “Iwini, göjön gölme dop ambazip pakpak

Nahöngi nöngö bapne al enjinönga kukösum qakŋe Kembu ak enjizal. Ambazipnöŋ Nahöngi nöngö keuni ölop qahö andö qeba oŋgita malme. Göŋön ambazip sutŋineyök tosatŋi meköba nöngö böröne al enjiba kewö jim kutum niŋginöŋ, ‘Gi mönö i körek kusum enjinönga malmal köhöikŋi miwikŋaiba malme.’ Nup mi mem teköbiga Nahöngan qetbuŋagi mem qarimapköra mönö aködamungi niŋginöŋ. Nöngö nalöni mi dölkki kam kuŋguiga kinda mewö köuluközal.

³“Malmal köhöikŋaŋgö könaŋi mi kewö: Göŋön mohot Anutu ölni akzan aka azi Jisös Kraist ni melaim niŋginönga erali, ambazipnöŋ netkö könaŋamniri mewö möt kutume. Malmal kömbönaŋi mewö miwikŋaibe. ⁴Nup al niŋgiba ‘Meman,’ jiba jim kutum niŋginöŋi, nöŋön mi tem köla memba mala meköyal. Aködamungabuk mala qetbuŋagi gölmenöŋ indel sehibiga aködamunŋambuk ahök.

⁵“O Iwi, nöŋön gölme qahö asuhiuga Suep mire miangöreŋ göhö qöhöröŋge asakmararaŋbuk asariba malal. Asakmararaŋ miyöhök mönö dölkki kunbuk al niŋginönga asuhum kutum niŋgiiga kunbuk göhö qöhöröŋge asakmararaŋbuk asariba malmam.” Mewö.

Jisösönöŋ gwarekurupŋi yeŋgöra aka köuluköyök.

⁶“O Iwini, göŋön gölme ambazip tosatŋi kewöta nöngö böröne al enjinöŋi, nöŋön göhö qetbuŋagi mi yeŋgöra indela kondela malal. Yeŋön göhö buŋaya aketka göŋön i nöngö böröne al enjinönga yeŋön göhö Buŋa keugi mi möt aŋgön köla malje. ⁷Göŋön yuai niŋginönga mi pakpak göhöreŋök kamakzawi, yeŋön mi nalö kewöŋe lök möt kutuze. ⁸Göŋön keu Buŋa niŋginöŋi, nöŋön mi gwarekurupni kusum enjibiga möt aŋgön köla malje. Ni gömosöta gölmenöŋ erali, yeŋön mi ölna möt yaköze. Göŋön melaim niŋginönga asuhuyali, yeŋön mi mewöyök möt narize.

⁹“Ni yeŋgöra aka köuluköm gihizal. Urumelengö kopa ambazip yeŋgöra qahö köuluközalmö, könagesö nöngö böröne al enjinönga uruŋini meleŋda göhö buŋaya akzei, mönö yeŋgöra aka köuluköm gihizal. ¹⁰Ambazip pakpak nöngö buŋa akzei, yeŋön mönö göhö buŋaya akze aka ambazip göhö buŋaya akzei, yeŋön mönö nöngö buŋa mewöyök akze. Nani aködamuni al enjibiga miangö qakŋe kinda ahakmemenini aketka nöngö qetbuŋanan qarim sehimakŋa. ¹¹Ni gölmenöŋ malmalni teköiga göhöreŋ kotmamgö akzalmö, yeŋön toroqeba gölmenöŋ malme. O Iwi Töröŋi, göŋön qetki niŋginönga miangö ösumŋan mönö sel jöhöm enjinönga qahö julme. Netkön mohot aka maljiri, yeŋön miangö dop mohot aka malmegöra köuluközal.

¹²“Nöŋön yembuk gölmenöŋ mala korali, nalö miangöreŋ qetbuŋagi niŋginönga miangön sel jöhöm enjiba malal. Buŋa Kimbigö keu kunöŋ

† 17.12 Sum 41.9; Jon 13.18

ölŋambuk akŋapköra azi mohok-kunŋan sohoba könöp siagö buŋaya aka sihimbölö möta malma. Nönŋön galöm köl enŋialaŋgöra yeŋgöreŋök tosaŋŋan qahö ŋarjuŋ aka sohoget. ¹³Tosaŋŋan qahö sohogetmö, nönŋön döli gölmenöŋ mala göhöreŋ kamamgöra kaba keu ki jizal: Nönŋö uru sösönŋainan mönö yeŋgöreŋ kutui megetka uruŋini kokolak qeiga sönŋaiba malme. Mewö asuhumapköra köuluközal. ¹⁴Nönŋön göhö Buŋa keugi kusum enŋibiga möta malje. Nönŋön gölmegö ahakmeme bölöŋi mi qahö wuaŋŋömakzali, yeŋön mönö mewöyök mi qahö wuaŋŋöba andö qemakze. Mianŋöra gölmenöŋ uruŋini qahö melenŋet yeŋön mönö kazik ak enŋimakze.

¹⁵“Nönŋön gölmenöhök enŋuaŋŋitmanŋöra qahö qesim gihizalmö, Bölöŋi Toŋaŋgöreŋök aŋgön köla sel jöhöm enŋiba malmangöra köuluközal. ¹⁶Nönŋön gölmegö ahakmeme bölöŋi andö qeba mi qahö wuaŋŋöbiga yeŋön mewöyök mi andö qeba qahö wuaŋŋömakze. ¹⁷Keu ölni mianŋön mönö mem sarahim enŋiba malman. Göhö Buŋa keugan mönö keu öl töhöŋni akza. ¹⁸Göŋön melaim niŋŋinöŋga gölme ambazip sutŋine anda nup memba malali, nönŋön mewöŋanök i melaim enŋibiga gölme ambazip yeŋö sutŋine deŋda anme. ¹⁹O Iwini, yeŋön keu ölnaŋgö dop malmalŋini körek tököm gihimegöra aka bauköm enŋiba nani malmalni jömuk tököm gihizal.” Mewö.

Jisösnöŋ mötnariŋ ambazip pakpak neŋgöra köuluköyök.

²⁰“O Iwini, nönŋön gwarekurupni yeŋgörök aka qahö köuluközalmö, Buŋa keu jim sehigetka ambazip möt narim niŋŋimeŋi, mönö yeŋgöra aka mewöyök köuluközal. ²¹Iwi göŋön nömbuk qekötahöba kinöŋga nönŋön mewöyök göbuk qekötahöba kinjal. Mianŋö dop yeŋön mewöyök netpuk qekötahöba kinmegöra mötzal. Nangak melaim niŋŋinöŋga erali, gölme ambazipnöŋ mi möt narimegöra aka yeŋön körek pakpak mohot aka malmegöra köuluközal. ²²Naniri mohot aka maljiri, yeŋön mewöŋanök mohot aka malmegöra aka aködampungŋi al niŋŋinöŋi, nönŋön mi yeŋgöra al enŋial.

²³“Nönŋön yembuk qekötahöba kinbiga göŋön nömbuk qekötahöba kinjan. Mianŋö dop yeŋön keuŋini jöhöm teköba mohot aka malmegöra köuluközal. Mohot aka kingetka gölme ambazipnöŋ könaŋamni kewö möt asarime: Göŋön melaim niŋŋinöŋ etpiga jöpaköm niŋŋiba malnöŋi, mianŋö dop i mewöyök jöpaköm enŋiba malnöŋ.

²⁴“O Iwini, göŋön gölme qahö miwikŋainöŋi, qelŋiŋe nalö mianŋöreŋ lök urugan jöpaköm niŋŋiba asakmararaŋ al niŋŋinöŋga mala koral. Könaŋŋep alaurup niŋŋinöŋi, nönŋön yeŋön mewöyök asakmararaŋ mi ekŋegöra mötzal. Mianŋöra nönŋön miri malmami, yeŋön mianŋöreŋ nömbuk mohotŋe malbingö sihimŋi mötzal.

²⁵“O Iwi solanŋi, gölme ambazip uruŋini qahö melenŋeri, yeŋön gi qahö möt kutum gihiba mala kotketmö, nönŋön gi ölöŋŋanök möt kutum gihizal. Nangak

melaim niŋginöŋi, nönğö urumelerŋ alaurupnan mi lök möt yaköze. ²⁶Nönjön göhö qetki mi jim tuarim enğibiga möta malget. Göñön urugan jöpaköm niŋgiba malnöŋi, urukalem miañön uruñine ahöi mötketka nönjön yembuk qekötahöba kinbi malmegöra mönö toroqeba qetki jim tuarim enğiba malmam.” Mewö.

Jisös memba jöhöget.

Mat 26.47-56; Mak 14.43-50; Luk 22.47-53

18 ¹Jisösnön keu mi jim teköba gwarekurupŋi enğömeiga siti mosöta geba o qetŋi Kidron kutuba likepŋe anğota arö kun ahöyöhi, miañğöreŋ anget. ²Jisös aka yangö gwarekurupŋi yeñön qösösök miañğöreŋ tokoba malget. Miañğöra Judas mamalolo mem waŋgimamgö ahöhi, yañön mewöyök arö mi ölop mörök.

³Jike nup galöm aka Farisi (Köna keugö kapaŋkölköl) yeñön jöwöwöl jikegö kiripo galöm (sikiriti) tosatŋi melaim enğigetka Judasnön i aka gawmangö yarö azi kambu kun enğömeiga mohotŋe kaget. Yeñön kiwa lambe aka timbi liŋgipŋini memba bisiba arönön kaget. ⁴Kagetka Jisösnön yuai pakpak mewö asuhum waŋgimawi, mi lök möröhanğöra aka wahöta aukŋe kaba kewö qesim enğiyök, “Inini dagöra jaruze?”

⁵Qesim enğiiga kewö meleŋget, “Nini Jisös Nazaret toŋi mia jaruzin.” Meleŋgetka kewö jiyök, “Mia nönjön.” Judas mamalolo meme azi yañön mewöyök yembuk kinök.

⁶“Mia nönjön,” Jisösnön keu mewö jiiga möta andöandö anda gölmenön tala eta enğuyök. ⁷Mewö aketka kunbuk qesim enğiyök, “Inini mönö dagöra jaruze?” Qesim enğiiga jiget, “Jisös Nazaret toŋi ia jaruzin.”

⁸Jigetka meleŋnök, “Mia nönjön, mi lök jibi mötze. Inini nia jarum niŋgize ewö, mönö azi ki ölop enğömosötketka öne anme.” ⁹Mutuk köuluköba gwarekurupŋi yeñğöra keu kun kewö jii mötket, “Ambazip nönğö böröne al enğinönğa maljei, nönjön mi köyan köl enğiba malbiga yeñğöreñök kunön kun qahö sohoba ayuhuyök.” Keu miañön ölnambuk akŋapaköra Jisösnön jitmeme yeñğöra keu mewö jiyök.

¹⁰Mewö jiiga Saimon Pitönön bimgö sou ketaŋi memba malöhi, yañön mi kupinŋeyök öröba jike nup galöm bohonŋangö welen aziŋi qeba kezapŋi ölje göröken köteköi erök. Welenqege azi mi qetŋi Malkus. ¹¹“Mewö asuhuiga Jisösnön Pitö kewö jim kutum waŋgiyök, “Gi bimgö sou ketaŋi mi mönö kunbuk alnönğa kupinŋe geyök. Iwinan sihimbölogö qambi o qölŋambuk nönğö buñaya qeyöhi, mi ölop möta mökösönđa mesohol kölmam.” Mewö.

Jisös waŋgitketka Anasgö jeŋe kinök.

¹²Suahö galömŋinan jiiga yarö azi kambu aka Juda yeñğö naŋgu galöm (sikiriti) yeñön Jisös memba jöhöget. ¹³Jöhöba waŋgita mutuk jike nup

^w 18.11 Mat 26.39; Mak 14.36; Luk 22.42

galöm qetŋi Anas yaŋgö mire anget. Anasgö qŋŋiŋi qetŋi Kaiafas yaŋön jike nup galöm bohonŋi aka yambu (yara) miangöreŋ nup mi memba malök. ¹⁴*Kaiafasnön mutuk Juda ambazip yeŋgöra qambaŋ keu kewö jiyök, “Ambazip kambu jömuk ayuhum teköbinbuköra azi mohotŋan neŋgöra aka kömuiga dop kölma.” Mewö.

Pitönöŋ Jisös könahiba qaŋ kölök.

Mat 26.69-70; Mak 14.66-68; Luk 22.55-57

¹⁵ Jisös memba angetka Saimon Pitö aka gwarek alaŋi kun yetkön andönjine anohot. Anohotka alaŋi miaŋön jike nup galöm bohonŋi möt waŋgiyöhaŋgöra aka ölop amqeba Jisös wuatangöba jakömbuak miri sel uruŋe geyök.

¹⁶ Yaŋön geyökmö, Pitönöŋ sel yaigepŋe naŋgunöŋ kinök. Mewö kiniga gwarek alaŋan jike nup galöm bohonŋi möt waŋgiyöhi, yaŋön yaigepŋe geba naŋgu galöm ambi yambuk keu jii möta naŋgu öröiga Pitö waŋgita sel uruŋe geyohot. ¹⁷ Gebitkö ahoŋi, miangöreŋ welenqeqe ambi sel naŋguni galöm kölöhi, yaŋön Pitö eka kewö qesim waŋgiyök, “Gi ölna mewöyök azi miangö gwarek yeŋgöreŋök kun akzan me?” Mewö qesim waŋgii möta “Ni qahö!” jiyök.

¹⁸ Welen azi aka naŋgu galöm (sikiriti) yeŋön amötŋangöra aka könöp jeba ururuŋgöba ahöiga jömöta kinget. Mewö kingetka Pitönöŋ mewöyök yeŋgö sutŋine anda könöp jömöta kinök. Mewö.

Jike nup galöm bohonŋan Jisös qeqesi al waŋgiyök.

Mat 26.59-66; Mak 14.55-64; Luk 22.66-71

¹⁹ Jike nup galöm bohonŋi Anas yaŋön Jisösgö qeqesi al waŋgiba kewö jiyök, “Gi ambazip denöwö kusum eŋgiba gwarekurupki niŋi niŋi eŋgömemba maljan?”

²⁰ Mewö jiiga kewö meleŋ waŋgiyök, “Ni nalö dop aukŋe ambazipŋi ambazipŋi kusum eŋgiba malal. Juda könagesö pakpak neŋön jöwöwöl jikenöŋ öngöba köuluk mirininangö dop tokomakzini, ni mönö miangöreŋ kinda kusum eŋgiba malal. Buŋa keu tölapŋi kun qahö jial. ²¹ Nöŋön keu denöwö ambazip kusum eŋgiba malali, wuanöŋgöra ni mewö qesim niŋgizan? Nöŋön keu jibiga ambazip möta malgeri, yeŋön mönö keunaŋgö kötŋi möt teköze. Miangöra i qesim eŋginöŋga dop kölma.”

²² Mewö meleŋ waŋgiyökmö, jikegö kiripo galöm (sikiriti) kunöŋ kösutŋe kinda Jisös nuŋgulumŋe qekötahöba jiyök, “Jike nup galöm bohonŋan qesim gihiiga gi keu silik mewöŋi mönö wuanöŋgöra meleŋ waŋgizan? Gödaqeqegi qahö.”

* 18.14 Jon 11.49-50

²³Mewö jiiga kewö melenj waŋgiyök, “Keu bölöŋa jibileŋak, mi mönö indelnöŋga dop kölmapmö, keu ölnj jizal ewö, mönö wuanöŋgöra ni öne nuŋguzan?”

²⁴Mewö melenj waŋgiiga Anasnöŋ Jisös melaiba jiiga tapepni (muŋgamuŋga) tok böröŋe tariga waŋgita jike nup galöm bohonji Kaiafas waŋgöreŋ anget. Mewö.

Pitönöŋ Jisös qaŋ köliga yahöt karöbut ahök.

Mat 26.71-75; Mak 14.69-72; Luk 22.58-62

²⁵Saimon Pitönöŋ könöp jömöta kiniga tosatŋan qesiba kewö jiget, “Gi ölna mewöyök waŋgö gwarekurupni yeŋgöreŋök kun akzan me qahö?” Mewö jigetka qaŋ köla “Ni qahö,” jiyök.

²⁶Pitönöŋ jike nup galöm bohonjawaŋgö welen azinji qeba kezapni qeköi eröhi, waŋgö tinitosolomni welenqeŋe alaŋi kunöŋ mi möta qesiba jiyök, “O gi mönö arönöŋ yambuk mohokŋe malohotka gekzal me denöwö?”

²⁷Mewö jiiga Pitönöŋ kunbuk qaŋ köliga nalö miaŋgöreŋök kuruknöŋ könahiba qeriga mörök. Mewö.

Jisösnöŋ premiö Pailötkö jeŋe kinök.

Mat 27.1-2, 11-14; Mak 15.1-5; Luk 23.1-5

²⁸Miri gianaŋga söŋanök Jisös Kaiafasgö mirinöhök waŋgita eta Rom premiögö jakömbuak mire anget. Juda yeŋön uruŋini tölöhoba kölköljinjin akinbuköra waimanjat möta kewö jiget,^y “Ak-kömukömu kendongö lama nembangö osibinbuk.” Mewö jiba möt lömböriba premiögö jakömbuak miri uruŋe qahö öŋgöget. ²⁹Miaŋgöra premiö Pailötnöŋ yaigep eta eŋgeka kewö qesim eŋgiyök, “Azi kianaŋön mönö wani pinjit aiga keu jim waŋgiba waŋgita kaze?”

³⁰Qesim eŋgiiga melenget, “Azi miaŋön kegwek me bölöŋi meme azi kun qahö akawak ewö, neŋön mönö öne töhöŋ i waŋgita göhö böröge qahö albinak.”

³¹Mewö melengetka Pailötnöŋ jii mötket, “Injini mönö nanŋinak keu jakeŋine al waŋgiba Köna keuŋinawaŋgö dop kewöta keuŋi jim teköme.” Mewö jii möta jiget, “Neŋön azi kun kömumapkö keuŋi jim teköbingö soŋgo ahöi osizin.” ³²^zJuda yeŋön mewö jigetka Jisös nanŋak kömup denöwöŋi kömumawi, keu mi indela jiiga mewö miaŋön ölnjambuk ahök.

³³Pailötnöŋ Juda yeŋgö keuŋini möta kunbuk jakömbuak miri uruŋe öŋgöba Jisös oholi kaiga kewö qesim waŋgiyök, “Gi Juda eŋgöreŋ kinj kembuŋina akzan me qahö?”

^y 18.28 Rom gawman yeŋgöra Juda yeŋön kewö möt nariget: Nini Rom yeŋgö jakömbuak mire öŋgöinga urunini tölöhöi ösumnini eri kölköljinjininambuk aka ak-kömukömu kendongö lama töröŋi nembangö osibin. Miaŋgöra sombemnöŋ yaigep malget.

^z 18.32 Jon 3.14; 12.32

³⁴Mewö qesim waŋgiiga melenḡa kewö qesiyök, “Keu mi mönö nangi urugeyök jizan me tosatḡan nönḡöra keu mewö jiba jitke algetka jizan?”

³⁵Mewö qesiiga Pailötnön melenḡök, “Ye! Ni mönö Juda azia aka Juda enḡö keunḡini naŋḡomakzal me? Qahöpmaḡö! Ni Rom premiö malbiga nangi ambazip kambu-urupki aka jike nup galöm yeḡön mönö goaḡgita nönḡö böröne al gihize. Göḡön mönö wanat yuai aknönḡ?”

³⁶Mewö melenḡniga jiyök, “Nönḡö kiḡtohoḡni miangḡö könaḡi mi gölme kiangḡoreḡ qahö ahöza. Nönḡön gölmegö kiḡtohoḡ kungö kiḡ kembuya akileḡak ewö, nönḡö suḡgurumurupnan mönö ölop wahöta nönḡöra aka suahö akeak. Suahö aka nönḡön Juda jitḡememe yeḡḡö börönḡine gebileḡbuköra kapaḡ köla bim qegetka nömembangö osibeak. Mi osibeakmö, nönḡö kiḡ tohoḡnaḡḡö könaḡi mi miri kungen ahöza. Ni gölme azi kembuya qahö akzal.”

³⁷Keu mi jiiga Jisös kewö qesim waḡgiyök, “Gi töndup kiḡ kembu qainḡi kun akzani, mi ölna me qahö?” Mewö qesim waḡgii melenḡök, “Ni kiḡ kembu qainḡi kun akzali, mi nangak jizan. Nönḡön keu ölni naḡḡöba jim tuarimangöra aka gölmenönḡ eta asuhuyal. Körek yeḡön keu ölnaḡḡö likeḡḡe maljei, yeḡön mönö nönḡö keuni kezap ala mörakze.”

Jisös kömumapkö jim teköget.

Mat 27.15-31; Mak 15.6-20; Luk 23.13-25

³⁸Mewö melenḡniga Pailötnön mepaqepaik aka qesiyök, “Keu ölni mi mönö wania kun?” Mewö qesiba kunbuk Juda yeḡḡoreḡ geba söndaknön kinda kewö jii mötket, “Nönḡön azi miangḡö pinḡitḡi jaruba kun qahö miwikḡaizal.”

³⁹“Kun qahö miwikḡaizalmö, ahakmemeni kun kewö ahöi mötze: Yambu (yara) dop ak-kömükömu kendon nalönḡe kösö mireyök azi mohot enḡöra pösatḡi erakza, mi mötze. Miangḡöra Juda enḡö kiḡ kembuḡini ölop enḡöra pösatḡi etpawak me qahö? Miangḡöra iḡini sihimḡinan denöwö mötze?”

⁴⁰Mewö jii möta melenḡa kewö qetket, “Qahö, i qahöpö, Barabas pösatnönḡa neḡḡoreḡ etma!” Mewö qetketmö, Barabas yaḡön kegwek azia aka bim karim kun megeri, miangḡö bohonḡi ahök. Mewö.

Pailötnön Jisös maripomnön kömumapkö jim teköyök.

19 ¹Silata qetketka Pailötnön Jisös waḡgita anda jiiga yarö azi yeḡön ihilek wahinambuknön tauköba qeget. ²Yarö azi yeḡön tauköba mepaqepaik kewö ak waḡgiget: Yeḡön Jisös qeba kösö wahinambuk memba köpeiba ila möhamḡöba nöropḡe kölget geiga maluku pisikḡi gugakgugakḡambuk mi köl waḡgigetka geyök. ³Mewö aka kösutḡe areḡḡöba kinda jiget, “Owe owe! Juda enḡö Kiḡ Kembuḡini, owe!” Mewö jiba nuḡgulumḡe gwötpuk qekötahöget.

⁴Mewö mepaqepaik ak waḡgigetka Pailötnön kunbuk yaigepḡe geba kewö jii mötket, “Mötket! Nönḡön azi mi kewöta pinḡitḡi kun qahö

miwikŋaizal. Miangöra i kunbuk waŋgitpiga eŋgö jeŋine eriga kōnaŋi mewö möt kutuba ekje.” ⁵Mewö jii mötketka Jisösnoŋ eta söndakŋe kini kewö eket: Tosatŋan kōsö wahibuknoŋ ila köpeiba nöroŋŋe köla maluku pisikŋi gugakgugakpuk köl waŋgigetka kiniga Pailötnöŋ jii kewö mötket, “Azi ölni ki eket!”

⁶Mewö jii mötketka jike nup galöm aka naŋgu galöm (sikiriti) yeŋön i eka keu wölwölbuk qeta jiget, “Maripomnöŋ qeget kömuma. Maripomnöŋ qeget kömuma.” Mewö jigetka Pailötnöŋ jitŋine memba kewö jii mötket, “Nöŋön pinjitŋi kun qahö miwikŋaizal. Miangöra inini mönö nanŋinök i memba maripomnöŋ qeget kömumbawak.”

⁷Juda jitŋememe yeŋön keu mi möta kapaŋ köla kewö jiget, “Neŋgöreŋ Kōna keu ahōza. Keu miangö dop kewōringa kömumawaŋgö dop akza. Nanŋi memba öŋgōba ‘Anutugö nahōnŋi akzal,’ jimakza. Miangöra mönö kömupkö buŋaya aiga dop kölma.”

⁸Mewö kapaŋ köla jigetka Pailötnöŋ möta bönni wahōriga jōnōmŋi undui keŋgōtŋi mörök. ⁹Mewö möta Jisös waŋgita kunbuk jakōmbuak miri uruŋe öŋgōba kewö qesim waŋgiyök, “Gi denikegöra?” Qesim waŋgiyökmö, waŋön kitipŋi kun qahö meleŋda keu bök kinök. ¹⁰Keu bök kiniga kewö jii mörök, “Gi nöŋgöra keu kitipŋi kun meleŋman me qahö? Nöŋön jim tekōbiga pōsat gihime me maripomnöŋ guhugetka kömuman. Miangö kukōsumŋi mi nöŋgöreŋ ahōza. Miangö kōnaŋi mötzan me qahö?”

¹¹Mewö jii möta kewö meleŋ waŋgiyök, “Kunöŋ euyangöreŋök kukōsum qahö al gihiyök ewö, gi mönö azi omaŋi mala yuai ak niŋgimangö osibanak. Miangöra azi kun daŋön ni göhö böroge al niŋgizawi, waŋgö siŋgisōndokŋan mönö göhöreŋ pinjit oŋgita ketaŋi akza.”

¹²Mewö meleŋ waŋgiyōhaŋgöra aka Pailötnöŋ Jisös pōsari etmapkö kapaŋ kölök. Mewö kapaŋ kölökmö, Juda yeŋön qet gigilahōba kewö jiget, “Pōsatnöŋga etma ewö, mönö sisa kiŋgö alaŋi qahö toroqeba aka malman. Kunöŋ nanŋaŋgö möri öŋgōiga ‘Kiŋ kembuya akzal’ jizawi, waŋön mönö sisa kiŋ tuarenjoŋ ak waŋgiza.”

¹³Mewö jigetka keu mi möta jim kutuiga Jisös waŋgita yaigep etket. Etketka premiö Pailötnöŋ jake kun kötnöŋ ala tömbulget ahōyōhi, miangöreŋ öŋgōba keu jimtekōtekögö dum tatatŋe eta tarök. Jake miangö qetŋi Hibru keunöŋ Gabata jimalget. Mi nanine keunöŋ Jake Kötnöŋ mem tömbultömbulŋi. ¹⁴Eta tarōhi, Juda ambazipnöŋ wehön miangöreŋ ak-kömukōmu kendon tatpingöra jōjöröget. Wehön mi aiga silim bibiŋi dopdowiiga Pailötnöŋ dum tatatŋe tata Juda yeŋgöra kewö jii mötket, “Eket, eŋgö kiŋ kembuŋini ki!”

¹⁵Mewö jii möta qet gigilahöget, “Yapmakek! Yapmakek! Maripomnöŋ qeget kömuma!” Qet gigilahögetka kewö jiyök, “Eŋgö kiŋ kembuŋinaŋgö

keunji jim teköbige maripomnöy öngömapkörä jize me?” Mewö jiiga jike nup galöm yeñön meleşda jiget, “Sisa kiñnöy mohok kiñ kembunina akza. Neñgöreñ kiñ kembu murutji kun qahö ahöza!”

¹⁶Mewö meleşda jigetka Pailötnöy Jisösgö keunji jim teköba maripomnöy qeget kömumapkörä böröjine alök. Böröjine aliga yarö azi yeñön Jisös memba galöm kölget.

Jisös maripomnöy qeget.

Mat 27.32-44; Mak 15.21-32; Luk 23.26-43

¹⁷Galöm kölgetka nanji maripomji nanjak anguba siti kutuba yaigep geba gölme kun qetji Nöröpsihit qerakzema, miangöreñ anget. Nöröpsihit qet mi Hibru keunöy Golgota qerakze. ¹⁸Miangöreñ anda maripomnöy qeget aka yambuk azi yahöt likeplikep mohotje etkuba Jisös sutjire algetka kinget.

¹⁹Mewö qegetka Pailötnöy kulem ohoba jiiga maripomnöy Jisösgö nöröñje göröken eu ala qeget. Kulem mi kewö ohoi kinök, “Jisös Nazaret toñji, Juda yeñgö kiñ kembunina ki.” ²⁰Jisös maripomnöy qegeri, gölme mi siti kösutje ahöyök aka kulem mi keu karöbut, Hibru, Latin aka Grik keu miangön ohoget kinök. Miangöra Juda ambazip gwötpukñan ongita anda kaba eu uba kulem mi oyonget. ²¹Mewö ohoiga Juda yeñgö jike nup galöm yeñön Pailöt kewö jiget mörök, “ ‘Juda yeñgö kiñ kembunina ki,’ mewö kude ohomanmö, kewö ohoman, ‘Nanñangöra Juda kiñ kembunina akzal, jiyök.’ ”

²²Mi möta Pailötnöy keu kewö meleşnö, “Keu lök ohozalangöra mi mönö mewö ahöma.”

²³Yarö azi yeñön Jisös maripomnöy qebagun opo silepöke öroyuaiñji memba azi 4 sutjine mendeñda 4 aiga totoñine meget. Mewö megetka malukunji ahöi megetmö, mi kewögöra ölop qahö mendeñget: Mi körekñanök opo johannji mohotñan memeña. Opo kitipñi kitipñi qahö mindiriba euyök liliklilik uhum megetka emu gegenji ahöyök. Miangöra mi bölipapüköra mendeñbingö osiget. ²⁴“Osiba eraum möta kewö jiget, “Mi mitiinga qahö dop kölma. Miangöra ölop miangö unji qeinga toñji ahuma.” Mewö jiba unji qegetka Buña keu kun öljambuk ahök. Keu mi kewö ohoget ahöza,

“Yeñön opo silepökenei memba sutjine mendeñda totoñine memba malukunangö unji mönahot algetka kunöy luhut alma.”

Yarö azi yeñön keu miangö dop aket.

²⁵Jisös maripomnöy qeget kiniga ambi kewöñan könañje kinget: Jisösgö nam nasöñi aka Klopas anömñi qetji Maria aka Magdalagö ambi qetji Maria. ²⁶Jisösnöy namñi aka wölböt gwarekñi kösutje kinohotka etkeka

^a 19.24 Sum 22.18

namñangöra kewö jiyök, “Namni, mönö nahöngi ki eka tönjongöba malman.”

²⁷Mewö jiba gwarek mi kewö jii mörök, “Mönö namgi ki eka tönjongöba malman.” Mewö jii möta Jisösgö namñi nalö mianggörenjök wangiriga miriñe anda mohotñe malohot. Mewö.

Jisösnöñ maripomnöñ kinda kömuyök.

Mat 27.45-56; Mak 15.33-41; Luk 23.44-49

²⁸^bJisösnöñ nupñi pakpak mem teköyöhi, mi möta mianggörenj Buña Kimbigö keu kunöñ öljambuk akñapaköra kewö jiyök, “Ni ögöra ak ningiza.”

²⁹Mianggörenj qem nene kun wain o asöljambuk miangön kokolak qeba tarök. Mi tariga köwet mömöndö kun kahali tandök mi memba wain onöñ kundungöba songorep suñe qesamböta meget öngöiga numbuñe alget. ³⁰Algetka wain o asöljambuk mi memba jiyök, “Mönö teköza.” Mewö jiba malmalñi mosötмамgöra nöropñi wambelahöi eri imutñi koriga nöñ qeyök. Mewö.

Jisösgö marömñi liñgipnöñ utohoget.

³¹Jisösnöñ nöñ qeiga Juda ambazipnöñ silim mianggörenj ak-kömukömu kendon tatpingöra jöjöröget. Ak-kömukömu Sabat kendon mi kendon nalö ketañi ahök. Mianggöra Juda jitñememe yeñön waimañjat möta kewö jiget, “Qamöt mieñön Sabat kendon nalöñe maripomnöñ kingetka qahö dop kölja.” Mewö jiba premiö Pailötkörenj anda kewö qesim wangiget, “Gi ölop jinönga anda maripomnöñ engugeri, yeñgö töwat sihitñini kusugetka qamötñini meköin etme?” ³²Qesim wangigetka jim teköiga yarö azinöñ kañgotket. Kañgota Jisösbuk maripomnöñ etkugeri, mi zilañ kömumahotköra mutuk yetkörenjök kungö töwat sihitñi kusuba likep anda kungörenj mewöñanök aket.

³³Mewö aketmö, Jisösgörenj kañgota eketka lök kömuyök. Mewö eka sihitñi qahö kusuget. ³⁴Qahö kusugetmö, yarö azi yeñgörenjök kunñan liñgip memba marömñi umburatiiga mianggörenjök sep aka o erök.

³⁵Mewö aketka kunöñ yuai mi jeñan ehöhi, yañön mi nañgöba jiba ki ohoi ahöi döлки oyoñje. Keu nañgöba jiba ohoi ahözawi, mi mönö keu öljä akza. Injini mewöyök mi möt narimegöra möta keu öljä jizawangö dop mötza. ³⁶Yuai mi asuhuyöhi, mi Buña Kimbigö keu kunöñ öljambuk akñapaköra asuhuyök. Keu mi kewö,

“Yañgö sihitñi mönö kude kusume.”

³⁷^dAka Buña Kimbigö keu kun kewö ahöza,

^b 19.28 Sum 69.21; 22.15 ^c 19.36 Eks 12.46; Jañ 9.12; Sum 34.20 ^d 19.37 Zek 12.10; Ind 1.7

“Azi utohogeri, yeñon mönö yangörej göröken jeñini uba ekje.”
Injini keu yahöt miangöra aka mi möt narime. Mewö.

Jisösgö qamötñi köt köteñnöh löm kölget.
Mat 27.57-61; Mak 15.42-47; Luk 23.50-56

³⁸Miangö andöñe Arimatia taon tonji qetñi Josef kayök. Yañon Jisösgö gwarekñi aka malökmö, Juda jitñememe yeñgöra keñgötñi möta mötnaripñi köyatiba malök. Yañon kaba premiö Pailötköreñ anda Jisösgö qamötñi mekömamgö qesim wañgiyök. Qesim wañgiiga möta jim teköiga kaba meköyök.

³⁹“Azi qetñi Nikodemus mutuk Jisösgöreñ sunjem kayöhi, yañon mewöyök kayök. Kaba qamöt mirimamgöra kelök köhöwakñambuk qetñi mör mi repa oñambuk meleñgeri, mi esu mohot lömbötñi 30 kilogö dop bohonñi memba kaba Josef bauköm wañgiyök. ⁴⁰Bauköm wañgiiba mohotñe Jisösgö qamötñi meköyohot. Meköba jiniñ wöronñi ölöpnji memba qamöt sileñe ala opo tuatñi miañön köpeiyohot. Juda ambazip neñon qamötnini mewö aka mözözömgöba löm köl engizinma.

⁴¹Jisös maripomnöñ qegeri, gölme miangö likepñe arö kun ahöyök. Arö miangöreñ qaksirigö köt köteñ löm dölöknji kun urorohoget kinök. Miangöreñ qamöt kun qahö algetka gwamönñi ahöyök. ⁴²Gwamönñi aka kösutñe ahöiga Juda ambazipnöñ ak-kömukömu kendon tatpingöra jöjörögetka nalöñini töriyök. Miangöra Jisösgö qamötñi memba miangöreñ ala löm kölohot. Mewö.

Jisösgö löm qaksiriñan gwamönñi ahök.
Mat 28.1-8; Mak 16.1-8; Luk 24.1-12

20 ¹Sabat kendon tatket teköiga Magdalagö Maria yañon Sonda söñanök wañgarañ suruiga qaksirinöh anök. Anda je ui ani köt ketañi ehiga miañön lök köteñ urorohoñi miangö numbuñeyök qetalget kaba ahöyök. ²Mewö eka miangöreñök mosöta ösumok anda Saimon Pitö aka Jisösgö wölböt gwarekñi yetköreñ kaba kewö jii mörohot, “Mönö Kembugö qamötñi qaksirinöhök memba anda denike alget ahözawi, mi qahö mötzin.”

³Mewö jii möta mosöta qaksirinöh anohot. ⁴Mohotñe ösumok anohotmö, gwarek alañan ösumñan anda Pitö oñgita mutuk qaksirinöh añgorök. ⁵Añgota köt köteñ urorohoñi miangö uruñe qahö öñgöba numbuñe öne kökörüba ui aniga oponji köpekopeiñanök ahöiga ehök. ⁶Mi ehiga Saimon Pitönöh mewöyök andöñe kañgota köt köteñ uruñe öñgöba oponji köpekopeiñanök ahöi ehök. ⁷Mi ehök aka nööröpnji opo jahönñi kunöh köpeiba esuhugeri, mi tosatñan kusuba silegö oponji miambuk qahö mindiriba kungen algetka nanjök tariga ehök.

^e 19.39 Jon 3.1-2

⁸Mewö ehiga gwarek alaŋan mutuk qaksirinöŋ kaŋgoröhi, yaŋön mewöyök köt köteŋ uruŋe öŋgöba yuai mi eka möt nariyök. ⁹Jisös guliba kömupnöhök wahötmawi, yetköŋ Buŋa Kimbigö keu mewöŋi mi qeljiŋe qahö möt asariba tönpin mala korohot. Mewö.

Jisösnöŋ Magdalagö ambi Mariagöreŋ asuhuyök.

Mat 28.9-10; Mak 16.9-11

¹⁰Mala kota miangöreŋök möt nariba lilingöba miriŋire anohot. ¹¹Yetköŋ anohotmö, Marianöŋ nanŋök qaksirigö köt köteŋ numbuŋe kinda sahörök. Mewö sahöta köteŋ urorohoŋi miangö uruŋe kököriba ui anök. ¹²Ui aniga Suet garata yahöt malukuŋiri tuat lalamŋi etkehök. Jisösgö qamötŋan ahöyöhi, yetköŋ mönö miangöreŋ tarohot. Kunöŋ nööröŋi ahöyöhaŋgöreŋ tariga kunöŋ könaŋe tarök.

¹³Mewö tata kewö jiyohot mörök, “Ambi, gi mönö wuanöŋgöra sahötzan?” Mi möta jiyök, “Kembunaŋgö qamötŋi memba anda denike alget ahözawi, mi qahö mötzal.”

¹⁴Mewö jiba lilingöba Jisösnöŋ kösutŋe kiniga ehökmö, kaisöŋgolomŋi mi qahö ek kutuba tönpin kinök. ¹⁵Tönpin kiniga Jisösnöŋ kewö qesim waŋgiyök, “Ambi, gi mönö wuanöŋgöra sahötzan? Dagöra jaruzan?” Mewö qesim waŋgiiga arö galömŋan kinja me denöwö, mewö mötmöriba kewö jiyök, “O ketaŋamni, gi qamötŋi memba aŋguba kungen anda alnöŋ ewö, mönö denike ahöza, mi jinöŋga möta anda memam.”

¹⁶Mewö jiiga Jisösnöŋ qetŋi qeta “Maria!” jiyök. Mi qeta jiiga yaŋgöreŋ lilingöba Hibru keunöŋ qeta “Raboni!” jiyök. Mi nanine keunöŋ “Ketaŋamni.”

¹⁷Mewö jiiga kewö jii mörök, “Ni Iwinangöreŋ qahö öŋgöba ki kinjal. Miangöra ni kude nömisirimanmö, nöŋgö munurupni yaŋgöreŋ anda buzup kewö jinöŋ mötme: Nöŋön mönö Iwi Anutuni aka eŋgö Iwi Anutuŋini yaŋgöreŋ lilingöba öŋgömam.”

¹⁸Mewö jii möta Magdalagö ambi Maria yaŋön lilingöba anda gwarekurupŋi kewö jii mötket, “Nöŋön Kembu ekiga keu mewö mewö jii mötzal.” Mewö.

Jisösnöŋ gwarekurupŋi asuhum eŋgiyök.

Mat 28.16-20; Mak 16.14-18; Luk 24.36-49

¹⁹Sonda miangöreŋök miri söŋauiga gwarek yaŋön ömbibiŋe tokoba Juda yaŋgöra keŋgötŋini möta miri naŋguŋi köla ki namŋi misiget geiga tatket. Mewö tatketka Jisösnöŋ asuhuba sutŋine kinda kewö jiyök, “Alaurupni, luainöŋ embuk ahöma!” ²⁰Mewö jiba böroyahötŋi aka marömŋi kondeliga Kembu eketka sösongainöŋ uruŋini kokolak qeyök. ²¹Kokolak qeiga toroqeba kewö jiyök, “Alaurupni, luainöŋ embuk ahöma! Iwinöŋ ni melaim niŋgiiga nöŋön iŋini mewöŋanök melaim eŋgizal.”

²²Mewö jiba nöröpɽine memba ösum enggiba uwulamgöba jiyök, “Mönö Uŋa Töröŋi meget. ²³ʃɽini ambazip siŋgisöndokɽini mosöta saŋgoŋje ewö, mi mönö Anutugö jeŋe solanim teköza. Ambazip siŋgisöndokɽini qahö mosöta saŋgoŋje ewö, mi mönö Anutugö jeŋe qahö solaniza.” Mewö.

Jisösnöŋ Tomas asuhum waŋgiyök.

²⁴Jisösnöŋ gwarekurupɽi mewö asuhum enggiyökmö, gwarek 12 yeŋgöreŋök kun qetɽi Tomas, qetɽi alaŋi Siwisiwi qetkeri, yaŋön nalö miaŋgöreŋ sutɽine qahö malök. ²⁵Tomasnöŋ kaiga gwarek tosatɽan “Mönö Kembu ekzin,” jiget möta kewö jiyök, “Jenan biriŋ löpötɽi böröŋe eka kesötнан marömŋe misirimam ewö, mönö ölop möt narimam. Ni nanak mi qahö eka misiriba oseimam ewö, mönö keuyök jiget möta öŋa mi qahö möt narimam.”

²⁶Mewö jiiga sonda mohot teköiga gwarek yeŋön Sonda miaŋgöreŋ kunbuk mire qezaköba naŋgu köla ki memba Tomasbuk mohotɽe tatket. Mohotɽe tatketka Jisösnöŋ kunbuk asuhuba sutɽine kinda kewö jiyök, “Alaurupni, luainöŋ embuk ahöma!” ²⁷Mewö jiba Tomasgöra jiyök, “Gi mönö börögi böranɽa böröyahötни eka kesötнан marömne misiriman. Mewö aka yaŋgiseŋ mosöta uruyahötки yaköriba ni möt narim niŋgiman.”

²⁸Mewö jiiga kewö meleŋnök, “O, gi nöŋgö Kembu Anutuna!”

²⁹Mewö meleŋniga kewö jii mörök, “Gi nekzanangöra ni ölop möt narim niŋgizänmö, ambazip qahö neka töndup ni möt narim niŋgimakzei, yeŋön mönö simbawoŋ akze.” Mewö.

Jonöŋ Ölöwak Buŋa ki kewögöra ohoyök:

³⁰Jisösnöŋ nup ösum-mumu qakɽe memba maliga aŋgöletot sehisehiŋi tosatɽi mi gwarek yeŋgö jeŋini qakɽe asuhugetmö, mi buk kiaŋgöreŋ qahö ohoyal. ³¹Keu tosatɽi ohoyali, mi kewögöra ohoyal: Jisösnöŋ Anutugö Nahönŋi aka Amötqeqe Toŋi Kraist akzawi, iŋini keu mi möt nariba mewö miaŋön Jisösgö qetbuŋaŋangöra aka malmal köhöikɽi buŋa qem aŋgume. Mewö aka malmegöra nöŋön Ölöwak Buŋa papia ki ohobiga engöreŋ kaza. Mewö.

Jisösnöŋ gwarek 7 yeŋgöreŋ asuhuiga söra jök öröget.

21 ¹Könangep Jisösnöŋ kunbuk gwarek tosatɽi yeŋgöreŋ asuhuyök. Taiberias o aŋgö jitɽe miaŋgöreŋ kewö asuhum enggiyök: ²Gwarek azi kewöŋan mohotɽe malget: Saimon Pitö, Tomas qetɽi kun Siwisiwi qetkeri, Natanael azi mi Galili prowinsgö Kana taonöhök aka Zebedigö nahönyahötɽi yahöt aka gwarek tosatɽi yeŋgöreŋök yahöt.

† 20.23 Mat 16.19; 18.18

³ Mohotnje malgetka Saimon Pitönöj jii mötket, “Ni mönö söra örömamgöra anmam.” Mewö jiiga tosatjan jiget, “Nini ölop göbuk mohoknje anbin.” Mewö jiba mosöta wanjenöj öngöba anda sunjem miañgöreñ söra kun qahö öröget. ⁴ Söra qahö öröba öne malgetka miri lök gianjiiga Jisösnöj saknönj kinök. Kinökmö, yanjö kaisongolomni mi qahö ek kutuget. ⁵ Jisösnöj kinda engohola jiyök, “Alaurupni, söra kun öröze me qahö?” Jiiga melenja “Qahö!” jiget.

⁶ “Qahö!” jigetka kewö jim kutum engiyök, “Inini mönö mösakñini wanje ölje göröken gilgetka eri ölop söra miwikñaima.” Mi möta mösakñini gilgetka söra sehisehiji geba ölökögerangöra öröget kotmapkö osiiga öröm suksuköget.

⁷ Mewö aiga Jisösgö wölböt gwarekñi miañön Saimon Pitö kewö jii mörök, “Mi mönö Kembuya!” Mewö jiiga Kembangö qetji möta opo bindoñanök jöhöba malöhangöra silepökeñi köpeiba miañgöreñök o añgönöj luhuba geyök. ⁸ Yeñön sak qöhöröñe 100 mita miañgö dop kösutnje anda malget. Miañgöra Pitönöj geba ani gwarek tosatji yeñön wanje lökuatnönj qem nanjöba anda mösak sörañambuk örögetka wanje andöñe kayök.

⁹ Mewö kaba sak köriknje öngöba miañgöreñ yuai kewö eket: Könöp jeiga gapnönj söra jejeñi aka beret soñsoñ ahöyök. ¹⁰ Mi eketka Jisösnöj kewö jii mötket, “Inini döлки söra örözei, mönö miañgöreñök tosatji memba ki kaget.”

¹¹ Mi jiiga Saimon Pitönöj möta wanjenöj öngöba mösak öröiga köriknje öngöyök. Öngöiga ölni 153 eket. Mösak mi söra ketañi sehisehiji mieñön kokolak qegetmö, mösaknönj töndup qahö tingirök. ¹² Ölni mi eketka Jisösnöj kewö jii mötket, “Mönö kaba söñangö neneñi neget!” Mewö jii möta kaba “Mi Kembunina,” mewö möt kutugetmö, gwarek yanjööreñök kunjan “Gi dañön?” mewö qesimangö urulömböt aka qahö qesiyök. ¹³ Qahö qesiyökmö, Jisösnöj anda beret memba engiba söra mewöyök mendenja engiyök.

¹⁴ Jisösnöj kömupnöhök wahöta gwarekurupñi asuhum engiyöhangö indimñi karöbut mi ahök. Mewö.

Jisösnöj Pitö kunbuk kunjuba mem köhöiyök.

¹⁵ Söñangö neneñi neget teköiga Jisösnöj Saimon Pitögöra kewö jii mörök, “Saimon Jongö nahönñi! Alaurupki kienön ni uruñinan jöpaköm niñgimakzei, gi mönö i engongita gwötpuk jöpaköm niñgimakzan me qahö?” Mi möta kewö melenök, “O Kambu, ni göhöra ak niñgimakza. Gi wölböt alani akzan. Mi nangak ölop mötzan.” Mewö melenniga Jisösnöj jii mörök, “Gi mönö nöngö lamaurupni moröñi gumohom engiba malman.”

§ 21.3 Luk 5.5 h 21.6 Luk 5.6

¹⁶Mewö jii möri indimnji yahöt qesim waŋgiyök, “Saimon Jongö nahönji! Gi ölŋa jöpaköm niŋgimakzan me qahö?” Mi möta kewö meleŋnök, “O Kembu, ni göhöra ak niŋgimakza. Gi wölböt alani akzan. Mi nangak ölop mötzan.” Mewö meleŋniga Jisösnöŋ jii mörök, “Gi mönö nöŋgö lamaurupni galöm köl eŋgiba malman.”

¹⁷Mewö jii möri indimnji karöbutnji qesim waŋgiyök, “Saimon Jongö nahönji! Gi mönö ölŋa wölbötkan (jojopaŋgan) nöŋgö ak gihimakza me qahö?” Mewö qesim waŋgiiga urujöjöpakö qeqesinji mohot miyök qesiiga indimnji karöbut ahöhaŋgöra Pitönöŋ wösöbirik möta meleŋda kewö jiyök, “O Kembu, gi yuai pakpak ölop möt teközan. Gi wölböt alani akzan. Göŋön mönö nangak mi ölopŋanök mötzan.” Mewö jiiga Jisösnöŋ jii mörök, “Gi mönö nöŋgö lamaurupni gumohom eŋgiba malman.

¹⁸“Nöŋön keu öl töhöŋnji kun kewö jibi mötnöŋ: Gi sepgulia mala nangak sileötaŋgi jöhöba köna igen me waigen ‘anmam,’ jiba ak gihiyöhaŋgö dop ölop anda kaba malnöŋ. Mewö mala malnöŋmö, azi namnji akŋani, nalö miaŋgöreŋ börögi böraŋnönŋga kunŋan kaba opo silepökegi jöhöm gihiba köna kungen qahö anmangö mötmani, mönö miaŋgöreŋ goaŋgiriga anman.”

¹⁹Jisösnöŋ kezapqetok keu mewö jiba Pitö kömumawaŋgö keu saiŋi indelök. Yaŋön kömup tandökŋi qainnji kun kömuiga Anutugö qetbuŋaŋi qarimapköra mötmörriba mi jiyök. Keu mi jiba yaŋgöra jii mörök, “Gi mönö kaba ni nuataŋgöba malman!” Mewö.

Jisösnöŋ Pitöbuk gwarek kungö keuŋi eraum mörohot.

²⁰Pitönöŋ Jisösbuk anda liliŋgöba Jisösgö wölböt gwarekŋan andönjire kaiga ehök. Gwarek miaŋön ak-kömükömu lama negeri, miaŋgöreŋ nöropŋan Jisösgö töptöpŋe nariba jiyök, ‘Kembu, göhöreŋ mamalolo azi mi daŋön?’ ²¹Gwarek miaŋön könaŋjire kaiga Pitönöŋ i eka Jisös kewö qesim waŋgiyök, “Kembu, gwarek kiaŋgöra mönö denöwö asuhuma?”

²²Qesim waŋgiiga kewö jii mörök, “Nöŋön yaŋgö malmal areŋi mewö me mewö albileŋak, mi mönö göhöreŋ waimanjara qahö. Nöŋön jibiga yaŋön qahö kömumba nöŋön gölmenöŋ liliŋgöba kamamaŋgö nalöŋe toroqeba jebuk mal öŋgöbawak, keu mi yaŋgö keuya akawak. Gi mönö yaŋgö keuŋi mosöta nangi malmalgi möhamgöba galöm köl aŋguba nöŋgö andöne kaba ni nuataŋgöba malman.”

²³Keu mewö jiiga tosatŋan laŋ möta jim sehigetka urumeleŋ alaurup yengö sutŋine keu mi kewö jim sohoget, “Gwarek miaŋön qahö kömuma.” Mewö jim sohogetmö, Jisösnöŋ jebuk teteköŋi qahö mal öŋgömapköra qahö jiyökmö, keu kewö jiyök, “Nöŋön yaŋgö malmal areŋi mewö me mewö albileŋak, mi mönö göhöreŋ waimanjara qahö. Nöŋön jibiga yaŋön qahö kömumba nöŋön gölmenöŋ liliŋgöba kamamaŋgö nalöŋe toroqeba jebuk mal öŋgöbawak, keu mi yaŋgö keuya akawak. Gi mönö yaŋgö

keuŋi mosöta nangi malmalgi möhamgöba galöm köl aŋguba malman.”
Mewö.

Nanak mi pakpak jenan eka naŋgöba ohom eŋgizal.

²⁴Gwarek miaŋön yuai mi jeŋan eka mala miaŋgö dop mi naŋgöba jim asariba Ölöwak Buŋa ki ohoyök. Körek pakpak eŋön gwarek miaŋgö könaŋi mötzeaŋgöra aka ölop tönguba kewö jiba malme, “Yaŋön keu naŋgöba jiyöhi, miaŋön mönö keu öl töhöŋŋi akza.”

²⁵Jisösönöŋ nup aka aŋgöletot tosatŋi sehisehiŋi mi mewöyök aka memba malök. Mieŋgö kösohotŋini mohot mohot mi lökŋanök törörök ohobinak ewö, mönö buk papia böranŋi böranŋi sehisehiŋi asuhugetka kantri dop papia köwe miri (laibreri) pakpak miaŋgöreŋ alinga kokolak qeba ölököiga tiŋi töndup qahö dop kölbawak. Mewö mötmörizal.